

清
史
稿

列傳十七之二十二

第八十册

10

11

12

13

14

15

16

17

18

19

20

21

22

23

24

25

26

27

28

清史稿

列傳十七

武理堪

子吳拜蘇拜和蘇託

武納格

子齊墨德克圖

阿什達爾漢

阿蘇圖納子賽固三泰瑚什布三泰子明阿圖穆徹納

鄂莫克圖

喀山綽拜喀山子布納海安達哩立

吉思哈

弟吉普喀達吳巴海

康喀勒

兄子嘉和托薩瑪弼拉翰

武理堪瓜爾佳氏世居義屯父伊蘭柱徒居哈達費德里太祖初起武理堪來

歸歲癸巳葉赫糾九部之師三道來侵上遣武理堪出東路偵敵武理堪出虎

攔哈達新城行將百里方度嶺羣鴉競噪若阻其行者武理堪心異之度行且

與敵左馳歸告上上命改道自札喀路向渾河部武理堪行薄暮至渾河敵方

屯北岸會食爨火密如星武理堪得葉赫邏卒一言敵兵三萬將夜度沙濟嶺

而進遂挾以還報時夜方半上命旦日出師武理堪慮我軍怵敵衆言曰敵雖

衆心不一誰能禦我及戰遂破諸路兵旗制定武理堪隸滿洲正白旗分轄丁

戶爲牛彙額眞出從征伐率選鋒前驅爲噶布什賢噶喇昂邦天命四年明經略楊鎬合諸鎮兵四道來侵太祖督諸貝勒帥師禦之旣敗其三道獨總兵李如柏出鴉鶻關未與我師遇鎬檄使引還武理堪方率二十騎邏虎攔山見如柏軍行山麓乃令諸騎立馬山巔鳴螺脫帽繫弓未揮且噪若指揮伏兵者如柏軍望而愕顧武理堪遂縱騎疾馳下擊斬四十人獲馬五十匹如柏軍奪路走相蹂藉死者復千餘武理堪尋卒太祖嘆曰武理堪從朕摧鋒陷陳幾死者數矣乃錄其二子吳拜蘇拜吳拜年十六從太祖伐明略撫順遇敵輒奮鬪矢中額不顧嘗從太祖獵有熊突圍出躍上峻嶺太祖遙望見一人躍馬射熊貫胸而墮上顧侍臣雅蓀曰是非吳拜不能遣視之吳拜也因諭諸皇子曰吳拜之勇今共見之矣遂授侍衛天命四年從伐葉赫負重創力戰不退師還賜良馬明總兵毛文龍誘我新附之衆實皮島吳拜循徼三日獲逋八十餘射殺文龍使者還告上時吳拜已代父爲牛彙額眞上命以所獲隸所轄牛彙六年從伐明破明軍於南壽山授備禦旣克遼陽以俘獲分隸諸將上以吳拜能繼父

志年少建功命視一等大臣隸千人十一年蒙古巴林部貝勒囊努兔背盟掠境上上遣將討之吳拜從謀者爲敵困援之出殪敵百人太宗即位列十六大臣佐脗白旗命逐蒙古亡去者至都爾弼蒙古亡去者十五人拒戰吳拜旣被創仍奮擊盡斬之太宗諭諸大臣曰是固先帝數嘉許者賞特厚天聰四年伐明取永平灤州等四城吳拜從貝勒阿敏守永平阿敏引還吳拜當坐罪逮繫以嘗率擺牙喇兵援灤州夜入敵營太宗命貰之釋其縛尋授噶布什賢甲喇章京五年從伐明圍大凌河城與甲喇章京蘇達喇詣錦州偵敵六年從伐察哈爾率精騎前驅道遇蒙古亡去者擊殺之察哈爾林丹汗西奔土默特部師還取歸化城上命吳拜撫輯降者八年伐明攻大同多爾濟將中軍圖魯什將左軍吳拜將右軍明總兵曹文詔迎戰擊敗之復與甲喇章京席特庫設伏宣府獲明守備一殲其游騎尋與承政阿什達爾漢等招林丹汗子額哲來歸九年五月明屯軍大凌河西吳拜與固山額眞阿山石廷柱圖賴要其歸路斬明副將劉應選獲游擊曹得功及守備三殲步騎五百餘復攻克松山城南堡師

還進三等甲喇章京是時上遣諸貝勒分道伐明命吳拜等帥師駐上都城舊址偵軍事崇德元年復命與勞薩等齎書投明邊吏冬征朝鮮命與承政馬福塔等率兵三百爲前驅襲朝鮮都城朝鮮王倮走南漢山城師進吳拜與勞薩擊破朝鮮援兵斬二百餘級二年授噶布什賢噶喇昂邦列議政大臣甲喇章京丹岱阿爾濟等如土默特互市將還命吳拜率將校至歸化城迎護遇明邏卒十六人斬其十五獲馬十九俘一以還三年四月略寧遠逐敵墮壕斬馘甚衆八月率兵八十人至紅山口遇明兵斬其裨將復擊走羅文峪騎兵五百奪其纛獲馬四十殲密雲步兵百餘五年與勞薩率兵過中後所略海濱斬級二百獲馬騾牲畜我師攻錦州命吳拜駐軍要隘爲策應屢敗敵兵六年春以攻錦州勿克論統師王貝勒罪吳拜坐罰鍰秋上自將攻松山明兵敗走吳拜未邀擊逮繫旋命釋之七年從貝勒阿巴泰入明邊敗敵豐潤三河靜海至於靑州八年從鄭親王濟爾哈朗取明中後所前屯衛十一月復授正白旗梅勒額眞順治初從入關擊李自成二年解梅勒額眞授內大臣三年從豫親王多鐸

討蘇尼特部長騰機思四年與輔國公鞏阿岱內大臣何洛會帥師戍宣府論功遇恩詔累進二等伯蘇拜年十五從太祖伐蒙古有功授侍衛兼領牛彖額眞天聰間從軍收察哈爾林丹汗子額哲遂入明邊攻代州明兵三百自崞縣赴援蘇拜爭先當敵明兵潰走崇德元年從伐朝鮮破敵桃山村三年授擺牙喇甲喇章京從貝勒岳託伐明白牆子嶺入越明都擊敗明太監馮永盛四年圍錦州蘇拜屢擊敗明援兵自松山杏山至者又與固山額眞圖爾格等伏兵烏忻河口多所俘獲敵千餘躡師後擊卻之獲其輜重六年復圍錦州敗松山騎兵又敗明總督洪承疇所將步兵予世職牛彖章京兼半個前程七年從貝勒阿巴泰伐明敗敵克樂安昌邑八年師還進三等甲喇章京順治初從入關擊李白成世祖既定鼎命將分道討自成以豫親王多鐸爲定國大將軍出山西河南英親王阿濟格爲靖遠大將軍道塞外土默特鄂爾多斯諸部入邊南取西安蘇拜佐阿濟格軍方冬度黃河鑿冰以濟明年春至榆林自成兵夜襲蒙古軍蘇拜與擺牙喇彘章京徹爾布赴援賊敗走還軍遇伏復擊卻之攻延

安七戰皆勝自成走湖廣追之至安陸屢破賊壘俘馘無算三年攝擺牙喇蠡章京從肅親王豪格討張獻忠敗獻忠將高汝礪於三寨山進擊獻忠於西充賊攻正監旗營蘇拜與阿爾漢共援之大破賊兵五年師還授擺牙喇蠡章京論功遇恩詔累進二等精奇尼哈番八年正月吳拜蘇拜及內大臣洛什博爾輝發英親王阿濟格罪狀吳拜進三等侯蘇拜進一等精奇尼哈番加拖沙喇哈番二月洛什博爾輝以諂媚諸王造言構釁論死吳拜兄弟坐削爵奪官籍沒蘇拜又坐阿徇睿親王多爾袞論死上特宥之九年起蘇拜爲正白旗梅勒額眞十三年擢內大臣十五上年上念吳拜兄弟事太祖太宗有戰功復授吳拜世職一等精奇尼哈番蘇拜一等阿思哈尼哈番尋授蘇拜領侍衛內大臣康熙三年十二月蘇拜卒諡勤僖四年四月吳拜卒年七十諡果壯吳拜子郎談自有傳蘇拜第三子和託康熙間以侍衛從討王輔臣戰平涼城北殺賊甚衆從討吳三桂戰攸縣敗三桂將王國佐等戰永興敗三桂將胡國柱等十九年自廣西進兵攻石門坎黃草壩薄雲南省城敗吳世璠將胡國柄劉起龍等皆

有功官至護軍參領予世職騎都尉加一雲騎尉五十二年卒

武納格博爾濟吉特氏隸蒙古正白旗其先蓋出自蒙古而居於葉赫太祖創業武納格以七十二人來歸有勇略通蒙漢文賜號巴克什歲癸丑從伐烏喇有功授三等副將天命十一年太祖伐明圍寧遠城未下命武納格別將兵攻覺華島明參將姚撫民將兵四萬倚島列屯鑿冰爲壕袤十五里衛以盾武納格督軍爭壕首排盾逕入盡殲其衆焚所儲芻糗及舟二千餘進二等總兵官太宗即位武納格總管蒙古軍位亞揚古利李永芳在八大臣上旋以蒙古軍益衆分左右二營武納格與鄂本兌同爲固山額眞天聰三年春與額駙蘇納等率蒙古軍益以滿洲驍卒八十人伐察哈爾降其邊境二千戶軍中流言降者闕我師寡將爲變於是盡殲其男子惟二台吉得免俘其孥八千太宗責武納格等殺降非義奪所給牲畜命以所俘分隸二翼贍之母失所冬從太宗伐明入龍井關克遵化進薄明都明督師袁崇煥自寧遠來援左翼蒙古兵迎戰不能勝武納格麾右翼蒙古兵繼進遂敗敵賜俘獲之半以犒其軍尋克固安

四年春克永平明將以三千騎自玉田至武納格遣兵擊之走獲馬百餘行略豐潤還聞明兵四千攻大安口城急與察哈喇赴援解其圍又就軍士行樵設伏致敵斬獲無算五年秋復從伐明明總兵祖大壽守大凌河城杏山守將與大壽書謀携軍棄城相就武納格獲以獻得其情於是環城築壘鑿壕爲久困計武納格統蒙古兵屯城東南大壽縱兵出攻我所下臺堡武納格與貝勒阿濟格等率兵夾攻殲敵過半自是城兵不復出六年夏與阿濟格招撫大同宣府邊外察哈爾部衆七年秋與貝勒阿巴泰等侵明攻山海關有所俘獲師還明兵追襲武納格爲殿力戰却之太宗諭諸貝勒大臣曰武納格所在建功今又爲殿敗敵人臣爲國當如是也八年五月改蒙古軍左右營爲左右翼以武納格爲左翼固山額眞定諸將功次武納格以一等昂邦章京世襲旋進三等公是年太宗復率諸貝勒分道伐明命武納格統蒙古軍爲策應入獨石口越興安嶺經保安州至應州與大軍會道收察哈爾千餘戶所過諸州縣或攻或撫悉稱上意閏八月自得勝堡班師收蒙古逃人自陽和入者四百七十九人

月喀爾喀部衆爲察哈爾所襲殺命將百人往誦斬二十餘人而還九年二月卒子德穆圖齊墨克圖廣泰德穆圖武納格長子也初任牛彖額眞崇德二年正月擢戶部承政七月更定官制改右參政四年從上伐明圍松山樹雲梯攻城會明兵自錦州赴援德穆圖度不能克棄雲梯引還罪當死上特貫之論罰尋兼任梅勒額眞六年從鄭親王濟爾哈朗伐明圍錦州蒙古貝勒諾木齊等守外城約降鄭親王令德穆圖迎之諾木齊方率所部與明兵戰德穆圖以其子阿桑喜出我師克外城諾木齊始來歸德穆圖詭言諾木齊父子皆所拔出論罰籍家產之半罷參政梅勒額眞俾專領牛彖七年從貝勒阿巴泰伐明白薊州入邊薄明都略山東順治元年從入關擊流賊授拜他喇布勒哈番二年從豫親王多鐸攻潼關遂定江南敗明將鄭鴻達於瓜洲與都統馬喇希徇常州與明將黃蜚等遇再戰皆捷分兵下宜興崑山諸縣加拖沙喇哈番復任本旗蒙古副都統三進一等阿達哈哈番九年卒齊墨克圖武納格次子早歲屢從行陳略寧遠敗明兵武納格旣卒以廣泰襲世職從伐明坐違令不前奪世

職以齊墨克圖降襲一等阿思哈尼哈番復從伐明與沙爾虎達等率邏卒至錦州明兵五百來追還擊敗之獲馬六十及其纛太宗伐明三圍錦州齊墨克圖皆在軍中遇城兵出戰驟馬截擊陳斬十人攻洪承疇所將步卒掩殺甚衆又敗敵援兵八年三月與阿爾津哈寧阿等伐黑龍江圍都里屯克之又降大小噶爾達蘇能吉爾三屯師賚貂皮銀幣十一月擢梅勒額眞佐本旗順治初從入關加拜他喇布勒哈番合爲三等精奇尼哈番三年從定西大將軍何洛會擊破叛將賀珍五年卒復以廣泰襲一等阿思哈尼哈番別以齊墨克圖子薩哈炳分襲拜他喇布勒哈番廣泰遇恩詔進二等精奇尼哈番乾隆初定封三等子

阿什達爾漢納喇氏與葉赫貝勒金台石同族爲兄弟太宗諸舅也太祖滅葉赫阿什達爾漢率所屬來歸授牛录額眞隸滿洲正白旗天命六年二月從伐明攻奉集堡圍其城阿什達爾漢先諸將奮進三月攻遼陽復先登克之授一等參將敕免死一次太宗嗣位以阿什達爾漢典朝鮮蒙古諸屬部嘗奉使宣

諭天聰六年明邊吏遣使議和上命阿什達爾漢及白格龍什等報聘既盟而歸白格言阿什達爾漢及龍什等受明邊吏餽命奪入官六年從貝勒濟爾哈朗薩哈璘如蒙古鞫獄賚敕二十道失其九論罰十一月復以定律令頒布蒙古諸部八年五月上自將伐察哈爾林丹汗命徵兵科爾沁部會於宣府左衛林丹汗西遁道死所屬額爾德尼囊蘇等以其衆降上命阿什達爾漢及吳拜等挾額爾德尼囊蘇誦林丹汗子額哲所在九月率來降台吉塞冷等還並報復有祁他特等率千人而來者踵相接也旋命至春科爾大會蒙古諸部分畫牧地使各有封守復與諸貝勒亭平其獄訟十一月還報稱旨令專轄一牛彙九年二月從貝勒多爾袞等將萬人取額哲四月師至托里圖多爾袞等遵上所授方略遣阿什達爾漢及金台石孫南褚諭額哲母額哲母金台石女孫也阿什達爾漢爲其族尊行額哲遂從其母舉部來降當我軍未至有鄂爾多斯濟農圖巴者招額哲與盟而去阿什達爾漢偵知之追及圖巴令悉歸額哲之餽又率兵入明邊略宣府大同入山西境多所俘獲師還上親迎勞之崇德元

年六月授都察院承政上御崇政殿侍臣巴圖魯詹額爾克戴青後至阿什達爾漢責其慢叱出之十月與希福使察哈爾喀爾沁諸部申明律令十二月從伐朝鮮國王李倬走保南漢山城豫親王多鐸帥師追之圍城朝鮮諸道援兵合萬八千人樹二柵城外悉衆出戰阿什達爾漢及貝子碩託率精騎銳進大破其軍朝鮮別將以五千人屯山麓爲聲援復分兵百循河而南阿什達爾漢馳擊盡殲之攻破其壘餘衆皆潰二年正月倬請降論功進三等副將世襲尋復使科爾沁巴林扎魯特喀喇沁土默特祿諸部頒赦且讞獄明年五月部議阿什達爾漢讞獄失平受蒙古諸部餽命罷承政奪所餽入官七月復授都察院承政五年與參政祖可法等疏論時事略言皇上欲恢張治道深思篤行之今諸國景附朝廷清明而諸王以下至諸固山額眞彼此瞻顧第念身家莫肯一心爲國有所論列不知果無可言耶抑有所畏忌而不敢言耶夫刑所以防民之姦戢於法則麗於刑此不可宥也今刑部斷獄不依本律諸臣有坐者或從重論輒削其職臣思諸臣歷戰陳出死力蒙恩授官一旦有過豈可

不論重輕而遽削其職乎臣等竊思先時簡選議事十人今皆不稱職宜罷斥令甲戰死者將吏得世職兵則恤其妻孥今又未盡行惟皇上裁察疏入上嘉納之六年從伐明上督諸軍圍松山明總兵曹變蛟屯乳峯山乘夜棄寨率步騎直犯御營諸將力戰卻之阿什達爾漢未至論罪罷承政降世職爲牛彖章京尋卒太祖諸臣自葉赫來歸者蘇納固三秦瑚什布皆與金台石同族蘇納當葉赫未亡棄兄弟歸太祖太祖妻以女爲額駙編所屬人戶爲牛彖使領牛彖額眞隸正白旗天命四年太祖滅葉赫命蘇納收其戚屬隸所領牛彖十年授甲喇額眞錄戰功賜敕免死四次尋擢梅勒額眞天聰元年太宗自將伐明攻錦州以貝勒莽古爾泰等將偏師屯塔山衛饒道命蘇納選八旗蒙古精銳別屯塔山西路截明兵明兵二千人至蘇納領燾進擊敗之乘勝逐敵多所俘斬獲馬百五十二年春命與武納格將兵伐察哈爾以殺降見詰責十月復與武納格將兵逐蒙古亡去者語並見武納格傳五年授擺牙喇燾章京擢兵部承政從伐明圍大凌河城敗城兵及錦州援兵授備禦世職八年考滿進三等

甲喇章京免徭役九年以隱匿壯丁削世職七月定蒙古旗制以蘇納領鑲白旗崇德元年從武英郡王阿濟格伐明薄明都攻鵬鶚長安昌平諸城隘五十
六戰皆捷復與薩穆什喀共攻容城克之師還以先出邊後隊爲敵乘潰敗奪
所俘獲十二月從伐朝鮮朝鮮將以步騎兵千餘禦戰蘇納及吳塔齊等邀擊
大破之俘其將二年吏議蘇納坐朝鮮國王朝行在亂班釋甲又離大軍先還
論罰三年又坐有所徇隱論罰罷固山額眞仍領牛彖順治五年卒世祖追錄
蘇納舊勞復原職子蘇克薩哈自有傳固三泰歸太祖太祖妻以女爲額駙領
牛彖隸滿洲鑲藍旗從伐明戰於廣寧單騎入敵陳身被數創戰愈力師乘之
遂敗敵授副將世職太宗即位爲八大臣領本旗天聰元年三月從貝勒阿敏
伐朝鮮有功師還上郊勞三年上自將伐明攻遵化固三泰率本旗兵攻其西
南克之四年上命固三泰與達爾漢等助攻昌黎語詳達爾漢傳復命與高鴻
中庫爾纏等下灤州藉其倉庫銀穀以聞五年上幸文館覽達海所譯武經因
諭羣臣曰爲將當恤士朕聞額駙固三泰與敵戰士有死者以繩繫其足曳歸

蔑視若此何以得其死力乎尋命解固山額眞九年詔免徭役並增賜人戶俾專領牛彙順治初卒子明阿圖睿親王多爾袞帥師入關明阿圖攝梅勒額眞爲殿累官都察院理事官廂藍旗蒙古副都統授三等阿達哈哈番順治八年卒明阿圖子賽弼翰初爲簡親王濟度護衛康熙四年授護軍參領從護軍統領瑚里布西禦吳三桂將吳之茂克陽平朝陽諸關趨保寧討王輔臣克秦州從平南將軍賴塔南討鄭錦戰漳州敗錦將劉國軒等誅吳世璠定雲南累官廂藍旗滿洲副都統授拜他喇布勒哈番二十九年卒瑚什布與固三泰同隸廂藍旗領牛彙尋任侍衛兼甲喇額眞天聰三年從伐通古索爾和部身被七創戰益力斬敵將授備禦世職八年從伐明攻大同與圖魯什等擊敗明總兵祖大弼攻萬全左衛擊敗明總兵曹文詔復設伏邀擊斬三十餘級俘四人九年定蒙古旗制瑚什布領鑲藍旗崇德元年從武英郡王阿濟格伐明越明都克定興師還部議出邊時不爲殿爲敵所乘士卒戰死者十人罰白金六百奪世職罷固山額眞專領牛彙三年授理藩院副理事官順治四年復世職遇恩

清史稿
卷一百一十五
七
詔進二等阿達哈哈番七年卒子穆徹納順治間官護軍參領從豫親王多鐸
征蘇尼特部騰吉思敗喀爾喀兵從武英親王阿濟格討姜瓖敗其將劉偉思
等攻寧武關敗宜孟臣援兵至左衛城戰於吳家峪從靖南將軍珠瑪喇定廣
東敗李定國于新會累進三等阿達哈哈番十三年卒

鄂莫克圖納喇氏自葉赫歸太祖隸滿洲正藍旗初爲擺牙喇壯達天聰元年
正月從伐朝鮮克義州五月上自將伐明攻寧遠明總兵滿桂陳於城東鄂克
莫圖從諸將進戰殪敵三年從貝勒岳託伐明攻保安州先登克之賜號巴圖
魯授備禦世職任甲喇章京八年從伐黑龍江虎爾哈部計俘爲諸甲喇章京
冠崇德二年復從伐卦爾察部計俘如伐虎爾哈部時三年七月授兵部理事
官九月從睿親王多爾袞伐明白青山口入邊越明都擊敗明太監馮永盛克
臨潼關略地至濟南四年七月上遣使如明命與努山等率兵護使者以行五
年授噶什賢布噶喇昂邦從伐明圍錦州擊敗明總兵祖大壽六年復圍錦州
擊敗明經略洪承疇語見喀山傳上軍松山杏山間明軍自松山潰遁騎兵走

杏山步兵走塔山鄂莫克圖先後邀擊並有斬獲七年復從圍杏山分兵略寧遠掠牲畜明總兵吳三桂以兵躡我師後我師擊之敗走復益兵覘我師壘鄂莫克圖與戰窮追至連山敵騎自沙河犯我師牧地復奮擊破之錦州既下進二等參將順治元年從入關敗賊安肅追之至慶都尋率前鋒兵徇山西敗賊絳州渡口二年從英親王阿濟格定陝西敗賊延安李自成走湖廣追之至安陸屢破賊壘得戰艦三十授一等甲喇章京三年從肅親王豪格下四川敗賊漢中逐張獻忠至西充與護軍統領白爾赫圖等屢戰皆捷加授半個前程遇恩詔進一等阿思哈尼哈番十一年授正藍旗滿洲副都統十三年致仕康熙十二年卒年七十八乾隆初定封一等男喀山納喇氏世居蘇完當葉赫未滅挈家歸太祖隸滿州鑲藍旗授牛录額眞屢從伐明下遼瀋有功予游擊世職天命九年明總兵毛文龍以兵百人劫額駙康果禮莊喀山率所部禦之斬二裨將殲其衆天聰六年從伐察哈爾與勞薩吳拜率精銳前驅林丹汗遁走入年進三等梅勒章京日失明辭牛录順治初進二等昂邦章京尋改二等精奇

尼哈番十二年卒諡敏壯子納海初以喀山病目命代領牛彘旋授噶什賢布甲喇額眞從伐明與席特庫等以步兵四千擊敗明陽和騎兵斬級二百獲馬六十餘復設伏宣府捕明邏騎九年復從伐明攻大同命與布丹等駐上都城故址調軍事尋命與鄂莫克圖等齎書諭明邊守將厯喜峯口潘家口董家口諸隘及還斬邏卒百餘崇德二年命與席特庫齎書諭明錦州守將祖大壽自廣寧入邊獲邏卒十二斬其九縱二人使齎諭以往俘一人以還四年從武英郡王阿濟格伐明錦州還報捷復從上攻松山明兵出戰擊卻之祖大壽遣兵自寧遠乘舟趨杏山將入城納海與瑚密色索渾將兵擊其後斬級五十獲甲四十舟一又與瑚密色席特庫等行略地俘採薪者三十二人牛羊羸馬無算五年從伐明圍錦州敵築臺城外納海與色赫布丹蘇爾德將騎兵馳擊斬四十人復逐斬刈草者四十二人敵來犯屢擊卻之與色赫等略小凌河斬祖大壽所遺蒙古十七人六年明總督洪承疇集各道兵赴援次松山與吳拜擊敗其騎兵上自將攻松山敵自杏山走塔山與鄂莫克圖帥師邀擊追至筆架山

斬級四百俘二十八得蠹六獲馬二百餘七年錦州下叙功予半個前程命攝噶什賢布噶喇昂邦從貝勒阿巴泰伐明自黃崖口入長城趨薊州敗明總兵白騰蛟白廣恩遂略山東明年師還以右翼諸將不俟左翼軍至先出邊功不叙順治初遇恩詔進三等阿達哈哈番及喀山卒兼襲二等精奇尼哈番例進二等伯雍正中從孫奇山降襲一等阿思哈尼哈番乾隆元年定封一等男安達立納喇氏自葉赫歸太祖隸滿洲正紅旗太祖遣兵徇鐵嶺刈其禾有蒙古人降於明出拒安達立擊之走事太宗從貝勒薩哈璘駐牛莊師攻永平葉臣率二十四人冒矢石先登安達立其一也師還從圖魯什偵敵建昌夜戰甲士有中矢墜馬者援之出擢噶什賢布章京從伐明攻惇縣率所部先登復以四十人伏忻口敗敵得蠹三馬五十餘出邊圖爾格擊敵潰竄安達立邀擊迫敵入壕所殺傷過當天聰九年授牛錄章京世職擢正紅旗蒙古梅勒額眞崇德三年從貝勒岳託伐明將至牆子嶺聞明軍備甚固安達立與固山額眞恩格圖率所部趨嶺右陟高峯間道入邊擊敗明軍越燕京略山東明年師自青山

口出邊復擊敗明軍五年圍錦州屢戰皆捷六年復圍錦州洪承疇援師至與戰破三營至暮敵潰翼日復戰又擊卻之叙功加半個前程尋卒子阿積賴襲職順治初從入關逐李白成戰於慶都又從葉臣徇山西署正紅旗蒙古梅勒額眞又從英親王阿濟格攻延安逐自成至武昌竄入九宮山率師搜勦殲其徒甚衆四年兼任刑部理事官五年署巴牙喇纛章京從鄭親王濟爾哈朗征湖南分兵徇道州攻永安關叙功進一等阿達哈哈番兼拖沙喇哈番卒綽拜巴林氏自葉赫歸太祖隸蒙古鑲白旗爲牛彖額眞天聰八年授世職牛彖章京九年與吳巴海伐瓦爾喀部深入額赫庫倫額埒岳索諸地進三等甲喇章京崇德三年兼任戶部理事官從睿親王多爾袞伐明徇山東至濟南敵騎千餘拒戰何洛會先衆奮擊遂克其城七年從肅親王豪格圍明總督洪承疇於松山承疇遣兵夜越壕攻鑲黃旗營擊卻之八年進二等順治初從入關破流賊進一等四年加拖沙喇哈番五年授參領從征南大將軍譚泰討叛將金聲桓克饒州南昌師還賚白金千馬四十七年遷倉場侍郎八年授鑲白旗蒙古

梅勒額眞兼工部侍郎擢本旗固山額眞進一等阿思哈尼哈番九年二十月卒布丹富察氏自葉赫歸太祖隸滿洲正紅旗授牛彖額眞尋遷甲喇額眞領擺牙喇兵天聰八年從伐明克萬全左衛城先登授半個前程九年從貝勒多鐸伐明攻錦州師還明兵驟至固山額眞石廷柱所部有陷陳不能出者布丹破陳援之出旋命與納海等調軍事崇德元年從武英郡王阿濟格伐明破鵬鶚長安二隘皆先登與蘇納同功轉戰至涿州師還明兵出居庸關設伏邀我軍輜重擊破之四年與沙爾瑚達等將土默特兵二百略寧遠北境以數騎挑戰敵堅壁不出乃俘其樵者以歸五年圍錦州殺敵語見納海傳六年與明兵戰松山杏山屢勝錦州下進牛彖章京世職七年冬復與納海等從貝勒阿巴泰伐明順治初從入關破流賊敍功並遇恩詔進一等阿達哈哈番九年擢正紅旗蒙古副都統十一年卒諡毅勤孫達哩魯布哩氏太祖取葉赫以其民分屬八旗孫達哩隸正黃旗選充驍騎遇戰必先中創不爲卻屢得優賚崇德三年從睿親王多爾袞伐明入自青山口越明都轉戰至山東攻濟南先登第一

清史稿 卷一百一十五 列傳一百一十五
賜號巴圖魯授二等參將領牛彖額眞順治間累進二等阿思哈尼哈番遷擺
牙喇燾章京從穆里瑪圖海討李自成餘黨李來亨袁宗第等破茅麓山有功
十二年加太子少傅十四年四月卒諡果壯

吉思哈烏蘇氏世居瓦爾喀馮往屯初屬烏喇見其貝勒不足事與弟吉普喀
達歸太祖並授牛彖額眞隸滿洲正白旗旋改隸鑲白旗天命四年從伐明有
功授游擊世職六年以甲喇額眞帥師圍遼陽樹雲梯先登天聰八年太宗追
錄其功進二等參將是年與甲喇額眞吳巴海伐東海虎爾喀部俘一千五百
有奇及牲畜輜重九年與梅勒額眞巴奇蘭等伐黑龍江收二千人以還進一
等參將崇德元年太宗自將伐朝鮮聞明兵入讎場遣吉思哈率兵躡其後擊
敗之二年師既克朝鮮都城上命旗出甲士十並簡科爾沁敖漢柰曼扎魯特
烏拉特諸部兵俾吉思哈及理藩院承政尼堪爲將自朝鮮伐瓦爾喀因擊破
朝鮮軍斬平壤巡撫進略瓦爾喀奏捷稱旨語詳尼堪傳累遷至吏部參政三
年四月卒子吉瞻襲吉魯喀達吉思哈弟也天命四年授游擊六年任甲喇額

眞從伐明攻奉集堡明總兵李秉誠赴援師與戰明兵走入城師從之至壕城上發巨礮吉普喀達中礮卒天聰八年贈二等參將子爪爾察襲吳巴海瓜爾佳氏自烏喇歸太祖太祖討尼堪外蘭吳巴海實從隸滿洲鑲藍旗授牛彖額眞天聰元年四月從貝勒阿敏伐朝鮮攻義州與梅勒額眞阿山穆克譚等先登克之五月從太宗伐明攻錦州敵來犯我師少却吳巴海爲殿督戰敗敵五年與梅勒額眞蒙阿圖伐瓦爾喀略額黑庫倫額勒約索二部收降人數千上郊勞賜宴賜號巴圖魯六年從伐察哈爾林丹汗西遁上命吳巴海逐逋逃斬察哈爾兵五獲其馬及牲畜旋率師伐烏札喇部署所將兵四道並進會敵方漁於握里河吳巴海揮騎直前斬三百餘人得其輜重七年與牛彖額眞郎格如朝鮮互市得瓦爾喀部長族屬十五人以歸八年與吉思哈伐東海虎爾哈部語詳吉思哈傳十二月復與牛彖額眞景固爾岱將四百人伐瓦爾喀降屯長分得里収阿庫里尼滿部衆千餘師還上命大臣迎勞以所獲賚之九年從貝勒岳託率師鎮歸化城土默特人許部長博碩克圖謂其子陰遣使與明通

清史稿 卷一百一十五
岳託遣吳巴海及甲喇額眞阿爾津等四人要諸途毛罕私以告喀爾喀人潛遁吳巴海追獲之並得明使毛罕者博碩克圖子乳母之夫也初從土默特來降既而有叛志號博碩克圖子爲汗自號貝勒吳巴海既執喀爾喀使人遂殺毛罕十年授梅勒額眞世職一等甲喇章京崇德元年六月進三等梅勒章京移鎮寧古塔十二月喀木尼漢部葉雷等叛將其孥俱亡吳巴海部兵逐之行動數十日無所見見宿雁三射之一雁負矢飛且墮往取之見遺火知逃者自此過躡其跡及之於溫多獲其孥葉雷入山追及圍之諭使降不可射之葉雷將注矢有狐起於前觸葉雷弓弓墜遂射殺葉雷及其從者師還太宗命諸固山額眞迎勞二年叙功進三等昂拜章京賜衣服僕馬莊田三年與梅勒額眞吳善帥師戍歸化城旋坐匿罪人徇廝養卒盜米罷梅勒額眞論罰四等卒分世職爲一等甲喇章京者一爲牛彙章京者二授其子弟

康喀勒納喇氏輝發貝勒王機砮之孫也太祖時偕從兄通貴率族屬來歸隸滿洲鑲紅旗授牛彙額眞天聰六年從伐察哈爾部八年正月上以察哈爾林

丹汗西遁其部衆流散錫爾哈錫伯圖命康喀勒與岱青塔布囊等率蒙古及諸部駐牧兵往取以歸五月授世職牛彖章京崇德三年兼刑部副理事官五年擢鑲紅旗蒙古梅勒額眞六年從伐明圍錦州並攻松山城七年松山錦州皆下復克塔山城尋追論攻松山避敵克塔山與固山額眞葉臣爭功罪當死太宗特貫之順治初從入關擊李白成加半個前程尋從豫親王多鐸下江南與固山額眞準塔自徐州水陸並進次清河明總兵劉澤清遣部將馬花豹張思義等率戰艦千餘兵數萬屯黃淮口康喀勒與游擊范炳吉天相等發礮毀其舟分兵追擊澤清走淮安下復與梅勒額眞譚布擊明總漕田仰仰方屯湖口橋以三千人迎戰擊破之又戰於三里橋逐至海岸獲舟八十又戰於如皋攻通州以雲梯克其城旁近諸縣皆下二年十一月授鎮守江寧梅勒額眞時江北未定羣相聚爲亂江寧有謀爲內應者康喀勒與駐防總管巴山先期捕治殺三十人而定已而明潞安王朱誼石集衆二萬餘分三道來攻康喀勒等擊卻之三年以功進三等甲喇章京世襲四年改三等阿達哈哈番旋卒子洛

多襲職和托康喀勒從兄之子也順治元年以噶什布賢甲喇章京從入關破李自成潼關移兵下江寧復從貝勒博洛徇浙江破明總兵方國安等於杭州復略福建所向克捷攻汀州先登克其城論功并遇恩詔授拜他喇布勒哈番兼拖沙喇哈番世襲十一年從征雲南擊敗明將白文選取進永昌奪瀾滄江鐵索橋康熙九年卒瑪拉和托弟也順治十二年以三等侍衛署甲喇額眞從固山額眞伊勒德攻舟山從擺牙喇蠡章京穆成額破鄭成功兵於泉州十六年從安南將軍達素擊成功廈門皆有功康熙二十二年卒通嘉康喀勒兄孫初襲其父莽佳三等阿達哈哈番順治十八年以護軍參領從靖東將軍濟什喀討山東賊于七于七據棲霞岨嶠山爲亂其黨呂思曲兪三等以數千人拒戰通嘉擊敗之賊遂以平康熙六年改前鋒參領十四年從信郡王鄂托討察哈爾布爾尼師至達祿布爾尼爲伏山谷間通嘉督所部盡擊殺之布爾尼以三十騎遁以功加拖沙喇哈番旋坐事削十八年以護軍統領從討吳三桂破譚宏於雲陽二十三年遷本旗蒙古都統二十四年卒薩璧翰亦納喇氏父三

檀自輝發率屬歸太祖授牛彖額真隸滿洲正藍旗卒薩璧翰與其兄薩珠瑚並授牛彖額真太宗卽位以薩璧翰列十六大臣佐正藍旗天聰五年擢戶部承政八月上自將伐明圍大凌河城兵出禦薩璧翰與戰舍馬而步逐敵薄壕城上發礮矢甲士巴遜沒於陳薩璧翰力戰入敵陳取其尸還八年五月上自將伐察哈爾貝勒濟爾哈朗居守薩璧翰與梅勒額真蒙阿圖副之考滿授世職甲喇章京崇德二年從伐朝鮮取皮島師還薩璧翰與其兄薩珠瑚發貝子碩託以廝役冒甲士請卹坐論罰薩璧翰初隸碩託至是命改隸饒餘貝勒阿巴泰旋以薩璧翰從子侍衛吳達禮從伐朝鮮私役甲士坐奪世職三年改吏部右參政四年授議政大臣六年八月從伐明攻錦州明援兵自松山至誘戰薩璧翰被創卒於軍子漢楚哈哈爾沁皆授牛彖額真哈爾沁從討吳三桂從討噶爾丹皆有功授拖沙喇哈番漢楚哈子哈爾弼授一等護衛從擊鄭成功戰廈門歿於陳亦授拖沙喇哈番

論曰太祖初起扈倫四部與爲敵四部之豪俊先後來歸武理堪等自哈達武

納格阿什達爾漢鄂莫克圖等自葉赫吉思哈等自烏喇康喀勒等自輝發皆能効奔走立名氏武納格其先出自蒙古遂爲白奇超哈統帥勳績尤着四部有才而不能以太祖股肱爪牙取於敵有餘國之興亡雖曰天命豈非人事哉

清史稿

列傳十八

佟養性

孫國瑤

李永芳

石廷柱

馬光遠

弟光輝

李思忠

子蔭祖

蔭祖子鈞

金玉和

子維城

孫得功

王一屏

張士彥

一屏子國光

士彥子朝璘

國光子永譽

金礪

佟養性遼東人先世本滿洲居佟佳以地為氏有達爾哈齊者入明邊為商自開原徙撫順遂家焉天命建元太祖日益盛強養性潛輸款為明邊吏所察置之獄脫出歸太祖太祖妻以宗女號施吾理額駙授三等副將從克遼東進二等總兵官太祖用兵於明明邊吏民歸者籍丁壯為兵至太宗天聰間始別置一軍國語號烏真超哈五年正月命養性為昂邦章京諭曰漢人軍民諸政付爾總理各官受節制爾其殫厥忠簡善黜惡恤兵撫民毋徇親故毋蔑疏遠昔廉頗藺相如共為將相以爭班秩幾至嫌釁賴相如舍私奉國能使命名焜耀於今日爾尚克效之又諭諸漢官曰漢人軍民諸政命額駙佟養性總理各官

受節制其有勢豪嫉妬不從命者非特藐養性是輕國體褻法令也必譴母赦如能謹守約束先公後私壹意爲國則爾曹令名亦永永垂後世矣是歲初鑄礮使養性爲監礮成銘其上曰天祐助威大將軍凡四十具師行則車載以從養性掌焉八月上伐明圍大凌河城養性率所部載礮越走錦州道爲營擊城西臺臺兵降又擊城南壞睥睨翼日擊城東臺臺圯臺兵夜遁盡殲之九月明兵出關援錦州上遣親軍迎擊養性以所部兵五百從敵潰遁明監軍道張春合諸路兵援大凌河夜戰上督騎兵擊破之方追奔明潰兵復陳上命養性屯敵壘東發礮燬敵壘十月攻子章臺發礮擊臺上堞臺兵多死者十一月祖大壽以大凌河降上命盡籍城中所儲鎗礮彈藥付養性尋率兵墮明所置臺壕自大凌河至於廣甯六年春正月上幸城北演武場閱兵養性率所部烏眞超哈試礮環甲列陳軍容甚肅上嘉養性能治軍因追獎大凌河戰功賜雕鞍良馬一白金百遂徧及諸將自石廷柱以下皆有賜設宴以勞之養性疏言新編漢兵馬步僅三千有奇宜盡籍漢民爲兵有事持火器而戰無事則爲農火器

攻城非礮不克三眼鎗佛朗機鳥鎗特城守器耳宜增鑄大礮兵食未足宜令民廣開墾無力者官界牛若種穫則以十一償四月上自將伐察哈爾命與貝勒阿巴泰杜度大臣揚古利伊爾登留守七月卒順治間追諡勤惠子普漢改襲二等昂邦章京卒以弟六十襲崇德四年漢軍旗制定隸漢軍正藍旗順治四年改二等精奇尼哈番遇恩詔累進三等伯國瑤六十子也襲爵康熙九年授本旗副都統十二年吳三桂反特命國瑤爲鄖陽提督帥師鎮撫十三年襄陽總兵楊來嘉以穀城叛附三桂鄖陽副將洪福應來嘉刦部兵千餘攻國瑤國瑤率游擊杜英佟大年以健丁三百拒戰福退復至苦戰數日斬二百餘級福敗遁事聞加左都督十四年福挾諸叛將分五道來犯復擊敗之逐戰泥河口板橋河斬其將林躍等七輩兵數百人十五年四川叛將譚洪與福等復分道來犯洪屯鄖江北福掠鄖江南相聲援國瑤分兵禦之戰坪溝戰黃畝戰九里岡又渡鄖江戰江南岸皆勝焚其舟及械斬獲無算福復遣衆伏鄖江兩岸以三十餘舟順江下泊琵琶灘偪鄖陽運道爲寨國瑤及將軍噶爾漢撫治楊

茂勳等率水陸兵大破之戰陔嶺福敗走運道復通敍功加一等十六年以捐俸賚軍賑難民加太子少保十七年進討來嘉福戰於房縣獲其將五十二輩印十二劄牌二十四遂克其城進復保康十八年與噶爾漢等攻興安久而不下命削戰陔嶺所敍加一等六月授福建將軍二十八年卒諡忠愨乾隆初定封二等子達爾哈齊子養眞自有傳

李永芳遼東鐵嶺人在明官撫順所游擊太祖克烏喇烏喇貝勒布占泰走葉赫太祖伐葉赫葉赫愬於明明使告太祖誠毋侵葉赫太祖以書與明言葉赫渝盟悔婚復匿布占泰不得已而用兵躬詣撫順所永芳迎三里外導入教場太祖出書畀永芳乃引師還後三歲爲天命元年又三歲始用兵於明四月甲辰昧爽師至撫順所遂合圍執明兵一使持書諭永芳曰明發兵疆外衛葉赫我乃以師至汝一游擊耳戰亦豈能勝今諭汝降者汝降則我即日深入汝不降是誤我深入期也汝多才智識時務我國方求才稍足備任使猶將舉而用之與爲婚媾况如汝者有不加以寵榮與我一等大臣同列者乎汝若欲戰我

矢豈能識汝既不能勝死復何益且汝出城降我兵不復入汝士卒皆安堵若我師入城男婦老弱必且驚潰亦大不利於汝民矣勿謂我恫喝不可信也汝思區區一城且不能下安用興師失此弗圖悔無及已降不降汝熟計之母不忍一時之忿違我言而僨事也永芳得書立城南門上請降而仍令軍士備守具上命樹雲梯以攻不移時師登陴斬守備王命印等永芳冠帶乘馬出降固山眞額阿敦引永芳下馬匍匐謁上上於馬上以禮答之傳諭勿殺城中人東州馬根單二城及沿邊諸臺堡五百餘悉下是日上駐撫順明日命墮其城乃還編降民千戶遷之赫圖阿喇命依明制設大小官屬授永芳三等副將轄其衆以上第七子貝勒阿巴泰女妻焉太祖伐明取邊城自撫順始明邊將降太祖亦自永芳始是年七月上復伐明拔清河四年克鐵嶺六年下遼瀋永芳皆從以功授三等總兵官明巡撫王化貞及諸邊將屢遣諜招永芳永芳輒執奏上嘉獎敕免死三次太宗卽位以朝鮮與明將毛文龍相應援納逋逃命貝勒阿敏等帥師討之永芳從上諭阿敏等曰朝鮮理當討然非必欲取之凡事相

機度義而行克義州分兵攻鐵山擊走文龍進下定州安州次平壤其官民皆遁遂渡大同江朝鮮王李倬使齎書迎師諸貝勒答書歷數其罪許以遣大臣莅盟當班師使既行師復進次黃州倬使馳告已遣大臣莅盟阿敏欲遂攻其都城諸貝勒謂宜待所遣大臣至永芳進曰我等奉上命仗義而行前與朝鮮書許以遣大臣莅盟當班師今食言不義盍暫駐待之諸貝勒皆是其言阿敏怒叱永芳曰爾蠻奴何多言我豈不能殺爾耶師再進次平山倬所遣大臣至師卒如永芳議遣劉興祚庫爾纏如倬所莅盟而還八年永芳卒有子九人漢軍旗制定隸正藍旗漢軍次子李率泰自有傳第三子剛阿泰順治初官宣府總兵時姜瓖爲亂山西北境諸州縣土寇蠡起瓖既平所部竄匿代州定襄繁峙五臺山中剛阿泰先後逐捕諸山砦悉平旋以屬吏侵饗劾罷第五子巴顏天聰八年襲父爵例改三等昂邦章京崇德間以參領從太宗征科爾沁圍錦州與洪承疇戰松山城下皆有功七年定漢軍八旗以巴顏爲正藍旗固山額眞八年九月從鄭親王濟爾哈朗等征甯遠拔中後所前屯衛順治元年進二

等昂邦章京旋與固山額真石廷柱剿寇昌平與固山額真葉臣徇直隸饒陽河南懷慶山西澤州潞安諸府縣師還賜白金五百二年從定西大將軍和洛輝自陝西徇四川流寇孫守法賀珍犯西安再戰大破之逐至黑水峪斬守法又破流寇一隻虎於商州克延安諸路山寨四年例改二等精奇尼哈番五年進一等精奇尼哈番討叛將姜瓖從睿親王多爾袞復渾源州從英親王阿濟格復左衛從異親王滿達海復朔州汾州及太谷諸縣巴顏在軍將左翼挾火器以攻所向皆克八年敍平姜瓖功復遇恩詔進一等伯九年卒乾隆間定封號曰昭信四十年正月命以其族改隸鑲黃旗

石廷柱遼東人先世居蘇完姓瓜爾佳氏明成化間有布哈者爲建州左衛指揮布哈生阿爾松阿嘉靖中襲職阿爾松阿生石翰移家遼東遂以石爲氏石翰子三國柱天柱廷柱萬歷之季廷柱爲廣甯守備天柱爲千總太祖師至巡撫王化貞走入關天柱先與諸生郭肇基出謁且曰吾曹已守城門矣翌日入城廷柱從衆降授世職游擊俾轄降衆蒙古巴林部貝勒囊努克背盟劫掠廷

柱從上討之取其寨收牲畜以還進三等副將天聰三年太宗命率兵搜剿明故毛文龍所轄諸島敵白石城島來犯擊斬二百人俘十九人尋從上伐明薄明都四年師還至沙河驛廷柱與達海諭城中軍民出降又與達海以千人誦漢兒莊漢兒莊與三屯營喜峰口諸堡先已降而復叛至是復降五年明總兵祖大壽築城大凌河上自將圍之大壽窮蹙使從子澤潤射書請降并乞上令廷柱往議廷柱與達海至城南先使姜桂詞大壽桂故明千總爲我軍所俘大壽使游擊韓棟從柱出迎廷柱並以其義子可法爲質廷柱乃踰濠與語大壽言決降惟乞速取錦州俾妻子得相見廷柱以告上復遣廷柱諭指大壽乃降是時佟養性爲烏真超哈昂邦章京廷柱爲副六年養性卒廷柱代爲昂邦章京從伐察哈爾多斬獲七年從貝勒岳託伐明攻旅順師還上酌金卮以勞進三等總兵官八年從伐明攻應州克石家村堡九年復從伐明與明兵戰大凌河西斬明副將劉應選獲游擊曹得功等崇德元年上自將伐朝鮮命廷柱帥所部整器械儲糗構挾火器以從二年既定朝鮮還攻皮島廷柱與戶部承政

馬福塔攻其北隅尋追論朝鮮王李倬謁上時廷柱亂班釋甲及縱士卒違法妄行罪解任罰鍰奪賞賚是年分烏眞超哈爲左右翼以廷柱爲左翼固山額眞三年上與諸臣論兵事舉呂尙相勗廷柱言呂尙制闔外專生殺故所向有功今臣等若有過下部逮訊雖牛彘以下亦當比肩對簿其何以堪諸臣以其言戇請下刑部議罪論死上宥之是年十月從伐明攻錦州克城外諸屯堡進破城旁臺臺上餘敵兵潛自間道走廷柱弗追擊部議降爵罰鍰上復命宥之四年二月上自將伐明烏眞超哈諸將孔有德耿仲明尙可喜馬光遠及廷柱皆率所部從上駐軍松山命廷柱攻城南臺毀其堞臺兵不能禦守將王昌功等四十餘人出降上登松山南岡度地形命廷柱從可喜以砲攻城南門之左廷柱與光遠先取城西南隅臺諸將繼進攻城城堞皆盡會以日暮罷明日攻益急城兵守禦甚固我兵緣雲梯上不能入死者二十餘人廷柱兄子達爾漢亦被創上召詢諸將皆謂攻必克翌日復集議有德仲明可喜光遠欲鑿地道以攻廷柱持不可上責廷柱曰爾爲主將惟怯無鬪志與諸將異議爾豈因

兒子被創故驚怖不欲戰耶廷柱惶恐對曰臣昔嘗巡邏至此知地中有水石不可穿且亦不能越壕而過故不敢不言今衆皆謂可攻臣焉敢獨異乃與有德等鳩役於城南鑿地道初祖大壽既降請得入錦州乃復叛爲明守至是聞松山急遣蒙古兵三百乘夜入城諷得我軍謀多爲備地道不能達乃罷攻師還部議廷柱攻城不盡力當罷任罰緩上仍命宥之時烏眞超哈復析爲八旗合二旗爲一固山於是漢軍旗制始定廷柱隸正白旗六年七月廷柱上言錦州爲遼左首鎮我師築壘浚濠誓必剪滅以策進取誠至計也第明恃大壽爲保障我師圍之急彼必益發援兵併力一戰宜及此時簡精銳分布各旗屯田所遇警卽並進如敵已立營以砲環擊伺其稍動我師卽突起乘之轉戰過錦州至松山杏山間敵必敗走則錦州破矣錦州旣破關外八城聞而震動昔年克瀋陽遼陽從之下克沙嶺廣甯亦從之下此其明徵也近聞喀爾喀扎薩克圖揚言取歸化恐陰欲取鄂爾多斯臣擬令鄂爾多斯移牧黃河南使與歸化相接彼此策應仍選才勇將士挾火器戍焉而令王貝勒帥師道宣大略應州

雁門歸化有警輕騎倍道赴援明所恃爲遼東援者不過宣大陝西榆林甘肅
寧夏諸路我師西入諸路自顧不遑豈能復出援遼哉此一舉而兩得也明援
兵自寧遠至松山所齎行糧不過六七日其鋒少挫勢必速退卽宿留數日終
且託糧盡而返宜設伏於高橋險陬處鑿壕截擊仍發勁兵綴其後使進退無
路則彼援兵皆折而降我矣我師遇敵步兵每奮勇陷陳彼軍多火器恐致傷
夷宜調敵遠離城郭或憑據高阜水竭糧匱乃環而攻之夜則鑿壕以守晝則
發砲以擊不一二日勢且生變其斃可坐俟也洪承疇書生耳所統援遼諸鎮
皆烏合亡命外張聲勢內實恇懦如大壽爲我師所破承疇與諸將縱得脫去
亦東市就僇而已彼聞上恩豢降將或慕義納款亦未可料今明災異迭見流
寇方熾乘時應運定鼎中原機不可失疏入上深嘉之九月師圍松山敵夜犯
廷柱營廷柱力禦斬十餘級獲刀甲鎗砲無算進二等昂邦章京七年定漢軍
八旗置八固山以廷柱爲鑲紅旗固山額眞順治元年四月從師入關破李自
成五月與固山額眞巴顏等平昌平土寇六月與固山額眞巴哈納帥師撫定

山東諸郡縣七月移師會固山額真葉臣共克太原山西河南悉平師還賜白金五百兩進一等昂邦章京四年改一等精奇尼哈番六年從討叛將姜瓖復渾源太谷朔州汾州十二年五月授鎮海將軍駐防京口十四年二月以老乞休加少保兼太子太保致仕進三等伯世襲十八年二月卒贈少傅兼太子太傅諡忠勇立碑記績廷柱兄國柱亦自廣甯降與天柱先後授三等副將廷柱六子三子華善四子石琳自有傳

馬光遠順天大興人明建昌參將天聰四年我師克永平光遠以所部降命隸正藍旗授梅勒額真賜冠服鞍馬五年上復伐明圍大凌河光遠從招城南臺降得百總一男婦五十餘即畀光遠育焉六年十一月光遠疏言六部既設當建內閣選清正練達二三臣爲總裁日黎明入閣八家固山六部承政有事詣閣集議請上指揮并議置六科立八道言官翌日再疏申言六科職掌七年正月烏眞超哈昂邦章京佟養性及光遠合疏言上及諸貝勒參漢官恩厚臣等叨冒首領上有命敢不竭心力臣等有罪聽諸臣彈劾諸漢官如或抗令欺公

誑言誤事諉避偷安玩法科歛臣等當彈劾不敢避忌惟慮諸漢官茹怨以蜚語中臣等臣等得罪雖死不知其故乞上及諸貝勒鑒臣等意今後有過失即時處分有讒言即時質問俾僉邪不得行其險慝三月光遠疏陳整飭軍政省戎器視牧馬習砲治砲車節火藥謹城守制火箭建藏砲儲藥之局贍鑄砲造藥之役厚養砲兵凡十事七月上命舊隸滿洲戶下漢人十丁授棉甲一得千五百八十人命光遠等統之分補舊甲喇缺額時孔有德耿仲明來降克旅順光遠言有德等初來登萊旅順并各島兵艦隨至江口不敢歸畏明法也今旅順既失江口兵艦必退保登萊宜急遣水師逐彼舟後乘風而西上親帥師取山海進攻北京不半載大事可定十月授一等總兵官八年三月疏請出師一自蘄東入一自八里鋪趨山海關內外夾攻先取其水關則山海關易下也既克山海關還取祖大壽整旅而西進攻北京塞衝要阻運道不數月必有內變但乞上於出師之日戒諭將士毋殺毋淫毋掠貨財毋焚廬舍四方聞之皆引領而歸上矣四月改一等昂邦章京九年七月甄別轄治漢人各官以各堡戶

丁增減行賞罰丁減初額三之一者削世職爲民光遠疏言各官功次不等皆蒙敕賜世襲得之至艱今以養人不如法皆罷爲民衆情驚懼乞恩從重議罰而毋遽奪世職令戴罪視事使功不如使過臣爲王法持平敢昧死以請梅勒額眞張存仁亦以爲言上從之十年四月諸臣勸進漢將列孔有德耿仲明尙可喜石廷柱及光遠凡五人崇德元年十二月從伐朝鮮克平壤江華島二年八月分烏眞超哈爲兩翼置固山額眞二以廷柱轄左翼光遠轄右翼三年上伐明攻錦州烏眞超哈運火器爲前驅尋與有德以火器克臺五復與廷柱克李雲屯柏土屯郭家堡開州井家堡俘七百有三得牲畜稱是光遠率甲喇額眞郎紹貞圍攻錦州城旁臺敵遁不追擊上詰之光遠妄辨當奪職上命罰鍰四年上復伐明光遠以所部克松山西南隅臺降其將楊文選攻城不克語詳石廷柱傳師還數其罪而罷之又以庇所部參將李世昌鑄礮子不中程論死上特宥之六月析烏眞超哈爲八旗置固山額眞四復起光遠爲正黃鑲黃兩旗固山額眞漢軍旗制定光遠隸鑲黃旗順治四年以老病乞休康熙二年卒

諡誠順以弟之子思文襲爵恩詔進三等伯乾隆初定封一等子光輝光遠弟明武舉與其兄光先從光遠來降天聰七年授光先二等參將光輝游擊崇德三年任戶部理事官以貸官商物不償罷官奪世職四年六月漢軍旗制定授鑲黃旗梅勒額真六年兼任吏部七年以從克杏山城復世職師已克錦州命光輝從固山額真孟喬芳詣錦州監鑄砲八年以從克中後前屯衛二城進一等甲喇章京世祖入關定鼎參政改待郎光輝仍貳吏部四年考滿加拖沙喇哈番五年從征南大將軍譚泰討江西叛將金聲桓聲桓既誅譚泰將承制授光輝江西提督光輝辭既譚泰欲以都察院理事官紀國先爲都司國先亦辭譚泰劾國先辭連光輝吏議從重比上命罷光輝梅勒額真侍郎降世職爲拜他喇布勒哈番七年復任梅勒額真八年上命追錄光輝軍功屢遇恩詔累進三等阿思哈尼哈番五月授戶部侍郎十月命以兵部尙書右副都御史總督直隸山東河南三行省十年九月膠州總兵海時行叛爲暴萊沂間光輝帥師討之時行走宿遷師從之復走永城光輝會漕運總督沈文奎帥師自靈璧向

永城戰洪河集西大破之縛時行以歸以功加級任子十一年甄別諸督撫加太子少保以老病乞休十二年七月卒諡忠靖光先順治間遇恩詔亦授三等阿思哈尼哈番官山西左布政使

李思忠字葵陽鐵嶺人父如樾明遼東總兵官寧遠伯成梁族子也仕明爲太原同知罷歸居撫順太祖天命三年始用兵於明克撫順得思忠如樾徙還鐵嶺明年師下鐵嶺如樾及弟如梓子一忠存忠死之六年定遼陽敕思忠收其族人俾復故業即授牛录額眞予世職備禦尋以獲謀進游擊天聰三年太宗自將伐明取永平等四城師還貝勒阿敏護諸將分守察哈喇以蒙古兵守遵化思忠及甲喇額眞英固勒岱等爲之佐既而明將謝尙忠等來攻思忠與戰敵三進三却阿敏議棄四城東還檄察哈喇合軍出塞時尙忠攻遵化正急發火箭焚我軍火器我軍方恇擾思忠戒無輕動徐結陳出城挾降吏四人以俱身爲殿出塞無一亡失師還上譴阿敏等以思忠力戰貸勿罪五年從固山額眞楞格里等伐明攻南海島未至遇明兵茨榆垞俘十一人得舟五明兵爭舟

思忠與戰炮傷額勿却卒敗明兵進二等參將九年察漢官所領城堡戶口盈耗思忠轄沙河堡郎塞增丁百十有三上嘉賞賜狐裘一襲進三等梅勒章京尋命駐蓋州崇德二年命修遼陽諸城思忠疏言蓋州處邊士卒任防守餘丁僅足以耕今棄農就役工窳而農亦廢請俟諸城工竟比役造甄從事上允其請七年漢軍旗制定隸正黃旗順治元年從豫親王多鐸徇陝西破潼關下江南克揚州撫定江北州縣凡十三二月命以梅勒額眞戍西安三月擢陝西提督恩詔累進一等阿思哈尼哈番兼拖沙喇哈番十一年致仕十四年七月卒思忠子五第三子顯祖襲爵世祖賜名塞白理授二等侍衛甲喇額眞康熙初授隨征江南左路總兵官遷廣東水師提督改浙江提督耿精忠叛自福建侵浙江塞白理疏請分兵援台州防寧波尋從貝子傅喇塔擊走精忠將曾養性十四年九月卒於軍乾隆初定封三等男蔭祖思忠次子事世祖自廕生授戶部員外郎三遷兵部侍郎順治十一年直隸災命與尙書巴哈納等治賑尋授兵部尙書右副都御史總督直隸山東河南三行省疏請蠲被災諸州縣秋糧

招流民還故里當隨地安集以時予賑毋使道殍又疏言直隸濱海北塘澗河黑洋諸地宜分兵駐守時議禁海船魚鹽米麥不能轉輸請官爲編號譏其出入則商民皆便並下部議行十四年四月疏發河南管河道方大猷貪恠狀上切責河道總督楊方興失効奪大猷官鞫治論死有高鼎者據五臺山爲亂出三岔口擾眞定蔭祖遣井陘道陳安國諭降悉散其黨疏言太行天下險三岔居其衝林密山深藏姦甚易自鼎降其黨散在民間雖戍以兵視營壘爲傳舍當置游擊一定額兵六百耑司守禦上從之是歲蔭祖年才二十有九會湖南北用兵上察蔭祖才加太子太保移督湖廣師方徇貴州故李自成諸將郝永忠袁宗第劉體純李來亨輩挾十餘萬人降於明踞鄖襄間擾饜道蔭祖請選襄陽水師及均黃漢陽諸營兵二千人戍穀地扼上游選武昌洞庭營兵千人戍九谿斷通蜀道十五年漢陽天門潛江沔陽諸郡縣水災上命蔭祖治賑民賴以得拯十六年經略大學士洪承疇疏請發湖北提鎮標兵六千人戍雲南蔭祖以承疇已發湖廣兵萬三千五百有奇湖南新收降人數萬鄖襄間流賊

未殄留兵不宜復發請敕承疇就滇中召募下部議行復疏議討永忠等請敕四川總督李國英帥帥駐重慶扼巫峽阻達州西安將軍富喀禪帥師趨興安河南協剿兵詣襄陽合軍臣督諸軍分出彝陵襄陽鄖陽三道深入期一舉滅賊疏既上會鄭成功犯江南詔將軍明安達哩將荊州駐防兵赴援部議緩師期十七年以疾乞罷康熙三年卒祀直隸山東河南湖廣名宦銜蔭祖子事聖祖自佐領授兵部員外郎十三年以參將從征吳三桂再遷御史二十七年湖廣夏逢龍爲亂上授銜湖北按察使累擢兵部侍郎三十五年上親征噶爾丹命與左都御史于成龍等督饗三十七年授山東巡撫以疾辭改授安徽巡撫三十九年疾未瘳被彈事罷四十二年山東饑銜請往助賑卒於賑所金玉和遼東人仕明爲開原千總太祖克開原玉和降授甲喇額眞予世職三等副將漢軍旗制定隸正黃旗天聰五年擢禮部承政六年上閱兵玉和與額駙佟養性等率所轄烏眞超哈攬甲列陳試炮上賚以鞍馬八年考績進二等副將崇德元年坐與吏部參政李延庚互舉子弟罷官降世職三等甲喇章京

二年從武英郡王阿濟格伐明皮島以水師戰不利玉和不赴援論死上特宥之但削世職四年復授甲喇額眞六年從圍明錦州屢敗敵敵夜攻壕塹擊卻之斬級五十七年錦州下并克塔山予世職牛彖章京八年從鄭親王濟爾哈朗伐明寧遠與國光同克前屯衛中後所二城順治元年擢工部參政敘寧遠功進三等甲喇章京既入關遷梅勒額眞從軍河南署懷慶總兵官時李白成竄陝西餘黨掠河南犯濟源縣城玉和帥師往援至則城已陷夜半遇賊力戰中流矢沒於陳河南巡撫羅繡錦疏報得玉和遺骸於柏鄉西請賜卹進二等梅勒章京乾隆初定封二等男金維城玉和子也崇德初師攻錦州維城以甲喇額眞奉命與梅勒額眞金礪督饗屢從伐明有功克中後所前屯衛二城維城亦在行間累官正白旗漢軍梅勒額眞兼兵部參政世職至牛彖章京從入關改兵部侍郎兼梅勒額眞如故四年改拜他喇布勒哈番考績加拖沙喇哈番復從定湖廣同克武岡沅州靖州進一等阿達哈哈番調正黃旗漢軍梅勒額眞十年坐總兵任珍行賕罷官降世職爲三等十五年卒子世礪康熙間以

佐領從平南大將軍賚塔征福建敗敵江東橋鄭成功將劉國軒攻漳州世礪戰死予世職拖沙喇哈番太祖克開原玉和與同官王一屏戴集賓白奇策守堡百總戴一位降下廣寧游擊孫得功守備張士彥黃進石廷柱千總郎紹貞陸國志石天柱降收遼河諸城堡參將劉世勳游擊羅萬言何世延閻印都司金礪劉式章李維龍王有功陳尚智備禦朱世勳黃宗魯中軍王志高守堡閔雲龍俞鴻漸鄭登崔進忠李詩徐鎮靜鄭維翰臧國祚周元勳王國泰各以所守城堡來降玉和一屏得功士彥廷柱礪皆以有功授世職廷柱自有傳王一屏先世本滿洲姓完顏氏初降授牛彖額眞漢軍旗制定隸正紅旗天聰八年授世職三等甲喇章京旋卒子國光以牛彖額眞兼戶部理事官襲職擢正紅旗漢軍梅勒額眞兼戶部參政八年從鄭親王濟爾哈朗伐明克前屯衛中後所二城進二等甲喇章京順治元年改戶部侍郎兼梅勒額眞如故從定西大將軍和洛輝禦寇西安考滿進一等阿達哈哈番遷本旗固山額眞六年從英親王阿濟格討叛將姜瓖克左衛朔州汾州太谷四城敘功遇恩詔累進一等

阿思哈尼哈番十年從定遠大將軍貝勒屯齊征湖廣敗擊明將李定國孫可望十二年從寧海大將軍伊勒德援浙江擊敗明將鄭成功張名振十三年二月授兩廣總督諭獎其才品賜蟒服鞍馬加太子太保十五年以疾解任十八年聖祖卽位授鎮海將軍帥師鎮潮州康熙三年與平南王尙可喜會師討碣石叛將蘇利師至海豐偵破敵伏逕燈籠山蘇利乘我軍未成列以萬餘人搏戰我軍左右夾擊賊潰遁薄碣石衛城環攻拔之斬蘇利及所部陳英李慧等遂殲其餘黨五年還京仍任本旗都統九年卒謚襄壯子永譽字孝揚襲爵十二年授河南提督河北總兵蔡祿叛應吳三桂內大臣阿密達帥師討之上命永譽如懷慶拊循士卒因請留駐鎮撫旋設安慶提督以授永譽耿精忠將宋標方自饒州犯徽州十四年永譽督兵駐建德令參將傅爾學破標於餘干俘標磔於市尋移駐徽州十七年江西平改永譽江南提督駐松江十九年遷廣東將軍二十年疏言廣東瀕海陸路兩鎮請各以一營改練水師二十二年復請留滿洲兵四千駐防廣東省城皆如所議行二十七年授本旗都統二十三

年三月命定北將軍瓦岱帥師屯張家口調噶爾丹以永譽與都統喀岱等參贊軍務三十五年上親征噶爾丹分漢軍爲四營永譽帥正黃正紅二旗出中路噶爾丹不戰遁永譽與平北將軍馬斯喀督兵追躡偵噶爾丹行遠乃還三十六年從上至寧夏命督饗運貯黃河西岸聞噶爾丹竄死罷還四十二年卒乾隆十八年命其族改隸滿洲正紅鑲白二旗孫得功在明爲廣寧巡撫王化貞中軍游擊化貞倚得功爲心膂太祖圍西平堡劉渠等赴援令得功從渠等戰死得功潛納款於太祖還言師已薄城城人驚潰化貞走入關得功與進紹貞國志等率士民出城東三里望昌岡具乘輿設鼓樂執旗張蓋迎太祖入駐巡撫署士民皆夾道俯伏呼萬歲時天命七年正月庚申月之二十四日也上授得功游擊隸鑲白旗轄降衆移駐義州天聰六年十月得功疏言上命修城天寒土凍徒勞民力而不能堅固請俟春融又上發帑畀官兵市布製冬衣官已足用兵人給銀五錢六分得布不足以爲衣乞恩使人得市布一二疋官兵均霑上澤七年四月又疏言禁淡巴菰令未能行步兵皆用火器尤宜申諭戒

革上令民輸糧因禁百穀不得入市貧民無所得食則宜任民便天聰八年追敘得功廣寧功授三等梅勒章京旋卒以其子孫有光襲漢軍旗制定改隸正白旗以從克前屯衛中後所及順治間討姜瓖有功并遇恩詔進三等精奇尼哈番卒乾隆初定封一等男得功次子思克自有傳張士彥化貞中軍守備太祖兵至化貞走入關士彥降漢軍旗制定隸正藍旗天聰八年與一屏同授三等甲喇章京旋乞休子朝璘襲職崇德七年授牛录額眞從貝勒阿巴泰伐明敗敵於膠州八年與國光同功進二等甲喇章京遷兵部理事官順治二年從豫親王多鐸下江南克揚州江陰率兵戍蘇州擊敗明將黃斐四年從恭順王孔有德等平湖南破明將劉承胤於夕陽橋克武岡復破明將張先璧於黔陽克沅州六年從討姜瓖復與國光同功考滿遇恩詔進一等阿思哈尼哈番授正藍旗漢軍梅勒額眞十年授都察院左副都御史十三年遷戶部侍郎尋出爲江西巡撫江西當金聲桓亂後民少田蕪御史笄重光請蠲賦下朝璘議朝璘疏言田畝荒蕪惟從容勸墾則熟者恒熟荒者不終荒若急於徵賦則始以

荒爲熟漸至熟者仍荒非足國恤民計也南昌瑞州二府新墾田四十餘頃請三年後起科未墾二千餘頃請與豁除上允其請十五年加兵部尙書銜十八年擢江西總督康熙二年右布政使王庭疏請減南昌府屬浮糧下朝璘議朝璘疏言江西重賦自陳友諒始明世因之前巡撫蔡士英請減袁瑞二府賦額未及南昌南昌諸州縣惟武寧爲友諒鄉里賦額循元宋之舊他六縣一州請敕部核減戶部覈上南昌府屬浮糧銀十二萬五千有奇米十四萬九千有奇上命悉蠲之三年朝璘疏言吉安舊食粵鹽遠且阻請改食淮鹽下所司從之四年以江西總督省入江南解任五年授福建總督六年以老疾乞休越十餘年卒金礪遼東人明武進士爲鎮武堡都司初降授甲喇額眞子世職三等副將天聰五年始設六部以礪爲兵部承政六年上閱兵與玉和等并賜鞍馬調戶部承政八年考績進二等梅勒章京崇德二年從伐明攻皮島甲喇額眞巴雅爾圖等先入敵陳礪與副將高鴻中所將水師不進前軍以是敗坐論死上以礪與鴻中來歸有功特宥之四年漢軍旗制定礪隸鑲紅旗復爲甲喇額眞

五年授吏部參政六年擢固山額真迭克松山塔山前屯衛中後所授世職三等甲喇章京順治元年從入關五月與梅勒額真李率泰安集天津亂民六月復與固山額真葉臣宣撫山西時李自成西遁其將陳永福猶據太原礪與葉臣潛往覘焉城兵驟出礪擊敗之督本旗兵發砲克其城師還賜白金四百兩進世職二等甲喇章京二年從順承郡王勒克德渾征湖廣明將馬進忠降復叛礪與固山額真劉之源擊進忠武昌奪戰艦六十餘遂下湖南戰衡州斬明將黃朝宣復戰長沙斬明將楊國棟師還賜黃金二十兩白金四百兩進世職一等阿達哈哈番六月授平南將軍鎮浙江遇恩詔加拖沙喇哈番明魯王以海及其臣阮進張名振屯舟山礪與梅勒額真吳汝玠等率兵自寧波出定海會總督陳錦破獲進於橫洋遂克舟山名振擁以海出走九年鄭成功攻漳州命礪帥師赴援至泉州成功退屯江東橋礪自長泰進屯漳州城北分兵萬松關爲犄角七戰皆勝漳州圍解海澄南靖漳浦諸縣悉定敍功遇恩詔進一等阿思哈哈番兼拖沙喇哈番十一年授陝西四川總督十三年引年乞休加太

子太保致仕康熙元年卒

論曰養性廷柱先世本滿洲懷舊來歸申以婚媾永芳歸附最先思忠爲遼左
右族皆蒙寵遇各有賢子振其家聲光遠初佐養性後與廷柱分將漢軍罷而
復起玉和戰死同時諸降將有績效賞延於世或其子顯者得以類從後先奔
走才亦盛矣

... (The text in this block is extremely faint and illegible due to the quality of the scan. It appears to be a continuous column of vertical text, likely a historical record or a list of events.)

清史稿

列傳十九

希福

子帥顏保
曾孫嵩壽

范文程

子承勳
時紀

承斌
會孫宜

孫恆
時四

孫捷
世建

中時
綬

甯完我

鮑承先

希福赫舍里氏世居都英額再遷哈達太祖既滅哈達希福從其兄碩色率所部來歸居有頃以希福兼通滿漢蒙古文字召直文館屢奉使蒙古諸部賜號巴克什旗制定隸滿洲正黃旗天聰二年太宗伐察哈爾以希福使科爾沁徵兵土謝圖額駙奧巴止之曰寇騎塞路行將安之即有失誰執其咎希福曰君命安得辭死則死耳事不可誤也遂行再宿達上所復命曰科爾沁兵不赴徵土謝圖額駙奧巴方率所部行掠掠竟乃來耳上怒使希福再往以壯士八人從行四晝夜道遇敵擊殺三十餘人卒至科爾沁以其兵來會明年奧巴來朝上命希福與館臣庫爾禪輩責讓之奧巴服罪上駝馬以謝叙功授備禦從伐明薄明都敗明兵於城下攻大凌河援兵自錦州至與譚秦爭先奮擊破之師

還又力戰敗追兵進游擊崇德元年改文館爲內三院希福爲內國史院承政尋授內弘文院大學士進二等甲喇章京二年請禁造言惑衆違者罪之著爲令三年偕大學士范文程建言定部院官制希福雖以文學事上官內院筦機務然常出使察哈爾喀爾喀科爾沁諸部編戶口置牛彘頒法律亭平獄訟時或詣軍前宣示機宜相度形勢覈諸將戰閔行賞諭上德意於諸降人每還奏未嘗不稱旨也順治元年譯遼金元三史成奏進世祖恩賚有加希福故與譚泰有隙屢誚其衰慵譚泰睚附攝政睿親王多爾袞因與其弟譚布構希福妄傳王語謂堂餐過侈詆謾諸大臣構釁亂政罪當死王命罷官削世職並籍其家八年二月世祖親政雪其枉仍授內弘文院大學士復世職九年世祖以希福事太祖太宗銜命馳驅殫心力曩定鼎燕京希福方削籍功未賞乃一歲三進爲三等精奇尼哈番世襲是年十一月卒贈太保諡文簡長子奇塔特襲職乾隆初定封三等子帥顏保希福次子康熙初聖祖念希福事先朝久躬預佐命用大學士范文程額色黑例超授內國史院學士八年六月遷吏部侍郎七

月授漕運總督九月疏言淮安水陸孔道乃十五里中爲關者三板間有鈔關
淮安有倉稅隸戶部清江有稅廠隸工部胥役繁冗商民耗資失時請減三爲
一合併稅額省胥役便商民下部議戶部言倉稅併鈔關便工部言稅廠征船
料諸稅葺治漕船併鈔關不便上心蹙帥顏保言下九卿科道再議卒如所請
九年正月疏言淮揚被水高郵宿遷桃源鹽城贛榆災尤重舊通漕米例當補
征民力不能勝下部議請改折仍補征上以諸縣頻歲被災民重困下部再議
免舊通漕米三萬一千石有奇十二年正月偕河道總督王光裕疏請漕運畢
事當復舊例舉劾所屬文武官吏既得請疏薦山東糧道遲日巽河南糧道范
周無錫知縣吳興祚等劾溧陽知縣王錫范等十三年吳三桂兵犯江西十月
命帥顏保帥所部移鎮南昌十二月安親王岳樂師至命罷還十七年岳樂進
軍湖南復命鎮南昌九月移吉安十八年三月招降吳三桂部將五十餘兵萬
餘十九年八月逮尙之信勘治命帥顏保移鎮南雄韶州十月命罷還二十年
五月遷工部尙書十二月移禮部尙書二十三年十二月卒子赫奕自侍衛累

清史稿
遷工部尙書嵩壽希福曾孫雍正元年進士選庶吉士授編修乾隆二年冊封安南國王黎維禕以侍讀充正使賜一品服累擢內閣學士十四年頒詔朝鮮擢禮部侍郎十九年襲一等子爵二十年卒

范文程字憲斗宋觀文殿大學士高平公純仁十七世孫也其先世明初自江西謫瀋陽遂爲瀋陽人居撫順所曾祖總正德間進士官至兵部尙書明史有傳文程少好讀書穎敏沉毅與其兄文案並爲瀋陽縣學生員天命三年太祖旣下撫順文案文程共謁太祖太祖偉文程與語器之知爲總曾孫顧謂諸貝勒曰此名臣後也善遇之上伐明取遼陽度三岔攻西平下廣甯文程皆在行間太宗即位召直左右天聰三年復從伐明入薊門克遵化文程別將偏師徇潘家口馬蘭峪三屯營馬欄關大安口凡五城皆下旣明圍我師大安口文程以火器進攻圍解太宗自將略永平留文程守遵化敵掩至文程率先力戰敵敗走以功授世職游擊五年師圍大凌河降其城而蒙古降卒有陰戕其將叛去者上怒甚文程從容進說貸死者五百餘人時明別將壁西山之巔獨負險

堅守未下文程單騎抵其壘諭以利害乃請降上悅以降人盡賜文程六年從上略明邊文程與同直文館甯完我馬國柱上疏論兵事以爲入宣大不若攻山海及師至歸化城上策深入召文程等與謀文程等疏言察我軍情狀志皆在深入當直抵北京決和否毀山海關水門而歸以張軍威若計所從入惟雁門爲便道既無阻道旁居民富庶可資以爲糧上如慮師無名當顯諭其民察哈爾汗遠遁所部歸於我道遠不可以徒行來與爾國議和假爾馬以濟我新附之衆和議成償馬值不成異日興師荷天之寵以版圖歸我凡軍興而擾及者當量免賦稅數年此所謂堂堂正正之師也否則作書抵近邊諸將吏使以議和請於其主爲期決進止彼朝臣內撓邊將外諉遷延逾所期我師即乘釁而入我師進利在深入否利在速歸半途而返無益也疏入上深嘉納之七年孔有德等使通款而明兵迫之急上命文程從諸貝勒帥師赴援文程宣上德意有德等遂以所部來歸自是破旅順收平島討朝鮮撫定蒙古文程皆與謀崇德元年改文館爲內三院以文程爲內秘書院大學士進世職二等甲喇章

京初旗制既定設固山額真諸臣議首推文程上曰范章京才誠勝此然固山職一軍耳朕方資爲心膂其別議之文程所典皆機密事每入對必漏下數十刻始出或未及食息復召入上重文程每議政必曰范章京知否脫有未當曰何不與范章京議之衆曰范亦云爾上輒署可文程嘗以疾在告庶務填委命待范章京病已裁決撫諭各國書敕皆文程視草初上猶省覽後乃不復詳審曰汝當無謬也文程迎父楠侍養嘗入侍上食有珍味文程私念父所未嘗遽巡不下箸上察其意卽命徹饌以賜楠文程再拜謝世祖卽位命隸鑲黃旗睿親王多爾袞帥師伐明文程上書言中原百姓蹇離喪亂備極荼毒思擇令主以圖樂業曩者棄遵化屠永平兩次深入而復返彼必以我爲無大志惟金帛子女是圖因懷疑貳今當申嚴紀律秋毫勿犯宣諭進取中原之意官仍其職民復其業錄賢能恤無告大河以北可傳檄定也及流賊李自成破明都報至文程方養疴蓋州湯泉驛召決策文程曰闖寇塗炭中原戕厥君后此必討之賊也雖擁衆百萬橫行無憚其敗道有三逼殞其主天怒矣刑辱搢紳拷劫財

貨士忿矣掠人貲淫人婦火人廬舍民恨矣備此三敗行之以驕可一戰破也
我國上下同心兵甲選練聲罪以臨之卹其士夫拯其黎庶兵以義動何功不
成又曰好生者天之德也古未有嗜殺而得天下者國家止欲帝關東則已若
將統一區夏非又安百姓不可翌日馳赴軍中草檄諭明吏民言義師爲爾復
君父仇非殺爾百姓今所誅者惟闖賊吏來歸復其位民來歸復其業師行以
律必不汝害檄皆署文程官階姓氏旣克明都百度草創用文程議爲明莊烈
愍皇帝發喪安撫子遺舉用廢官蒐求隱逸甄考文獻更定律令廣開言路招
集諸曹胥吏徵求冊籍明季賦額屢加冊皆燬於寇惟萬歷時故籍存或欲下
直省求新冊文程曰即此爲額猶慮病民其可更求乎於是議遂定論功並遇
恩詔進一等阿思哈尼哈番加拖沙喇哈番賜號巴克什復進二等精奇尼哈
番二年江南旣定文程上疏言治天下在得民心士爲秀民士心得則民心得
矣請再行鄉會試廣其登進從之五年正月定內三院爲文臣班首命文程及
剛林祁充格用珠項玉帶七年睿親王多爾袞卒八年大學士剛林祁充格以

附睿親王安改太祖實錄坐死文程與同官當連坐上以文程不附睿親王命但奪官論贖是歲卽復官九年遇恩詔復進世職一等精奇尼哈番授議政大臣監修太宗實錄時直省錢糧多不如額一歲至闕四百餘萬賦虧餉絀文程疏言湖廣江西河南山東陝西五省亂久民稀請興屯設道二同知四令督撫選屬吏廉能敏幹者任之以選吏當否爲督撫功罪官吏俸廩初年出興屯母財次年以所穫償自後皆出所穫官增而俸不費屯用牛若穀種若農器聽興屯道發州縣倉庫以具屯始駐兵地荒蕪多而水道便者以次及其餘地無主若有主而棄不耕皆爲官屯民願耕而財不足官佐以牛若穀種分所穫三之一三年後爲民業編保甲使助守望絕奸宄若無財官畀以傭值民將道饑流亡當大集初年所穫糧草聽屯吏儲留出陳易新爲次年母財有餘畀近屯駐軍勿爲額以取盈二年所穫寢多僦舟車運以饋饗毋煩屯吏母役屯民母用屯牛屯所在州縣吏受興屯道指揮屯吏稱其職三歲進二秩視邊俸不職責撫按糾舉有所徇則併坐所謂信賞必罰也上深韙其議十年復與同官疏請

敕部院三品以上大臣各舉所知毋問滿漢新舊毋泥官秩高下毋避親疏恩
怨舉惟其才各具專疏臚舉實蹟置御前以時召對察其論議覈其行事並視
其舉主爲何如人則其人堪任與否上早所深鑒待闕簡用稱職量效之大小
舉主同其賞不稱職量罪之大小舉主同其罰上特允所請上勤於政治屢幸
內院進諸臣從容諮訪文程每以班首承旨陳對稱上意嘗值端陽諸臣散直
差早上曰乘藉天休猥圖安樂人情盡然特欲逸必先勞俾國家大定其樂方
永不然樂亦暫耳復言人孰無過能改之爲美成湯盛德改過不吝若明武宗
嬉游無度諉罪於其臣豈修己治人之道耶文程因奏君明臣良必交勉釋回
始克荷天休濟國事上曰善自今以往朕有過卽改卿等亦宜黽勉毋忘啟沃
可也上嘗命遣官蒞各省恤刑文程言前此遣滿漢大臣巡方慮擾民故罷今
四方水旱災傷民勞未息宜罷遣使見禁重囚令各省巡撫詳勘有可矜疑奏
聞裁定上從之文程論政務簡要持大體多類是十一年八月上加恩輔政諸
臣特加文程少保兼太子太保文程疏謝因自陳衰病乞休九月上降溫諭進

太傅兼太子太師致仕上以文程祖宗朝舊臣有大功於國家禮遇甚厚文程疾嘗親調藥餌以賜遣畫工就第圖其象藏之內府資御用服物多不勝紀又以文程形貌頎偉命特製衣冠求其稱體聖祖卽位特命祭告太宗山陵伏地哀慟不能起康熙五年八月庚戌卒年七十一上親爲文遣禮部侍郎黃機諭祭賜葬懷柔紅螺山立碑紀績諡文肅御書祠額曰元輔高風文程子承廕承謨承勳承斌承烈承祚承謨自有傳承勳字蘇公文程第三子也以任子歷官御史郎中康熙十九年譚弘叛聖祖命承勳與郎中額爾赫圖如彝陵趣將軍噶爾漢戰並督湖廣轉粟餼軍二十年師進攻雲南命趣軍督饗如故二十二年還京監崇文門稅二十三年上命九卿舉廉吏承勳與焉遷內閣學士二十四年授廣西巡撫疏免容縣鬱林州追徵陷賊後逋賦定諸屬徵米本折兼納二十五年擢雲貴總督疏定雲南援勦兩協駐軍地裁貴州衛十五所十改併州縣並增設縣七二十七年湖廣兵亂雲南時歲鑄錢錢壅積軍饗十之三皆予錢軍勿便會移左協赴尋甸遂鼓譟爲變省城兵亦將起應承勳誅其渠二十

一人亂乃弭遂疏罷雲南鑄錢以銀供饗二十八平番阿所殺土目魯姐走匿東川土婦安氏所恒出掠爲民害事聞上命郎中溫葆會承勳等如東川檄安氏獻阿所斬之雲南自吳三桂亂後康熙二十一年訖二十七年逋屯賦當補徵承勳疏請分年附徵上命悉蠲之二十九年疏定雲南秋糧本折兼納貴州提督馬三奇請軍饗折銀承勳疏言折賤困兵折貴病民宜以時損益秋成各府察市值本折兼納三十一年疏設永北鎮罷洱海營增置大理府城守將吏三十二年入覲三十三年遷都察院左都御史六月江南江西總督傅拉塔卒上難其人以授承勳並諭承勳堅定平易當勝此任承勳上官疏移鳳陽關監督駐正陽關江西民納糧出資俾吏輸省城謂之腳價尋以違例追入官承勳疏請罷追部議不可上特允其請江南地卑濕倉穀易朽蠹承勳疏請江蘇安徽諸州縣歲春夏間以倉穀十二三平糶出陳易新又以江南賦重疏請州縣經徵分數視續完多寡爲輕重康熙十八年後逋賦分年附徵俾寬吏議紓民力皆如議行三十五年淮揚徐諸府災疏請發省倉米十萬石續借京口留漕

鳳倉存麥治賑民賴以全三十八年授兵部尙書三十九年命監修高家堰隄工四十三年工成加太子太保五十三年卒承勳初授廣西巡撫入辭上誡之曰汝父兄皆爲國宣力汝當潔已愛民毋信幕僚沽名妄作及自雲貴總督入覲上方謁孝陵承勳迎謁米峪口上曰汝父兄先朝舊臣汝兄復盡節朕見汝因思汝兄心爲軫戚不見汝八九年汝鬚髮遂皓白如此郊外苦寒以朕所御貂冠貂鞋狐白裘賜汝汝且勿更衣慮中風寒明日可服以謝聖祖推文程承謨舊恩因厚遇承勳如是時繹承勳子雍正初自佐領三遷爲馬蘭鎮總兵四年命署兩江總督是年遷正藍旗漢軍都統五年移鑲白旗漢軍都統並署總督如故十二月時繹疏請自雍正六年始江蘇安徽各州縣應徵丁銀均入地畝內徵收地丁併徵始此六年授戶部尙書仍署總督時繹在官嘗疏請就通州運河入海處作涵洞以時蓄洩規揚州水利濬海口疏車路白塗海溝諸水泰州運鹽河爲之隄鹽城如皋諸水入海處爲之閘若涵洞釐兩淮鹽政增漕標廟灣鹽城二營兵吏皆下部議行上以蘇松諸處多盜時繹戢盜才絀命以

江蘇七府五州盜案屬浙江總督李衛衛名捕江甯民張雲如以符呪惑衆謀不軌而時繹嘗與往還衛因論劾八年命尙書李永陞會鞫得實誅雲如解時繹任召還京命董理太平峪吉地旋復命協理河東河務河東總督田文鏡復以誤工論劾諭曰朕以范時繹爲勳臣後加以擢用朱鴻緒嘗奏時繹廉至日用不能給朕深爲動念優與養廉後知時繹例所當得未嘗不取朕猶令增糈蓋欲遂成其廉使彈心力於封疆也顧時繹袒私交容姦宄朕復密諭李衛善爲保全且范氏爲大僚者惟時繹及其從弟時捷勳臣後裔漸至零落朕心不忍所以委曲成全之者至矣復命協理河務豈意伏汎危急時繹安坐於旁置國事弁髦視民命草芥負恩瘝職他人尙不可況時繹乎逮治部議坐雲如獄論斬上復特宥之授鑲藍旗漢軍副都統十年授工部尙書兼鑲黃旗漢軍都統十二年罷尙書十三年復以侍衛保柱劾行賄下部議罪尋遇赦乾隆六年卒承斌文程第四子襲一等精奇尼哈番卒時捷承斌子自參領再遷爲陝西甯夏總兵五十七年署陝甘提督雍正元年授陝西巡撫三年遷鑲白旗漢軍

都統五年年羹堯得罪世宗以羹堯嘗舉時捷及羹堯敗事連時捷罷都統授侍衛八年授散秩大臣護陵寢是時時捷從兄時繹以協理河東河務誤工罷黜世宗以文程諸孫無爲大僚者命時捷署古北口提督直隸總兵官聽節制詔勉以改過旋移陝西固原提督乾隆元年例改一等子二年以病召還授散秩大臣三年卒建中時捷孫襲一等男自副參領再遷副都統侍郎嘉慶四年授戶部尚書署正黃旗漢軍都統尋改都察院左都御史出爲杭州將軍五年卒諡恪慎時綬文程諸孫雍正間自筆帖式累遷至戶部郎中乾隆初復累遷至湖北布政使十六年署湖南巡撫疏言湘陰益陽諸縣察有私墾千餘頃皆瀕洞庭歲旱方穫請緩升科洞庭諸私垵窒水道勸禁增築報可十八年移江西巡撫病免二十一年起授戶部侍郎署都統請赴西路屯田二十四年副都統定長劾時綬役兵漁利遣使就讞時綬未嘗役兵特其僕從藉事求利命奪官交定長責自效二十六年授頭等侍衛遷鑲藍旗漢軍副都統吏部侍郎哈爾沙爾辦事三十一年遷左都御史仍留哈爾沙爾辦事三十二年授湖北巡

撫入對上以時綏弱不能任封疆二十三年復授都統左都御史三十五年遷工部尚書明年罷四十七年卒時紀亦文程諸孫乾隆初以任子授工部員外郎四遷署廣東按察使二十五年俸滿入覲諭范氏無大僚授鑲紅旗漢軍副都統二十六年授工部侍郎二十七年疏請就京南諸州縣開田植稻下直隸總督方觀承察土宜酌行屢移倉場戶部禮部諸侍郎四十二年以年衰改副都統尋卒宜恒時授子乾隆中自鑾儀衛整儀衛五遷爲福建福甯鎮總兵四十七年授正藍旗漢軍副都統五十七年授工部侍郎嘉慶元年遷戶部尚書二年卒文程曾孫行又有宜清乾隆間官盛京工部侍郎四世諸孫建豐嘉慶時官吏部侍郎皆以漢軍任滿缺一時稱異數云

甯完我字公甫遼陽人天命間來歸給事貝勒薩哈廉家隸漢軍正紅旗天聰三年太宗聞完我通文史召令直文館完我入對薦所知者與之同升鮑承先其一也尋授參將四年師克永平命與達海宣諭安撫又從攻大凌河及招撫察哈爾皆有功授世職備禦五年七月初置六部命儒臣賜號榜式得仍舊稱

餘稱筆帖式完我遇事敢言嘗議定官制辨服色十二月上疏言自古設官定職非帝王好爲鋪張慮國事無綱紀也置六部慮六部有偏私也置六科慮君心宜啟沃也置館臣慮下情或壅蔽也置通政數事相因缺一不可上不立言官不過謂我國人人得以進言何必言官臣請明辨之我國六部既立曾見有一人抗顏論劾者否似此寂寂豈國中真無事耶舉國然諾浮沉以狡滑爲圓活以容隱爲公道以優柔退縮爲雅重上皇皇圖治亦何樂有此景象也況今日秉政者豈盡循理方正屬僚既不敢非長官局外又誰敢議權貴臣知國中事上亦時得聞知然不過猶古之告密孰若置言官興利除害皆公言之爲愈耶言官既設君身尙須指摘他人更何忌諱苟不至貪污欺誑任其盡言勿爲禁制此古帝王明目達聰之妙術也若謂南朝言官敗壞此自其君鑑別不明非其初定制之不善也我國筆帖式漢言書房朝廷安所用書房官生雜處名器弗定不置通政則下情上壅勵精圖治之謂何也至若服制尤陶鎔滿漢第一急事上遇漢官溫慰懇至而國人反陵轢之漢官不通滿語每以此被辱

有至傷心墮淚者將何以招徠遠人使成一體故臣謂分別服色所繫至大願上勿再忽之也臣等非才惟耿介忠愍至死不變昨年副將高鴻中出領甲喇額真臣具疏請留今游擊范文程又補刑曹諒臣亦不得久居文館若臣等二人皆去豈復得慷慨爲上盡言乎疏入上頗躓之命俟次第舉行六年正月完我疏言昨年十一月初九日自大凌河旋師上豫議今年進取至誠惻怛推心置腹藹然家人父子臣敢不殫精畢思用効駑鈍臣聞千里而戰雖勝亦敗近年將士貪欺之習大異於先帝時更張而轉移之上固切切在念而曾未顯幹旋之術人心不鍊必不得指臂相使之用分軍駐防萬難調停雖諸葛復生無能爲也又况蜂蠆有毒肘腋患生疑貳之祖大壽率甯錦滄夷之衆坐伺於數百里間杞人之見不得不慮及也三月上決策自將伐察哈爾而完我以爲大凌河降卒思遁宜先圖山海還取錦州因上疏諫四月師西出度興安嶺次都勒河偵言林丹汗西走完我與同值文館范文程馬國柱合疏申前議略言師已度興安嶺察哈爾望風遠遁上威名顯赫臣度上且罷西征轉而南入上

憐士卒勞苦不能長驅直入徒携子女囊金帛而歸苟若是大事去矣昔者遼左之誤諉諸先帝永平之失諉諸二貝勒今更將誰諉信蓋天下然後能服天下臣等爲上籌之以爲當令從軍蒙古每人擇頭人三二輩挾從者十餘人從上南入餘悉遣還部然後嚴我法度昭告有衆師行所經戒殺戒掠務種德樹仁宏我後來之路今此出師諸軍士賣牛買馬典衣置裝離家益遠見財而不取軍心怠矣取則又蹈覆轍上豈不曰我厲禁取財其孰敢違上耳目所及或不敢犯耳目所不及孰能保者無問蒙古部長及諸貝勒稍稍擾民怨歸於上此上所當深思者也與其以長驅疲憊之兵入宣大孰若留精銳有餘之力取山海臣等明知失上旨但既見及此不容箝口也是時上已決用兵於宣大五月上駐歸化城召完我等計事完我等疏論機宜語詳文程傳翌日上諭蒙古諸部及諸貝勒申軍律蓋採完我等前疏所陳也七年正月完我疏言近日朝鮮交益疏南朝和未定瀋城不可以常都兵事不可以久緩機會不可以再失漢高祖屢敗何爲而帝項羽橫行天下何爲而亡袁紹擁河北之衆何爲而敗

昭烈屢邁困難何爲而終霸無他能用謀不能用謀能乘機不能乘機而已夫天下大器也可以智取不可以力爭臣請以棋喻能者戰守攻取素熟於胸中百局而百不負至於取天下是何等事而可以草草僥倖耶自古君臣相需先帝時達拉哈轄五大臣知有上不知有人知有國不知有家故先帝以數十人起克成大業上今環觀國中如五大臣者有幾人耶每侍上治事不聞諫諍但有唯阿惟務苟且不肯任勞怨於國何利於上何益釣餌激勸振刷轉移臣望上於日暮間也古人有言騏驥之局促不如駑馬之安步孟賁之狐疑不如庸夫之必至雖有堯舜之智吟而不言不如啞啞之指揮此言貴能行之臣謹昧死上言惟上裁擇完我他所獻替如論譯書謂自金史外當兼譯孝經學庸論孟通鑑諸籍論試士謂我國貪惰之俗牢不可破不當祇以筆舌取人試前宜刷陋習試後宜察素行且六部中滿漢官吏及大凌河將備當悉令入試既可覘此等人才調且令此等人皆自科目出庶同貴此途不相冰炭也論六部治事謂六部本循明制漢承政皆墨守大明會典宜參酌彼此殫心竭思就今日

規模別立會典務去因循之習漸就中國之制度庶異日既得中原不至於自擾昔漢繼秦而王蕭何任造律叔孫通任制禮彼猶是人也前無所因尙能造律制禮今既有成法乃不能通其變則又何也六部漢承政宜人置一通事上亦宜以譯者侍左右俾時召對毋使以不通滿語自諉完我疏屢上上每採其議完我又嘗疏薦李率泰陳錦皆至大用惟論用兵力主自甯錦直攻山海不願出宣大孔有德耿仲明降時完我疏言當收其兵入烏真超哈繼又言有德仲明暴戾無才其兵多曠徒食盡且爲盜皆未當上旨九年二月范文程上言薦舉太濫舉主雖不連坐亦當議罰完我亦疏請功罪皆當並議略言上令官民皆得薦舉本欲得才以任事乃無知者假此倖進兩部已四五十人其濫可見當行連坐法所舉得人舉主同其賞所舉失人舉主同其罪如有末路改節許舉主自陳貸其罪如採此法臣度不三日請罷舉者十當八九其有留者不問皆眞才矣上並嘉納完我久預機務遇事敢言累進世職二等甲喇章京襲六次賜莊田奴僕上駸駸倚任顧喜酒縱博初從上伐明命助守永平以博爲

禮部參政李伯龍及游擊修整所劾上爲誠諭宥之十年二月復坐與大凌河降將甲喇章京劉士英博爲士英奴所訐削世職盡奪所賜仍令給事薩哈廉家是年改元崇德以文館爲內三院希福文程承先皆爲大學士完我以罪廢不得與及世祖定鼎京師起完我爲學士順治二年五月授內宏文院大學士充明史總裁是年及三年六年並充會試總裁又命監修太宗實錄譯三國志洪武寶訓諸書復授二等阿達哈哈番五年二月大學士剛林祁充格得罪完我以知睿親王改太宗實錄未啟奏當奪職鄭親王濟爾哈朗等覆讞以爲無罪得免三月調內國史院大學士命班位祿秩從滿洲大學士例尋授議政大臣十一年三月疏劾大學士陳名夏結黨懷姦臚舉名夏塗抹票擬稿簿刪改諭旨庇護同黨縱子掖臣爲害鄉里凡七事復言從古奸臣賊子黨不成則計不行何則無眞才無實事無顯功故必結黨爲之虛譽欲黨之成附己者雖惡必護異己者雖美必仇行之久而入黨者多若非審察鄉評輿論按其行事則黨固莫可破矣臣竊自念壯年孟浪疏庸辜負先帝一廢十年皇上定鼎始得

隨入禁地謹守臣職又復十年忍性緘口然愚直性生遇事勃發埋輪補牘雖不敢行若夫附黨營私以圖富貴臣甯死不爲也皇上不以臣衰老列諸滿大臣聖壽召入深宮親賜御酒臣非土木敢不盡心力圖報名夏姦亂日甚黨局日成人鑒張煊而莫敢言臣不憚舍殘軀以報聖主名夏坐是譴死八月加太子太保十三年加少傅兼太子太傅十五年九月以老乞休溫諭命致仕康熙元年正月聖祖念完我事太宗世祖有勞命官一子爲學士四年四月卒諡文毅雍正六年七月世宗命錄完我子孫得曾孫蘭以驍騎校待缺賜宅予白金五百

鮑承先山西應州人明萬歷間積官至參將泰昌元年從總兵賀世賢李秉誠守瀋陽城遷開原東路統領新勇營副將城守如故經略熊廷弼疏請獎勵諸將承先預焉加都督僉事銜是歲爲天命五年太祖已克開原乃自懿路蒲路河二路進兵向瀋陽承先偕世賢秉誠出城分汎駐守見太祖兵至皆不戰退上令左翼兵逐承先等迫瀋陽城北斬百餘級而去七年三月上克瀋陽遼陽

世賢戰死承先退保廣甯八年正月克西平堡承先從秉誠及總兵劉渠祁秉忠等自廣甯赴援渠秉忠戰死承先與秉誠敗走全軍盡殪巡撫王化貞棄廣甯走入關游擊孫得功等以廣甯降承先竄匿數日從衆出降仍授副將天聰三年太宗自將伐明白龍井關入邊承先從鄭親王濟爾哈朗略馬蘭峪屢敗明兵承先以書招其守將來降師進薄明都承先復招降牧馬廠太監獲其馬羸以濟師明經略袁崇煥以二萬人自寧遠入援屯廣渠門外憑險設伏貝勒豪格督兵出其右戰屢勝是時承先以甯完我薦直文館翌日上誠諸軍勿進攻召承先及副將高鴻中授以秘計使近陳獲明內監繫所並坐故相耳語云今日撤兵乃上計也頃見上單騎向敵有二人自敵中來見上語良久乃去意袁經略有密約此事可立就矣內監楊某伴臥竊聽越日縱之歸以告明帝遂殺崇煥四年師克永平承先從以書諭遷安諸紳朱堅台卜文煥以城降遂取灤州上命承先與副將白格率廂黃廂藍二旗兵守遷安立臺堡五明兵來攻力戰却之明監軍道張春總兵祖大壽等合諸軍攻灤州貝勒阿敏令承先以

守遷安兵守永平及灤州破阿敏棄永平率諸將出冷口東還瀋陽上命定諸將棄地罪以承先白格守遷安完城退敵釋弗問五年從攻大凌河降翟堡六年十一月上詢文館諸臣考各部啓心郎優絀以爲黜陟承先與甯完我范文程疏言當察其建言或實心爲國或巧言塞責以爲去留七年五月孔有德耿仲明來降泊舟鎮江承先疏言用舟師攻明宜急進否則明亦廣練舟師以禦卽不能爲功七月旣克旅順承先復請移鎮江諸艦泊蓋州收旁近諸島以仁義撫其人八年五月上伐明大同明總督張宗衡總兵曾文詔等遣承先子韜齋書請和初承先降明人執韜繫應州獄至是出之使以書來山行遇土謝圖濟農兵奪其騎斫韜及從者皆死兵去韜復蘇有馮國珍者送韜至貝勒代善營令與承先相見遂使入謁上上見韜創甚留軍中遣國珍齋書還九年正月承先疏言臣竊見元帥孔有德總兵耿仲明爲其屬員請勅上許其自行給劄帝王開國首重名器上下之分自有定禮倘欲加意招徠遠人可諭吏部奏請給劄使恩出上裁上不謂然諭曰元帥率衆航海遠來厥功匪小任賢勿貳載

在虞書朕推誠待下前旨已行豈可食言承先敗走乞降今尙列諸功臣給敕恩養豈遠來歸順諸將吏反謂無功朕此言亦非責承先也彼以誠入告朕亦以誠開示之耳旋自察哈爾得元傳國璽承先請命工部制璽函卜吉日躬率羣臣郊迎入宮仍以得璽敕示滿漢蒙古上從之既承先與文館諸臣隨諸貝勒文武將吏請上尊號崇德元年改文館爲內三院承先授內秘書院大學士三年改吏部右參政四年漢軍八旗制定承先隸正紅旗五年從鄭親王濟爾哈朗等圍明錦州令防守袁塔耕時明兵傷我農民承先退避不及援坐論死上宥之尋以病解任順治元年世祖定鼎燕京承先從入關賜銀幣鞍馬二年卒命大學士范文程視含斂子敬授三等阿思哈尼哈番官河北總兵康熙四年勦流賊郝搖旗縱不追坐降四級復起爲大同總兵入爲鑾儀衛鑾儀使卒高鴻中與承先同直文館克永平四城承先助守遷安而令鴻中助守灤州蓋使文館諸臣習武事旋以鴻中領甲喇額眞明年設六部授刑部承政六年疏論刑部事當釐正者四謂諸臣敕書賜免死有罪宜先去免死字更有罪乃追

勅書不當遽議削奪諸臣坐罪輒罰鍰非古制且罰鍰視職崇庠不問罪輕重
宜有定程滿民有罪待讞所屬牛彘若家主輒與讞獄吏同坐辨論紛擾擬嚴
定以罪著爲令刑曹讞獄滿漢官會讞民不便宜令滿官主滿民獄訟漢官主
漢民獄訟旋復條奏時政上諭文館諸臣曰上書建言固不可禁遏鴻中疏多
言古人過失昔元成吉思皇帝子察罕代以刀削檉柳爲鞭曰我國父皇所定
此檉柳鞭乃我所手創也其臣俄齊爾塞臣曰非先帝鳩工製此刀則此檉柳
豈能以指削以齒齧耶凡此土地人民一切諸政皆先帝所創立今榜式等當
以此等事相啟迪毋妄議前人爲也旣又疏論兵略謂上策宜薄明都中策先
取山海當申軍令毋辱婦女毋妄殺人毋貪財物有以離家久得財多而勸還
師者上毋爲所惑九年以所屬戶口耗減坐黜

論曰太祖時儒臣未置官署天聰三年命諸儒臣分兩直譯曰文館亦曰書房
置官署矣而尙未有專官諸儒臣皆授參將游擊號榜式未授官者曰秀才亦
曰相公崇德改元設內三院希福文程承先及剛林授大學士是爲命相之始

希福屢奉使履險效忱撫輯屬部文程定大計左右贊襄佐命勳最高完我忠
讜耿耿歷挫折而不撓終蒙主契承先以完我薦直文館而先完我入相參預
軍畫間除敵帥皆有經綸草昧之績視蕭曹房杜殆無不及也

臣等聞欽差大臣官自奉命以來之誠懇實情皆在臣等不勝感
 戴大知聖澤沛而不測典蒙主文承決以法得直而又謹願求立
 善人時多願效計無懈焉又聞王大臣等亦大指法市實建立命
 德是尚矣此

圖爾格

兄徹爾格

伊爾登

弟超哈爾 超哈爾子額赫里

巴奇蘭

岱松阿 岱松阿子阿納海 巴漢

齊爾格申

巴都里 巴都里從子海都 托克雅

葉臣

子車爾布 蘇魯邁 蘇魯邁子翁爾濟 鄂洛順 翁鄂洛

珠瑪喇

瓦爾喀珠瑪喇 瓦爾喀珠瑪喇弟伊瑪喇

圖爾格滿洲鑲白旗人額亦都第八子也少從太祖征伐積功授世職參將尙和碩公主太宗卽位八旗各設大臣二備調遣亦號十六大臣以圖爾格佐鑲白旗尋遷本旗固山額真列八大臣天聰元年上伐明圖爾格率所部從攻錦州不克墮大小凌河二城而還二年追錄其父額亦都功進世職總兵官三年從伐明克遵化四年上還師命貝勒阿敏護諸將屯永平而圖爾格與正黃旗固山額真納穆泰正紅旗調遣大臣湯古岱榜式庫爾纏高鴻中守灤州明監

軍道張春總兵官祖大壽馬世龍楊紹基等合軍來攻圖爾格與納穆泰湯古岱分地設汛以守明兵攻納穆泰急圖爾格分兵授裨將阿玉什使赴援明兵舉火火將及城樓有執燾者乘雲梯以登阿玉什揮刀斬之奪其燾明兵稍却阿敏聞明兵攻欒州遣巴都禮以數百人赴之夜三鼓突圍入明兵發巨礮城圯城樓焚圖爾格等守四日度不能禦率所部夜棄城爲散隊潰圍出會兩明兵截擊死者四百餘人至永平阿敏遂盡棄諸城引師出塞令圖爾格爲殿師還命收諸將議罪上詰責圖爾格納穆泰等湯古岱因引罪請死上曰汝等不能全師歸陷於彼爲敵所殺歸至此朕又殺之於朕復何益且汝等旣携俘獲人畜而還何不收我士卒與之俱來彼等何辜忍令其呼天搶地以死也圖爾格坐削總兵官解固山額眞五年初設六部起圖爾格爲吏部承政上自將伐明攻大凌河督諸軍合圍令圖爾格從正白旗固山額眞喀克篤禮當城東迤北城兵出攻城南礮臺圖爾格不及騎徒步擊走之略松山大凌河旋下八年與固山額眞譚泰帥師略錦州上自將伐明命貝勒濟爾哈朗留守使圖爾格

帥師屯彰武臺河口防敵自沿海至既又使與梅勒額眞勞薩帥師出邊渡遼河循張古臺河駐軍衛蒙古諸部是時察哈爾部林丹汗死其子額哲不能馭其衆諸宰桑皆來降九年命貝勒多爾袞等爲帥納穆泰將右翼圖爾格將左翼徇察哈爾至其庭額哲遂降師還略明邊自平魯衛入塞躡代州乘勝至忻口遇伏敗之逐北至崞縣殲明兵還過平魯衛明兵邀於途圖爾格戰陷陳得數百級明兵引入城不敢出圖爾格度追師且至設伏以待與納穆泰將千人爲殿明將祖大壽等以三千人赴戰圖爾格返兵步戰力衝其中堅伏起夾擊明兵大奔乃徐引兵出塞十年敘功授世職一等梅勒章京崇德元年復授鑲白旗固山額眞從武英郡王阿濟格伐明圖爾格率所部自坤都入邊會於延慶遂深入克十六城攻昌平下雄縣圖爾格皆先登旋坐女爲貝勒尼堪福晉詐取僕女爲女事發貸死奪官八月復命攝固山額眞四年上命睿親王多爾袞爲奉命大將軍率師伐明圖爾格從擊破明太監馮永盛總兵侯世祿軍復與固山額眞拜音圖敗明兵於董家口毀邊牆奪青山關入下四城五年從多

爾袞帥師攻錦州取其禾屢擊敗明兵又與固山額真葉克書將三百人伏烏忻河口伺城兵出牧驅牲畜以歸明兵千餘人逐戰葉克書馬中矢蹶敵將兵焉圖爾格射敵殪翼葉克書上馬併力擊敵敵敗去復至凡六合圖爾格身中二十餘創猶殿後力戰護所俘還敘功復進世職三等昂邦章京尋授內大臣六年太宗自將伐明困洪承疇松山圖爾格從明總兵曹變蛟夜犯御營兵至倉卒守營大臣侍衛皆未集圖爾格首發矢殪二人與弟伊爾登宗室錫翰督親軍攢射變蛟中創敗去復從諸貝勒邀擊明敗兵戰於塔山爲伏於高橋殺敵無算七年十月上命饒餘貝勒阿巴泰爲奉命大將軍以圖爾格副之帥師伐明左翼道界嶺口右翼破石城雁門二關並深入越明都自畿南徇山東南極兗州克府三州十八縣六十七獲明魯王以派及樂陵陽信東原安邱滋陽五郡王他宗室官屬千餘人遇敵三十九戰皆勝俘三十六萬九千駝馬羸驢牛羊五十五萬一千三百有奇得黃金萬二千白金二百二十萬有奇珠緞衣裘稱是八年六月師還賜白金千五百世祖卽位敘功進三等公順治二年二

月卒九年諡忠義配享太廟立碑墓道雍正九年定封三等果毅公世襲子武爾格從征皮島戰死科布梭襲二等昂邦章京貝子屯齊等訐鄭親王濟爾哈朗諸罪狀因及太宗崩時圖爾格等共謁肅親王豪格將奉以嗣位而以上爲太子王大臣議追奪圖爾格公爵命但削科布梭世職科布梭亦訐其父當太宗崩時以與白旗諸王有隙命三牛彙護軍具甲冑弓矢衛其門其祖母其父及其從父遏必隆又嘗叱辱格格格格遏必隆妻也語詳遏必隆傳八年上親政命科布梭襲三等公恩詔進二等九年追論科布梭妄訐其父削爵遏必隆兼襲進一等公自有傳兄徹爾格隸滿洲鑲黃旗人幼事太祖從征伐有勞授備禦進游擊天命十年四月上命王善達珠瑚及徹爾格率千五百人伐瓦爾喀部王善上族弟也師大捷多所俘獲及還上先五日出郊獵於避蔭四日乃罷獵至木戶角洛與師會王善等入謁行抱見禮以酒二百甕並出獵所獲獸百餘甕從征士卒並及降人還至瀋陽北岡復以酒四百甕牛羊四十列四百筵爲大宴旣入城又賜從征者人白金五兩尋進徹爾格三等總兵官太宗卽

位設八大臣徹爾格領鑲白旗天聰元年正月從貝勒阿敏等伐朝鮮師還尋解固山額眞授其弟圖爾格二年五月從貝勒阿巴泰等伐明墮錦州杏山高橋三城五年七月初設六部授刑部承政尋遷兵部承政七年八月命與刑部承政索海偵明邊至錦州斬七級獲把總一兵九十月明副將尙可喜來降上命徹爾格偵其蹤跡八年正月奏言可喜行且至道遠馬不給請諸牛彙凡有馬四者借二以給用崇德二年四月從武英郡王阿濟格等攻皮島師還以屢違軍令削爵罷官三年七月更定部院官制起授工部左參政五年二月擢戶部承政八年考滿復授牛彙章京世職世祖定鼎燕京加半個前程順治二年二月卒子陳泰法固達拉哈達陳泰拉哈達自有傳法固達襲世職進三等阿達哈哈番尋卒

伊爾登額亦都第十子與圖爾格同旗幼太祖育之宮中長授侍衛屢從征伐城界凡薩爾濟皆有勞賚蟒服授世職游擊累進三等副將太宗即位各旗置大臣二備調遣伊爾登與其兄圖爾格同佐鑲白旗尋命帥師戍國南界天聰

三年九月攻獐子島島故明將毛文龍所轄文龍爲袁崇煥所殺伊爾登帥師行略地得舟四沉之俘其人以歸十月從伐明攻龍井關墮其水門入斬明將易愛王遵臣盡殲其衆攻遵化敗明山海關援兵斬其將趙率教薄明都四年克永平灤州遵化諸城師還進一等副將圖爾格罷固山額眞以授伊爾登五年八月攻大凌河城伊爾登當城東迤南深溝堅壘環而守之卒以破敵六年上自將伐察哈爾命與貝勒阿巴泰等留守七年六月上以伐明若朝鮮若察哈爾三者何先諭諸貝勒大臣各陳所見時上留諸軍駐山海關外屯田諸貝勒大臣皆請先用兵於明伊爾登亦言與其頓兵關外不若徑入內地察諸城孰可攻者多率步兵具梯牌乘機摧陷何堅不克况蓄銳已久人有戰心及時而用之所謂事半功倍也七月上命從貝勒岳託德格類等取旅順與固山額眞葉臣將二千五百人戍焉八年上自將伐明自上方堡入命伊爾登從貝勒阿濟格多爾袞多鐸等帥師自巴顏朱爾格入龍門與上軍會宣府擊敗明兵得馬百餘攻保安克之進拔靈邱伊爾登忤諸貝勒又與固山額眞貝子篇

古等相詆謀下法司集讞坐奪世職并罷固山額眞復授圖爾格仍罰鍰尋從
豫親王多鐸伐朝鮮師還復從武英郡王阿濟格攻皮島坐先軍燾渡江復罰
鍰崇德三年起授巴牙喇燾章京四年春從武英郡王阿濟格伐明伊爾登以
三十人行略地敗明兵千人掠其馬上自將大軍駐錦州四月阿濟格以其師
會攻松山杏山訶知明總兵祖大壽太監高起潛將二千人出戰我師爲伏以
待敵逡巡不前伊爾登以四十人紆道致敵且戰且却伏發合擊大敗明兵六
月命充議政大臣兼內大臣六年六月從鄭親王濟爾哈朗圍錦州明總兵洪
承疇以師赴援屯松山西北鄭親王令右翼軍擊之戰不利退保乳峯山敵入
兩紅旗兩藍旗駐軍地固山額眞葉臣等歛兵不與爭伊爾登將多爾機轄與
恭順王孔有德及蒙古敖漢柰曼察哈爾諸部兵禦敵躍馬突陳縱橫馳擊身
被數創不少卻馬踣易之三戰益奮明兵凡四合圍卒潰圍出上嘉其勇復世
職三等梅勒章京賜白金四百八月上自將禦洪承疇陳師松山杏山間命諸
貝勒大臣分道截擊明兵伊爾登與公塔瞻率巴牙喇兵爲伏於高橋甫出營

遇明兵千人自杏山潛出擊斬之遂至高橋又遇明兵六百餘人自杏山南奔塔山伏起明兵燿焉上移營逼松山明將曹變蛟夜犯御營圖爾格率先射敵伊爾登與內大臣宗室錫翰整兵拒戰變蛟敗遁上命侍衛大臣疎防及戰不利者皆罰鍰賞禦敵將士伊爾登得優賚世祖定燕京論功遇恩詔累進二等伯十三年以老致仕上旌伊爾登功命得乘馬入朝輒召對賜食圖其象一藏內庫一畀其家康熙二年卒諡忠直伊爾登勇冠諸軍尤長於應變潛機制敵諸宿將皆弗能及子前卒孫噶都襲官至鑲黃旗蒙古副都統領侍衛內大臣乾隆初定封一等男超哈爾徹爾格弟與同旗幼事太祖授牛彙額眞天聰八年予牛彙章京世職九年與牛彙額眞納海巴雅彰屯等齎書詣喜峯口潘家口董家口諸處諭明守邊將吏還遇戍卒邀戰斬獲百餘人擢巴牙喇甲喇章京崇德元年從武英郡王阿濟格伐明將入邊遇邏卒迎戰俘二人獲馬四薄明都奪礮以擊敵殺百餘人轉戰至蘆溝橋再遇敵戰皆勝二年列議政大臣三年七月更定部院官制授禮部左參政九月從睿親王多爾袞伐明白青石

口入邊會師涿州超哈爾率所部攻任邱穴地墮其城趨趙北口明兵毀橋師不得渡乃騎出水西襲明兵後明兵大敗南略山東從克濟南四年春師還出邊超哈爾殿敗明兵於太平寨五年轉兵部右參政六年從鄭親王濟爾哈朗伐明圍錦州城兵出戰超哈爾率所部奮擊逐入郭力戰沒於陳太宗深惜之賜白金六百一十兩進世職二等甲喇章京順治間追諡果壯立碑紀績子格黑禮額赫里格黑禮襲世職凡四年而卒額赫里以牛彘額眞襲世職尋遷甲喇額眞從鄭親王濟爾哈朗徇湖廣屢敗明兵師還授京城中城理事官遷都察院理事官累進二等阿思哈尼哈番順治九年命帥師戍江甯鄭成功侵福建駐軍海澄平南將軍金礪請益師進剿上命額赫里將千五百人以往與金礪會師擊成功大破之遂攻海澄復敗成功兵十二年擢兵部侍郎以功進一等阿思哈尼哈番十六年成功兵逼江甯給事中楊雍建劾樞臣失職明年甄別部院諸臣上以額赫里弗任勞怨解任降三等阿思哈尼哈番康熙初復爲兵部侍郎擢工部尙書卒子英素襲從征準噶爾有功進二等阿思哈尼哈番

卒子郎保仍襲三等阿思哈尼哈番從大將軍傅丹征準噶爾和通呼爾之敗郎保殉焉卹進二等阿思哈尼哈番

巴奇蘭納喇氏世居伊巴丹旗制定隸滿洲鑲紅旗太祖兵初起巴奇蘭率衆來歸屢從征伐沙嶺之役率五牛彖兵當前鋒敗敵天命十一年從攻寧遠克覺華島授游擊太宗卽位各旗設調遣大臣二巴奇蘭佐正黃旗天聰三年從伐明薄明都駐軍城北擊敗明總兵滿桂等七年從伐明攻旅順口巴奇蘭率白奇超哈兵與鑲白旗固山額眞薩穆什喀方舟而前敵負崖戰甚力巴奇蘭被數創冒矢石奮擊且號於衆曰孰能先登吾褫其功於上前於是牛彖額眞雍舜珠瑪喇超距登崖巴奇蘭督衆兵從之上敵殊死戰我軍少却巴奇蘭疾呼曰敵兵敗矣士卒皆踴躍騰藉入遂克之進三等副將八年五月太宗自將伐明貝勒濟爾哈朗留守巴奇蘭副之十二月命偕薩穆什喀分將左右翼兵伐虎爾哈諸部師行上諭之曰此行道殊遠慎毋憚勞得俘撫以善言與共甘苦携以還皆可爲我用汝曹當善體朕意九年五月師還上御殿設宴親酌金

厄勞之分資所獲牲畜命籍降人二千餘戶俾安業進一等梅勒章京十年二月病創潰卒贈三等昂邦章京乾隆初定封三等子巴奇蘭伐虎爾哈諸部牛彖額眞岱松阿實從岱松阿佟佳氏世居雅爾湖旗制定隸滿洲正紅旗初亦逮事太祖天聰二年從伐明錦州下十三站以東二十餘臺七年命與甲喇額眞英俄爾岱使朝鮮語見英俄爾岱傳八年予牛彖章京世職及巴奇蘭等師還有功加半個前程崇德元年從英親王阿濟格伐明徇昌平二年戍海州擊明兵旅順口得舟二俘七人斬二人命資銀布六年卒阿納海岱松阿子襲職授牛彖額眞順治二年從擊李自成逐至富池口掠其舟三年從擊張獻忠師至西安叛將賀珍以馬步二千人拒守雞頭關阿納海與巴牙喇蠡章京鰲拜等擊破賊壘遂徇四川屢破獻忠兵五年授工部理事官尋兼任甲喇額眞六年從討叛將姜瓖攻大同掘塹環城城兵出戰阿納海及固山額眞噶達渾與戰屢勝叙功並遇恩詔累進一等阿達哈哈番十八年從靖東將軍濟席哈討山東土寇于七敗其黨喬玉季於連山賊夜出阿納海與戰中創卒進三等阿

思哈尼哈番巴漢亦岱松阿子襲職康熙十三年以參領從副都統碩塔穆森等討耿精忠次安慶聞建德陷巴漢率兵調之至赤頭關精忠兵出戰擊之潰遂導諸軍攻克之十一月精忠兵四千餘攻南康巴漢從碩塔穆森等擊敗之斬千餘盡收其械十六年從鎮南將軍莽依圖江寧將軍額楚等討吳三桂自廣東徇廣西破三桂將蔣雄於樹梓墟十八年三桂將吳世琮攻南甯巴漢從莽依圖等赴援世琮屯新甯州西山下列鹿角爲陳巴漢與戰多所俘馘世琮負傷引去南甯圍解二十年從征南大將軍賴塔進兵敗三桂將何繼祖等於西隆州奪石門坎黃草壩諸隘遂趨曲靖會湖南四川兩路兵進克雲南復從都統希福擊三桂將馬寶巴養元等於楚雄烏木山二十五年論功進一等阿思哈尼哈番二十九年三月卒

齊爾格申世居寧古塔以地爲氏兄納林率百餘人歸太祖太祖命籍其衆爲牛彖以爲牛彖額眞旗制定隸滿洲鑲白旗納林卒齊爾格申代爲牛彖額眞率所部屯達卜遜木城明兵攻耀州齊爾格申赴援敗之淤泥河還駐平山海

濱鬻鹽者千人具舟將出海齊爾格申夜襲之千人皆殪明錦州守者以兵至齊爾格申與戰面中鎗戰愈力明兵敗去天聰六年修蓋州城移民以實之命齊爾格申與梅勒額真石國柱甲喇額真雅什塔等帥師戍焉八年授世職牛彖章京蓋州與明爲界諸新附多亡去歸於明齊爾格申將兵行海濱值明兵以舟迎逃人已入海齊爾格申涉水追射殪舟中執鎗者及逃人一遂躍入其舟獲明備禦一邏卒十有三又將兵視北新渡口諜言明兵以舟五十餘泊島中命爲伏以待明兵二十餘入島伐木伏發盡獲之明兵以舟泛于海有二人遙呼曰我逃人也誰敢逐我者齊爾格申乘小舟逐之斬一人俘一人餘舟明兵皆驚潰崇德元年以齊爾格申出戍能稱職賜良馬五月從武英郡王阿濟格伐明薄大同徇延慶有所俘獲世祖朝爲福陵總管順治七年授世職拖沙喇哈番齊爾格申從弟多尼喀以攻萊陽先登賜號巴圖魯授世職牛彖章京加半個前程至是卒以齊爾格申兼襲爲一等阿達哈哈番復以恩詔進三等阿思哈尼哈番康熙十二年卒巴都里性佳氏滿洲鑲藍旗人父剛格當太祖

時率其族來歸巴都里屢從戰伐授牛彖額眞兼甲喇額眞天聰八年從伐明
攻大同與宗室拜音圖爲導未入邊得察哈爾宰桑四擢巴牙喇蠡章京崇德
元年從伐朝鮮巴都里與巴牙喇蠡章京鞏阿岱圍南漢山城屢敗敵二年從
上獵葉赫巴都哩及哈寧阿所部行列不整上嚴詰責之三年從伐明明年從
濟南還師出青山口明師追至巴都里率所部還戰巴牙喇兵有被創墜馬者
令他兵護以歸棄於道坐罰鍰六年授兵部參政兼任鑲藍旗滿洲梅勒額眞
八年與梅勒額眞鄂羅塞臣伐黑龍江降圖瑚勒禪諸臣師還予世職半箇前
程遷鑲藍旗滿洲固山額眞卒海都其從弟杭嘉子也襲職恩詔進拜他喇布
勒哈番兼拖沙喇哈番順治間從擊明將孫可望李定國白文選皆有功康熙
中署護軍統領從討吳三桂卒於軍敘功進三等阿達哈哈番托克雅先世居
瑚爾哈以地爲氏兄納罕泰爲瑚爾哈部屯長天命四年將其戚屬及所部百
餘戶來歸太祖使迎勞賜宴賚裘服奴僕田宅器用牛馬旗制定隸滿洲正紅
旗尋授納罕泰扎爾固齊托克雅牛彖額眞天聰三年遷巴牙喇甲喇章京從

清史稿
卷一百一十五
八

伐明入自龍井關遇明三屯營邏卒斬五人獲馬七護糧以行明兵來劫復斬
數人獲燹一遂與大軍會從克遵化五年三月與甲喇額眞榜素等將百人略
錦州八月圍大凌河城移屯斷錦州松山道明兵自錦州至擊却之逐至城下
俘馘甚衆八年從伐明攻大同歸還出尙方堡察哈爾諸宰桑來歸上命托克
雅率師護降人以還敘功授甲喇章京世職九年戰於寧遠與阿濟拜等敗敵
語詳阿濟拜傳崇德三年八月從貝勒岳托伐明越明都趨山東圍臨邑托克
雅以雲梯攻克其城賚馬及白金四年六月擢正紅旗蒙古梅勒額眞六年從
圍錦州與明總督洪承疇戰當敵礮被數創七年解梅勒額眞任順治元年起
爲陵寢總管二年九月卒年六十有三

葉臣完顏氏世居兆佳歸太祖旗制定隸滿洲鑲紅旗天命四年從伐明攻鐵
嶺蒙古兵助守拒戰奮擊破之六年復從伐明克遼陽以功授游擊太宗卽位
各旗置調遣大臣二葉臣佐鑲紅旗天聰元年從貝勒阿敏伐朝鮮以六十人
闌入明邊俘邏卒六攻義州與牛彖額眞艾博先登以功授二等參將率兵戍

蒙古捕斬逋逃進三等副將四年從太宗伐明攻永平上命葉臣與副將阿山選部下壯士二十四人樹雲梯先登語詳阿山傳城既克上嘉嘆且諭諸將曰他日復攻城毋令先登驍將當共惜之進三等總兵官授議政大臣諭以政有闕失當盡言葉臣對曰臣受恩重願罄所知入告但恐臣識未逮耳五年授鑲紅旗固山額眞從伐明圍大凌河城葉臣以所部當城西迤南城兵出劇我壘葉臣與額駙和碩圖等督兵夾擊殲敵過半七年六月上命諸貝勒大臣陳時政時有議直擊山海關者葉臣疏言今我師方聚宜先往大同宣府覘察哈爾蹤跡近則攻之若遠卽入明邊進逼明都伐木爲梯晝夜環攻卽不遽克亦足以威敵上韙其言是月從貝勒岳託德格類等攻明旅順口斬獲無算八月從貝勒代善自喀拉鄂博入得勝堡略大同西至黃河擊敗明朔州騎兵崇德元年五月從武英郡王阿濟格等伐明旣入邊分兵下安州又合攻寶坻穴其城克之十二月從上伐朝鮮與諸固山額眞率阿禮哈超哈兵入其王都二年四月從阿濟格攻明皮島與阿山督白奇超哈兵乘小舟攻島西北隅麾兵先進

斬明總兵沈世奎島下師還進一等總兵官四年從貝勒岳託等伐明入青山口略太平寨岳託令每旗遣梅勒章京一每牛彘簡甲士三使葉臣與固山額眞譚泰爲將攻克其關遇敵十三戰皆勝得馬六十七年命代貝勒阿巴泰戍錦州順治元年從入關率師徇山西師所經行自直隸饒陽至河南懷慶傍近諸府縣悉下進克太原先後定府九州二十七縣一百四十一署置官吏安輯居民明將李際遇屯河南境依山爲寨唐通董學禮降李自成擁衆擾邊葉臣皆招使來降山西底定師還至定州土寇有自號掃地王者糾徒黨剽掠葉臣遣兵討平之比至京坐擅毀禁垣屏其功不錄但賜白金六百二年豫親王多鐸定江南七月命貝勒勒克德渾爲平南大將軍以葉臣佐之代多鐸鎮撫並命大學士洪承疇招撫南方諸行省敕滿洲諸軍會葉臣調遣有不順命者葉臣發兵搜捕輒奏績十一月以自成餘黨一隻虎等出沒武昌襄陽荊州諸府命葉臣從勒克德渾移師剿除三年十月師還賜黃金三十白金五百四年改一等精奇尼哈番五年卒是年七月定封二等精奇尼哈番以長子車爾布襲

復兼一拖沙喇哈番以第五子車赫圖襲車爾布初官甲喇額眞崇德六年從
攻錦州與諸將共爲伏破明兵擢巴牙喇燾章京從入關擊李自成追及於安
肅復追及於慶都殲賊甚衆授世職拜他喇布勒哈番既復從英親王阿濟格
西討自成師出塞道土默特鄂爾多斯入塞度黃河鑿冰以濟順治二年春師
至榆林賊夜襲蒙古軍車爾布與牛彖額眞蘇拜往援破敵還軍遇伏復縱擊
却之與固山額眞伊拜拊循旁近諸府縣師進圍延安與梅勒額眞羅壁戰敗
城兵自成走湖廣車爾布與巴牙喇燾章京鰲拜以師從之攻安陸得舟八十
復與巴牙喇甲喇章京噶達渾逐賊九宮山敗其騎兵自成死師還授議政大
臣加一拖沙喇哈番三年從肅親王豪格討張獻忠屢戰皆捷與貝勒尼堪等
徇遵義夔州諸府縣尋以巴牙喇燾章京哈寧阿被圍車爾布未及援降拖沙
喇哈番輟其賞及既襲父爵六年姜瓖以大同叛車爾布從英親王阿濟格帥
師討之瓖出攻鑲紅旗營車爾布率巴牙喇兵禦之瓖敗走瓖黨自阻馬得勝
二路分兵循北山逼我軍瓖復以城兵出戰鰲拜率先當賊車爾布與梅勒額

眞譚布合兵繼進遂殲壞兵兩遇恩詔累進三等伯十二年十二月命與寧海大將軍伊爾德率師徇浙江擊斬明魯王將王長樹王光祚沈爾序等與伊爾德自寧波航定海分三路進攻敵萬餘列舟二百戰敗逐之至衡水洋斬思六御獲其將林德等百餘人遂克舟山語互見伊爾德傳以功進一等伯兼拖沙喇哈番十五年十二月命與安南將軍明安達理成貴州十六年二月復命移駐荊州八月鄭成功入攻江寧車爾布與明安達理自荊州赴援循江而下擊敗成功將楊文英斬其裨將獲舟及諸攻具十七年十一月師還十八年改鑲紅旗蒙古都統康熙三年以久疾解都統降三等伯七年三月卒乾隆十四年定封號曰威靖初從葉臣攻永平先登凡二十四人蘇魯邁其一也蘇魯邁嵩佳氏滿洲正藍旗人世居棟鄂部父遜札哩歸太祖太祖錄其長子蘇巴海授牛彙章京天命三年蘇魯邁從伐明攻撫順樹雲梯先登六年授牛彙額眞復從伐明取瀋陽遼陽天聰元年從阿敏伐朝鮮攻義州蘇魯邁以二十人先諸軍登城三年從太祖伐明攻克洪山口城予世職備禦其從葉臣攻永平也城

上火器發蘇魯邁面中鎗不退敵炮裂自焚冒火援雲梯上城遂下上遣醫視
創賜號巴圖魯賚牲畜布帛進世職游擊復從伐明取旅順略寧遠戰必先衆
恒以被創受賞崇德元年從武英郡王阿濟格伐明將入邊攻雕鄂城炮傷口
因以殘疾家居順治間恩詔累進三等阿思哈尼哈番康熙元年十一月卒諡
勤勇蘇魯邁子蘇爾濟遜哈三塔哈鄂洛順翁鄂洛蘇爾濟順治初以噶布什
賢轄從入關與噶布什賢喇勒依昂邦錫特庫擊敗李自成將唐通於一片石
三年從端重親王博洛徇福建敗明將姜正希於汀州予世職拜他勒布喇哈
番七年卒鄂洛順事聖祖以二等護衛從建威將軍佛尼埒討吳三桂敗其將
高定以前鋒統領從裕親王福全擊噶爾丹有功累遷江寧將軍卒翁鄂洛事
聖祖從征南大將軍賚塔討吳世璠師自廣西入戰石門坎敗其將何繼祖再
戰黃草壩復敗繼祖獲詹養王有功薄雲南殲胡國柄逐捕馬寶巴養元等以
功進三等阿達哈哈番卒

珠瑪喇碧魯氏世居葉赫太祖時率所部虎爾哈人來歸旗制定隸滿洲鑲白

旗授牛彖額眞天聰三年從伐明次遵化擊敗明兵後三日太宗臨視遵化明兵自山海關至將入城珠瑪喇以邏卒十人禦之所擊殺甚衆薄明都遇明總兵滿桂黑雲龍麻登雲孫祖壽諸軍入大紅門與額駙楊古利甲喇額眞音達戶齊擊之明兵左次旋克永平復攻昌黎先登被六創以功授備禦尋坐事奪世職五年從圍大凌河城明監軍道張春赴援珠瑪喇與甲喇額眞鄂諾迭戰破其前鋒六年從伐察哈爾次穆魯哈岱獲布延圖台吉殲其從者百餘俘其孛七年從貝勒德格類岳托攻旅順口將巴牙喇兵十人以舟登擊甕城巴奇蘭既令於衆珠瑪喇與牛彖額眞雍舜超躍而上大聲自名曰珠瑪喇登城矣被三創不少卻卒拔其城上聞嘉歎親酌金卮以賜復世職九年從貝勒多鐸伐明圍錦州夜設雲梯以攻被創甚崇德元年從伐朝鮮力戰克山寨從伐明敗明總兵取四縣三年授兵部理事官從伐明圍錦州明兵屯廣寧北蒼峙山珠瑪喇別將四十人破其寨又招降別軍屯駱駝山及大凌河北山諸寨六年命與甲喇額眞僖福監張家口互市事畢所司劾珠瑪喇以私財爲市且索馬

蒙古論死上命寬之復奪世職輸所市物入官尋從鄭親王濟爾哈朗復圍錦州敵將奪我軍礮珠瑪喇擊之退既復至珠瑪喇射殪敵敵乃潰七年與噶布什賢噶喇依昂邦沙爾虎達伐虎爾哈部降喀爾喀木等十屯俘壯丁千餘及牲畜輜重以歸上命迎勞順治初珠瑪喇以甲喇額眞從入關擊李自成尋授正藍旗滿洲梅勒額眞兵部侍郎復世職二年十一月與梅勒額眞和托等帥師駐防杭州珠瑪喇將右翼馬士英方國安自嚴州侵餘杭珠瑪喇擊之走還未至杭州三十里遇土寇復擊破之國安等仍以數萬人分屯江東諸山及杭州郊外朱橋范村諸地珠瑪喇與總兵田雄副將張杰等分兵逐捕三年率師徇福建與巴牙喇蠡章京敦拜擊破明兵五年從征南大將軍譚泰討叛將金聲桓於江西與固山額眞何洛會及沙爾虎達等屢敗聲桓兵焚其舟千三百有奇下九江及其屬縣凡六遷正白旗蒙古固山額眞吏部尙書世職累進三等阿思哈尼哈番十年冬坐選授山東驛道房之騏嘗占籍青州不詳勘罷尙書十一年明將李定國等寇廣東命珠瑪喇爲靖南將軍副以敦拜率師討之

方攻新會尙可喜耿繼茂等軍於三水扼隘列屯珠瑪喇至與合軍擊敵戰於
珊瑚洲斬副將一獲裨將十餘馘一百五十餘級師至新會定國所將步騎卒四
萬分據山險列炮以象爲陣珠瑪喇督將士力戰定國兵旣却復出兵四千餘
人自山上馳下我師力禦敗之奪其山定國兵乃遁十二年二月定國走高州
珠瑪喇遣梅勒額眞畢力克圖鄂拜等以師從之戰於興業再戰於橫州定國
渡江焚其橋我師躡其後三戰皆勝定國走入安隆珠瑪喇與尙可喜等復高
州雷州廉州三府及所屬州三縣八又克廣西境州二縣四凡二十二城得象
十六馬二百有奇他器械稱是上賜敕獎勵九月師還入見上諭大學士馮銓
等曰珠瑪喇率師征廣東捷歸年方五十壯年能立功爲有福也賜茶慰勞部
議進一等阿思哈尼哈番兼一拖沙喇哈番上以珠瑪喇等擊破定國雪衡州
桂林之憤功高不當循常格命再議進三等精奇尼哈番十五年致仕康熙元
年卒諡襄敏瓦爾喀珠瑪喇那木都魯氏居瓦爾喀部渾春地祖察禮率族歸
太祖旗制定隸滿洲正白旗珠瑪喇方少時卽從太祖征伐授牛录額眞以同

時有碧魯珠瑪喇命綴地於名以爲別天聰八年授世職牛彙章京嘗率噶布什賢兵十人逐得蒙古亡者四十三人上特予優賚崇德二年與牛彙額眞喀凱等分道伐瓦爾喀部徇額勒約索額黑庫倫僧庫勒諸路俘獲甚衆以功加半個前程三年授吏部理事官四年三月從貝勒岳托伐明攻故城夜以雲梯登克之明總兵侯世祿師赴援珠瑪喇徒步突敵軍力戰世祿敗去珠瑪喇創甚明太監高起潛師復至負創戰尤力起潛亦敗去十月從略錦州敗明兵入邊至太平寨明兵嚴陣以待珠瑪喇徒步大呼入陣斫鹿角中創不稍却明兵大潰十一月從承政索海薩穆什克伐索倫部珠瑪喇俘十有九人道攻虎爾哈部雅克寨焚其郭牛彙額眞和託先登珠瑪喇繼之克其城師還次黑龍江之濱虎爾哈潰兵復合烏魯蘇屯曾博穆博果爾以六十人擊正藍旗後隊珠瑪喇與索海設伏掩擊殲敵略盡以功進三等甲喇章京六年從伐明圍錦州擊敗松山騎卒明總督洪承疇赴援營松山西北我師與戰右翼敗敵萃於左翼珠瑪喇力戰炮傷額跽且絕上深悼之賜綖以斂後三日復蘇上聞喜甚令

加意休養毋卽從軍命監造盛京塔塔成厚賚之旋令率師戍錦州明兵來攻戰竟夜敵敗去斬四十餘級得雲梯及軍械累進一等甲喇章京順治初從入關擊李自成平馬山口土寇以功加半箇前程二年十月調戶部理事官十一月與固山額眞巴顏等帥師會定西大將軍何洛會西討張獻忠三年肅親王豪格代何洛會督諸軍向階州聞獻忠兵屯禮縣南遣珠瑪喇分兵擊之獻忠兵驚竄復與巴牙喇燾章京鰲拜進兵西充獻忠死乃還師六年從討叛將姜瓖次左衛瓖兵屯城外迎戰珠瑪喇擊之走城遂下逐賊寧武關瓖兵置炮山岡以拒珠瑪喇與甲喇額眞烏庫禮疾馳據岡脊破其壘瓖所置總兵劉偉以關降師還擢正白旗梅勒額眞世職累進一等阿思哈尼哈番十年三月卒祀四川名宦伊瑪喇其弟也肅親王定四川伊瑪喇以巴牙喇侍衛從師次保寧獻忠將趙雲桂來攻伊瑪喇登城射中雲桂目賊駭走師從之大捷即襲其兄世職授甲喇額眞康熙十三年從揚威將軍阿密達討叛將王輔臣十四年五月克寧州九月進攻平涼未至八里輔臣率萬餘人出拒伊瑪喇從貝勒洞鄂

與戰輔臣敗入城十五年從撫遠大將軍圖海復攻平涼至城北虎山墩誦賊
賊合步騎猝至伊瑪喇奮戰賊敗去事平師還二十七年乞休三十四年五月
卒亦祀四川名宦世宗卽位命錄戰功未受賞者加伊瑪喇拖沙喇哈番

論曰太宗與明戰下大凌河克錦州皆以全力爭壬午之師間道深入數千里
如行無人之境爲前此所未有則圖爾格之績也以是戰多踵爲功宗伊爾登
巴奇蘭齊爾格申輩皆驍武從太宗征伐擐旗陷陳而葉臣珠瑪喇入關後又
以夙將力戰策勳大業將成羣才翊運盛矣

以原保其疆域德大業神功聖文...
 出告國書...
 國...
 國曰...
 予...
 國台...
 與...

清史稿

列傳二十一

孔有德 全節

耿仲明 子昭繼忠茂聚忠

尙可喜 子之孝

沈志祥 兄子永忠子永瑞

祖大壽 子澤潤養子澤溥法澤洪子澤遠

孔有德遼東人太祖克遼東與鄉人耿仲明奔皮島明總兵毛文龍錄置部下

善遇之袁崇煥殺文龍分其兵屬副將陳繼盛等有德與仲明走依登州巡撫

孫元化爲步兵左營參將天聰五年太宗伐明圍大凌河城元化遣有德以八

百騎赴援次吳橋大雨雪衆無所得食則出行掠李九成者亦文龍步將與有

德同歸元化元化使齎銀市馬塞上銀盡耗懼罪其子應元在有德軍九成還

就應元咻有德謀爲變所部陳繼功李尙友曹得功等五十餘人糾衆數千掠

臨邑陵商河殘齊東圍德平破新城恣焚殺甚酷元化及山東巡撫余大成皆

力主撫檄所過郡縣毋邀擊有德因僞請降明年正月率衆逕至登州仲明與

都司陳光福及杜承功曹德純吳進興等十五人爲內應夕舉火導有德入自

東門城遂陷元化自剄不殊有德等以元化故有恩縱使航海去旅順副將陳
有時廣祿島副將毛承祿亦叛應有德勢益張有德自號都元帥鑄印置官屬
九成爲副元帥仲明有時承祿光福爲總兵官應元爲副將四出攻掠明以徐
從治爲山東巡撫謝璉爲登萊巡撫並駐萊州有德等進陷黃縣平度遂攻萊
州從治中礮死城上有德復僞請降誘璉出殺之莊烈帝命侍郎朱大典督師
討有德援平度斬有時至昌邑有德逆戰大敗復黃縣有德等退保登州登州
城東西南皆距山北臨海城北復有水城通海舶大典督諸軍築長圍困之九
成出戰死明師攻益急有德乃謀來降以子女玉帛出海仲明單舸殿經旅順
明總兵黃龍以水師邀擊擒承祿光福殲應元斬級千餘有德等退屯雙島龍
安塘食盡遣所置游擊張文煥都司楊謹千總李政明以男婦百人泛海至蓋
州蓋州戍將石廷柱雅什哈護使謁上具言有德等舉兵始末且請降上諭范
文程羅什剛林預策安置有德等復遣所置副將曹紹中劉承祖等奉疏言將
自鎮江登陸上命貝勒濟爾哈朗阿濟格杜度帥師迓之朝鮮發兵助明師要

有德等鴨綠江口濟爾哈朗等兵至江岸嚴陳相對敵師不敢逼有德等舟數百載將士槍礮輜重及其孥畢登三貝勒爲設宴上使副將金玉和傳諭慰勞天聰七年六月有德仲明入謁上率諸貝勒出德盛門十里至渾河岸爲設宴親舉金卮酌酒飲之賜蟒袍貂裘撤袋鞍馬有德仲明亦上金銀及金玉諸器綵段衣服越二日復召入宮賜宴授有德都元帥仲明總兵官賜敕印卽從所署置也命率所部駐東京號令鼓吹儀衛皆如舊惟刑人出兵當以聞有德等怨黃龍必欲報之會聞龍發水師逐賊鴨綠江旅順無備上命貝勒岳託德格類帥師襲之以有德率爲導龍數戰皆敗遂自殺克其城有德等兵入占官吏富民廨宅多收俘獲岳託德格類聞於上上置不問有德墜馬傷手與仲明留遼陽詔慰之曰都元帥遠道從戎良亦勞苦行間諸事實獲朕心招撫山民尤大有裨益不謂勞頓之身又遭銜櫬之失佇聞痊可用慰朕懷別敕令旗纛用皂色並誠軍士以時演習槍礮弓矢馬以牌甲胄以帶皆書滿洲字爲識別有德仲明旋入朝上誠母餽遺貝勒大臣八年朝元日命有德仲明與八和碩貝

勒同列第一班遣官爲營第疏辭不允有德仲明軍駐遼陽官吏經其地必躬迎款宴上復誠諭之謂爾等即朕子弟款接諸臣理有未當今後非貝勒毋更迎宴爾等偕至者如有困窮當加愛養爾等或遣使詣盛京當令使者告禮部禮部與館餼不然爾等新附親知尙少使來無居無食不重困乎及尙可喜來降上遇之亞有德仲明命更定旗制以白鑲皂號有德仲明軍爲天祐兵可喜軍爲天助兵國語謂漢軍烏眞超哈有德等自將所部不相屬八月從上伐明白大同入邊有德遣所部黑成功佟三以八十人擊敗明兵代州城西獲馬二十九十九年有德等爲部將請敕上命自給札鮑承先疏論當令吏部給劄付上不允有德等仍錄所部副將以下請敕上曰爾等初來歸朕許爾等黜陟部將今復給敕是背前言朕非謂爾等無功不當畀敕書也慮失信耳因賜有德仲明可喜人緞一貂皮六十副將以下白金有差有德以新附者日衆偕仲明輸糧佐饗上卻之崇德元年夏四月上受寬溫仁聖皇帝尊號有德從諸貝勒奉寶以進封恭順王十二月上自將伐朝鮮命有德等從貝勒杜度護輜重繼後二

年二月既下江華島命有德等從貝子碩託以水師取皮島師還有言其部衆違法妄行者上命申嚴約束毋蹈故轍三年從攻錦州有德等以礮攻下戚家堡石家堡及錦州城西臺降大福堡又以礮攻下大臺一俘男婦三百七十九盡戮其男子又以礮攻五里河臺臺隅圯明守將李計友李惟觀乃率其衆出降皆籍爲民勿殺四年從攻松山以礮擊城東隅臺臺上藥發自燔殲其餘衆又降道旁臺二上至松山使有德等以礮攻其南郭有德當郭門仲明居右馬光遠佐之可喜居左石廷柱佐之自夜漏下至翌日晡城堞盡毀明守將金國鳳卽夜繕治守甚固有德議穴地攻之不克六年率兵更番圍錦州破明師杏山七年松山錦州相繼下時析烏眞超哈爲八旗有德等請以所部隸焉乃分屬正紅旗八年從取中後所前屯衛順治元年從睿親王多爾袞入關追擊李自成至慶都九月上至京師賜有德等貂蟒朝衣十月上御皇極門大宴復賜鞍馬旋命有德從定國大將軍豫親王多鐸西討李自成二年陝西既定移師下江南克揚州取明南京攻江陰有德皆有勞八月師還賜繡朝衣一襲馬二

黃金百白金萬命還鎮遼陽簡士馬待徵發三年五月諭兵部召有德等率所部會京師八月授有德平南大將軍率仲明可喜及續順公沈志祥右翼固山額眞金礪左翼梅勒額眞屯泰率師南征策白湖廣下江西贛南入廣東諭諸將悉受有德節制是時明桂王稱號湖廣總督何騰蛟駐湘陰諸將李赤心黃朝宣劉承胤袁宗第王進才馬進忠等分屯湖南北號十三鎮大抵自成餘黨及左良玉舊部四年春有德師至進才自長沙走湖北騰蛟亦棄湘陰單騎奔衡州有德遣梅勒額眞卓羅藍拜等躡進才與所部水師遇擊敗之有德進次湘潭朝宣以十三萬人屯燕子窩有德率藍拜等將水師可喜及卓羅等將陸師分道並入破明將徐松節朝宣走衡州有德以師從之獲朝宣有德令仲明金礪卓羅等將水師還詣長沙明將楊國棟以二千人屯天津湖巴牙喇甲喇章京張國柱札薩藍等與戰國棟自牛皮灘遁去有德令金礪留駐衡州復與仲明及卓羅等率師越熊飛嶺克祁陽遂破寶慶擊殺明魯王世子乾生總兵黃晉李茂功吳興等時明桂王居武岡倚承胤爲守有德夜發寶慶前隊梅勒

章京黑成功等敗敵焚木城奪門入明桂王走靖州轉徙入桂林承胤出降有德始自長沙下祁陽也聞郝搖旗圍桂陽令可喜及藍拜等別將兵赴援郝搖旗部卒千四百人屯翔鳳舖令巴牙喇蠡章京線國安固山大蘇朗等擊破之搖旗引去至是國安等遂趨靖州追明桂王明總兵蕭曠姚有性以萬二千人守靖州國安師薄城奪門入獲曠有性等又破明侍郎蓋光英軍藍拜略黔陽進攻沅州明將張宣弼以三萬人出戰我兵奮擊遂克其城自出師至此凡獲明宗室桂王子爾珠等二十七人降明將自承胤以下四十七人偏裨二千餘人馬步兵六萬八千有奇捷聞賜有德黃金二百五十兩仲明可喜各二百志祥百將士賚白金有差五年春復進克辰州湖南諸郡縣悉定又旁取貴州黎平府廣西全州招降銅仁全州興安灌陽苗峒二百九十有奇復獲明宗室榮王子松等四十餘人及所置總兵以下諸將吏甚衆上命有德班師至京師宴勞賜黑貂紫狐冠服綵帛鞍馬黃金二百白金二千六年五月改封有德定南王授金冊金印令將舊兵三千一百新增兵萬六千九百合爲二萬人征廣西

設隨征總兵官一左右翼總兵官各一以授馬蛟麟線國安曹得先同時仲明
可喜各將萬人征廣東但設左右翼制綱於有德自有德師還湖南諸郡縣復
爲赤心進才宗第等侵據上命鄭親王濟爾哈朗爲定遠大將軍帥師討之克
長沙寶慶衡州諸府獲騰蛟而進忠猶據武岡與曹志建鄭思愛劉祿胡光榮
林國瑞黃順祖向文明等爲寇靖永郴諸州窺寶慶十月有德師至衡州遣副
將董英何進勝擊思愛戰於燕子窩擒斬之進克永州擊走明將胡一青七年
春復進破龍虎關殲志建遂攻武岡陳獲祿光榮等進忠負創走克其城並下
靖州復進戰興甯獲順祖國瑞招文明等以五萬人降師入廣西境克全州十
二月遂拔桂林明桂王走南寧留守大學士瞿式耜死之斬靖江王以下四百
七十三人降將吏一百四十七人桂林平樂諸屬縣皆下八年春正月有德奏
移藩屬駐桂林遣蛟麟國安取梧州柳州略旁近諸州縣有德進駐賓陽復遣
國安等分三道進取定思恩慶遠明將陳邦傅以潯州來降明桂王走廣南南
寧亦下九年四月有德疏言臣荷先帝節錄微勞錫以王爵恭遇聖主當陽兩

粵八閩未入版圖臣謬辱廷推駐防閩海同時有固辭粵西之役者蓋以其地最荒僻民少山多百蠻雜處諸孽環集底定難預期也臣自念受恩至渥必遠闢巖疆始敢伸首邱夙願故毅然以粵西爲請受命以來道過湖南伏莽蔓延六郡拮据一載咸與掃除乃進征粵西仰藉威靈所向克捷賊黨或竄或降雖土司猺獠狼獾古稱叛順靡常者亦漸次招徠受我戎索粵西底定臣生長北方與南荒煙瘴不習解衣自視刀箭癢痕宛如刻劃風雨之夕骨痛痰湧一昏幾絕臣年邁子幼乞恩敕能臣受代俾臣得早覲天顏優游終老疏入得旨覽王奏悉知功苦但南疆未盡寧謐還須少留以俟大康五月有德率輕兵出河池向貴州留師柳州爲後援是時張獻忠將孫可望降於明窺伺楚粵有德請敕剿撫將軍續順公沈永忠駐沅州扼門戶時國安擢廣西提督馬雄爲左翼總兵全節爲右翼總兵分守南寧慶遠梧州未幾明將李定國馮雙禮自黎平出靖州馬進忠自鎮遠出沅州會於武岡永忠使乞援有德遣兵赴之至全州永忠已棄寶慶退保湘潭有德因還桂林七月定國自西延大埠取間道疾驅

擊破全州軍薄桂林驅象攻城城兵寡定國晝夜環攻有德躬守陴矢中額仍指揮擊敵敵奪城北山俯攻有德令其孥以火殉遂自經妻白氏李氏皆死於火事聞諡有德武壯十一年六月有德女四貞以其喪還京師上命親王以下阿思哈尼哈番以上漢官尙書以下三品官以上郊迎賜白金四千官爲營葬立碑紀績尋復命建祠祀春秋以白氏李氏配有德子廷訓爲定國所掠越六年乃殺之及我師克桂林隨征總兵李茹春求得遺骸以其死事狀上聞命予卹四貞至京師賜白金萬視和碩格格食俸旋嫁有德部將孫龍子延齡延齡叛應吳三桂自有傳國安雄皆附延齡爲亂附見延齡傳節廣寧人在明官參將從有德降授甲喇額眞有德既克桂林以節爲右翼總兵克慶遠使節戍焉降宜山河池思恩荔浦諸縣九年七月有德遣兵援寶慶令節移屯梧州聞定國兵且至復令節移屯平樂節方至柳州定國已破桂林柳州副將鄭元勳等叛降定國謀襲節節間道走梧州與國安雄合軍定國來攻我師戰而敗節負重傷潰圍出乘舟至肇慶可喜遣水師助節乃還定梧州藤縣潯州十年正月

復平樂劉雄守梧州而與國安共擊破明將陳經猷王應龍遂克桂林明將胡一青龍韜楊威以數萬人屯陽朔永福間節屢戰破之敘功加都督進三等精奇尼哈番移屯武宣平象州獲明將掌文有羅天舜十二年移屯荔浦時明宗室盛濃盛添明將李茂先龔瑞屯富川糾土寇王心蔣乾相等及猺獞爲亂跨湖南貴州界依山結寨爲可望定國聲援節與國安等迭遣兵擊之獲盛濃盛添諸猺獞百九十二寨皆下十五上年命國安征貴州奏請令節移屯柳州十六年復督兵討茂先瑞戰融縣獲茂先戰懷遠瑞降康熙元年改右翼總兵爲左江鎮總兵卽以命節七年七月卒贈太子少保方定國破桂林也節妻溫氏率妾婢自經子成忠年十一被掠去及洪承疇定貴州得之降將趙三才所至是襲三等精奇尼哈番從有德降者又有李尙友徐元勳胡璉曹紹中孟應春皆受世職梅勒章京分隸正黃鑲黃二旗

耿仲明字雲臺遼東人初事明總兵毛文龍文龍死走登州依巡撫孫元化皆與孔有德俱元化以仲明爲中軍參將時總兵黃龍鎮皮島所部有李梅者仲

明黨也通洋事覺龍繫之獄仲明弟都司仲裕在龍軍率部卒假索餉名圍龍
廨擁之至演武場折股去耳鼻將殺之諸將爲救免龍乃執殺仲裕疏請罪仲
明元化劾龍蝕餉致兵譁明莊烈帝命充爲事官而覈仲明主使狀會有德已
叛還攻登州仲明遂糾諸將同籍遼東者爲內應城陷推有德爲帥受署置稱
總兵官天津裨將孫應龍自夸與仲明兄弟善能令縛有德以降巡撫鄭宗周
使將二千人自海道往仲明僞爲有德首給之開水城延使入猝斬之殲其衆
得巨艦以爲舟師明師攻登州急天聰七年五月從仲明來降上禮遇優異授
以總兵官號其兵曰天祐兵語並詳有德傳仲明侵漁所部所部懇於有德有
德因劾仲明仲明引咎請以所部赴懇者移屬有德上敕獎有德令善撫之亦
諭仲明善撫部下毋念舊惡卽日並召入宮賜宴越數日又使賜羊酒且諭之
曰朕聞諸漢官從爾等教塲角射設筵饗爾等意爾等必欲相酬報爾等去家
遠可卽以此羊酒藉教塲爲答宴也旋命與有德同駐遼陽崇德元年封仲明
懷順王上屢出師伐明討朝鮮仲明皆從七年八月命隸正黃旗九月所部甲

喇額眞石明雄訐仲明匿所獲松山杏山人戶有逃人被法仲明爲收塋設祭復妄殺無辜鞫實罰仲明白金千兩八年十一月甲喇額眞宋國輔潘孝及明雄謀殺仲明仲明以聞鞫實斬國輔等籍其家畀仲明順治初從睿親王多爾袞入關復從豫親王多鐸西討李白成移師定江南三年有德爲平南大將軍帥師南征仲明等以所部從與明將楊國棟戰於牛皮灘大破之克衡州祁陽武岡諸郡縣獲明將劉肇基皆仲明功也六年改封靖南王賜金冊金印仲明自降後屢出征伐恒與有德俱未嘗獨將是歲始與有德分道出師有德征廣西仲明與尙可喜征廣東仲明將舊兵二千五百新增兵七千五百合爲萬人以徐得功爲左翼總兵連得成爲右翼總兵師旣行刑部奏論仲明部下梅勒章京陳紹宗等縱部卒匿逃人罪當死上因諭仲明察隨征將士携逃人以往者械歸毋隱仲明察得三百餘人械歸上疏請罪吏議當奪爵上命寬之紹宗等亦貸死仲明未聞命十一月次吉安自經死子繼茂順治初授世職昂邦章京仲明死繼茂在軍中代領其衆請襲爵睿親王方攝政持不可繼茂從可喜

俱南定廣東諸郡縣語見可喜傳八年世祖親政繼茂嗣爲王九年李定國陷桂林孔有德死事上聞報命定遠大將軍敬謹親王尼堪自湖南移師赴之救可喜繼茂俟尼堪至合軍進攻而繼茂先已與可喜遣兵赴援復梧州及旁近諸郡十年潮州總兵郝尙久據城叛繼茂與靖南將軍喀喀木總兵吳六奇合軍討之圍城逾月城將王立功爲內應樹雲梯以登尙久入井死餘賊盡殲潮州及饒平揭陽澄海普甯諸縣悉平十一年二月命內翰林秘書院學士郎廷佐齎敕慰勞賜白金三千分賚將士是歲李定國徇高雷廉三府進犯新會繼茂可喜與靖南將軍珠瑪喇合軍進擊再戰皆捷定國還據南甯復出攻橫州繼茂自梧州帥師赴之解橫州圍進攻南寧定國走安隆獲明將李先芳斬裨將杜紀等十三年賜敕紀功增藩俸歲千金初繼茂與可喜攻下廣州怒其民力守盡殲其丁壯卽城中駐兵牧馬營靖南平南二藩府東西相望繼茂尤汰侈廣徵材木採石高要七星巖工役無藝復創設市井私稅民咸苦之廣東左布政使胡章自山東赴官途中上疏言臣聞靖南王耿繼茂平南王尙可喜所

部將士掠辱士紳婦女占居布政使官廨並擅署置官吏臣思古封建之制天子使吏治其國而納其貢稅焉不得暴彼民也二王以功受封宜仰體聖明憂民至意以安百姓乃所爲如是臣安敢畏威緘默乞敕二王還官解釋俘虜繼茂奏辨可喜亦有疏自白章坐誣論絞上命貸死奪官逾年高要知縣楊雍建內遷給事中疏陳廣東濫役私稅諸大害謂一省不堪兩藩請量移他省朝議令繼茂移鎮桂林未行十六年三月上命移四川十七年七月改命移福建時明將鄭成功據金門窺伺閩浙繼茂旣移鎮與總督李率泰協謀征剿康熙元年成功死子錦代領其軍上命繼茂相機剿撫繼茂疏報自順治十八年訖元年招降將吏二百九十兵四千三百三十四家口四百六十七其後成功弟世襲兄子纘緒及所置都督鄭賡先後出降復得將吏七百有奇兵七千六百有奇二年十月繼茂與率泰督兵渡海克廈門水師提督施琅以荷蘭夾板船來會乘勝取浯嶼金門二島錦與其將周全斌等走銅山復入犯雲霄陸鰲諸衛總兵王進功與戰大破之三年三月繼茂復與率泰及海澄公黃梧合軍自八

尺門出海克銅山錦以數十舟走臺灣捷聞上嘉其功復增歲俸千金十年正月疏陳疾劇乞以長子精忠代治藩政上允其請五月卒諡忠敏精忠嗣爲王別有傳昭忠繼茂次子聚忠繼茂第三子順治間先後入侍世祖授昭忠一等精奇尼哈番以貝子蘇布圖女妻焉昭忠例得多羅額駙進秩視和碩額駙聚忠尙柔嘉公主爲和碩額駙同加太子少保旋又同進太子太保康熙十三年精忠叛昭忠聚忠率子姓請死繫於家待命逾年貫其罪復秩如故十四年命聚忠齎敕招精忠精忠拒不納十五年精忠降授昭忠鎮平將軍駐福州代精忠治藩政藩下參領徐鴻弼等訐精忠降後尙蓄逆謀昭忠具以聞並劾助逆曾養性等十餘人上以精忠在軍未卽發十七年命昭忠以其祖父之喪還葬蓋平十九年召精忠詣京師昭忠聚忠疏劾精忠背恩爲亂違母周氏訓蹙迫以死誣祖仲明與吳三桂在山海關時先有成約請予顯戮尋命聚忠詣福州議徙藩兵聚忠疏陳藩兵當盡徙稱旨命以精忠家屬還京師精忠旣誅昭忠聚忠疏陳家屬衆多艱於養贍請如漢軍例披甲食糧下部議編五佐領隸漢

軍正黃旗二十五年昭忠卒諡勤儉二十六年聚忠卒諡愨敏

尙可喜遼東人父學禮明東江游擊戰沒樓子山明莊烈帝崇禎三年擢副總兵黃龍爲東江總兵官駐皮島可喜隸部下皮島兵亂龍不能制可喜率兵斬亂者事乃定後二年孔有德等叛明陷登州旅順副將陳有時廣鹿島副將毛承祿皆往從之龍遣可喜及金聲桓等撫定諸島有德黨高成友者據旅順斷關寧天津援師龍令游擊李維鸞偕可喜等擊走之卽移軍駐其地旋以可喜爲廣鹿島副將明年秋七月有德等從我師攻旅順龍兵敗自殺部將尙可義戰死蓋可喜兄弟行也明以沈世奎代龍爲總兵部校王庭瑞袁安邦等搆可喜誣以罪世奎檄可喜詣皮島可喜詢得其情遂還據廣鹿島天聰七年十月遣部校盧可用金玉奎謁上乞降上報使賜以貂皮並令車爾格等偵可喜蹤跡八年正月可喜舉兵略定長山石城二島行且至上命諸貝勒集滿漢蒙古諸臣諭曰廣鹿島尙副將携民來歸非以我國衣食有餘也承天眷佑彼自來附八家貝勒已出粟四千石凡積粟之家當量出佐饗仍予以值二月命貝勒

多爾袞薩哈廉往迓三月可喜至海州上降敕慰勞攻旅順時獲可喜戚屬二十七人至是命歸諸可喜四月可喜入朝上迎十里外拜天畢御黃幄可喜遙行五拜禮進至上前再拜抱上膝以見所部將士以次羅拜可喜跪進齎上與宴賜蟒衣鞞帶帽鞞玄狐裘雕鞍馬駝羊命諸貝勒以次設宴旋授可喜總兵官賜敕印可用玉奎皆爲甲喇章京號其軍曰天助兵命駐海州尋從伐明白宣化入邊略代州崇德元年四月封智順王十二月從伐朝鮮二年朝鮮降從貝勒碩託帥師克皮島斬世奎師還賚蟒服黃白金可喜家僮許可喜私得人戶金帛牲畜法司以奏上曰此豈王自得必散於衆兵耳其勿問三年從伐明攻錦州屢攻下臺堡更番駐牧敵至輒擊敗之七年錦州下賜所俘及降戶可喜與有德等疏請以所部屬烏眞超哈分隸鑲藍旗八年從伐明取中後所前屯衛諸城順治元年從入關擊李自成追至慶都斬自成將谷可成等十月命從英親王阿濟格西討自成出邊自榆林趨綏德二年二月師次米脂自成兄子錦猶據延安用可喜議令諸軍分道進錦走克其城會豫親王多鐸已破潼

關定西安上命可喜從英親王追擊自成分兵克鄖陽荊州襄陽諸郡降自成將王光恩苗時化等復與英親王合軍下九江聞自成竄死九宮山乃班師賜可喜繡朝衣一襲馬二還鎮海州三年八月授有德爲平南大將軍征湖廣命可喜率所部兵偕行師次湘潭明將黃朝宣以十三萬人屯燕子窩可喜與梅勒章京卓羅等自陸路進擊敗明將徐松節遂逐斬朝宣既聞郝搖旗攻桂陽急可喜與梅勒章京藍拜帥師赴援郝搖旗以千四百人屯翔鳳舖巴牙喇轟章京線國安等與戰郝搖旗敗走桂陽圍解湖南既定師還與有德等同賜冠服金幣鞍馬六年五月改封平南王賜金冊金印旋命率舊兵二千三百新增兵七千七百合萬人與仲明同征廣東以許爾顯爲左翼總兵官班志富爲右翼總兵官仲明所部匿逃人事發因諭有德等檢校軍中得逃人悉送京師仲明懼罪自裁吏議可喜亦坐奪爵上命納白金四千以贖時明桂王駐肇慶兩廣尙爲明守是歲除夕可喜潛兵襲南雄城兵三千出西門迎戰擊敗之立雲梯以登明守將江起龍棄城走斬其部將楊級董洪信鄭國林等三十餘人兵

六千有奇七年正月進克韶州明守將羅成耀聞南雄破已先遁明桂王走梧州復進下英德清遠從化諸縣明將吳六奇等迎降二月師薄廣州廣州城三面臨水李成棟之叛於城西築兩翼令傅城外爲礮臺水環其下成棟死信豐子元胤建捷代將元胤留肇慶建捷守廣州可喜令攻城阻水不能進乃鑿深壕築堅壘爲長圍困之建捷拒戰甚力暑雨鬱蒸我師弓矢皆解膠久相持不下元胤與明將陳邦傅等分道援廣州邦傅與杜永和等以萬餘人自清遠赴戰可喜擊敗之獲裨將魏廷相等明水師總兵梁標相來降得戰船百五十助攻復招潮州守將郝尙久惠州守將黃應傑皆以其城降遣將士戍焉圍合十閱月永和部將范承恩助守廣州約內應決礮臺下水可喜令諸軍皆舍騎藉薪行淖中以濟遂得礮臺據城西樓堞發礮擊城西北隅城圯師畢登克廣州俘承恩等斬六千餘級逐餘衆迫海濱溺死者甚衆明將宋裕昆自肇慶率所部來降八年春可喜遣爾顯等收肇慶并下羅定部將徐成功克高州梁標相叛遣兵討平之九年春正月可喜與繼茂帥師南下降明將蔡奎遂入廉州遣

部將呂應學等攻克欽州戰於靈山獲元胤及明將袁勝周朝陳斬明益陽王明將上官星拱師將下雷瓊永和及明西平王縛明將李明忠以降於是高雷廉瓊四府皆定七月李定國陷桂林有德死之梧州南寧平樂潯州橫州皆復爲明東略化州吳川可喜遣兵與有德部將提督線國安總兵馬雄全節合軍以進廣西諸郡縣以次收復十年八月可喜別遣兵克化州吳川十一年冬定國以萬餘人侵廣東擾高雷廉三府境深入陷高明分兵攻肇慶圍新會可喜與繼茂疏請發禁旅爲援上已先命珠瑪喇爲靖南將軍帥師援廣東可喜等師次三水遣兵援肇慶破定國兵於四會河口待珠瑪喇師至合軍擊定國戰於珊瑚洲斬定國裨將一俘十餘人馘百五十餘進薄新會定國與其將吳子聖阻山而軍馬步兵分屯嶺隘可喜麾兵急擊奪徑以登斬獲甚衆定國走新會圍解可喜與繼茂督軍攻高明定國遣兵禦戰獲其將武君禧等三十餘人斬三百餘級得馬贏軍械無算可喜遣梅勒章京畢力克圖等逐定國戰於興業定國敗走復及於橫州江殲馬步兵甚衆獲象二定國度江焚橋引去廣東高

雷廉三府廣西橫州諸州縣悉平十三年四月又克揭陽晉寧澱海三縣閏五月賜敕紀功增歲俸千兩並賚貂裘鞍馬自是明桂王徙雲南定國等不復侵廣東數歲無兵事可喜與繼茂並開府廣州所部頗放恣爲民害自左布政胡章以論可喜等得罪無復言者十七年移繼茂福建可喜專鎮廣東廣東初定又以令徙瀕海居民民失業去爲盜有鄧耀者據龍門入掠雷陽又有蕭國隆與其徒洪彪周祥勞泰陳期新等分據恩平開平陽江陽春諸山寨掠廣州諸屬縣並及肇慶可喜先後遣兵討之耀走死斬彪祥泰期新及其徒千五百人國隆投水死又有周玉故蜆戶自號恢粵將軍繕船數百三帆八櫂衝浪若飛習水戰成功兵至輒助剽掠康熙二年可喜遣兵討之獲玉焚其舟四年碣石總兵蘇利叛可喜遣潮州總兵許龍以舟師進擊利出降玉餘黨譚琳高竄據東涌海島蛋戶黃明初等濟以米糧可喜遣部將佟養謨擊琳高舒雲護等捕明初皆就誅初可喜遣長子之信入侍十年十一月疏言有疾請令還廣東暫領軍事上允其請十二年二月遣侍衛古德米哈納使廣東勞軍齎御用貂帽

團龍天馬裘藍蟒狐腋袍各一襲束帶一圍賜可喜二月可喜疏乞歸老海城
諭曰王自航海歸誠效力累朝鎮守粵東宣勞歲久覽奏年已七十欲歸老遼
東恭謹能知大體朕深嘉悅下議政王大臣及戶兵二部集議議盡撤所部移
駐海城於是吳三桂耿精忠相繼上章乞撤藩上皆允其請分遣朝臣料量藩
兵移徙具舟役芻糗戶部尙書梁清標如廣東十一月三桂反命罷撤平南靖
南二藩召清標還十三年精忠及定南王孔有德婿孫延齡反應三桂三月可
喜疏言延齡檄並舉三藩精忠復叛臣與精忠爲婚姻不能不踣踏於中臣叨
忝王爵年已七十餘雖至愚豈肯向逆賊求富貴乎惟知矢志捐軀保固嶺南
以表臣始終之誠上溫旨嘉獎並命與總督金光祖同心合力籌戰守四月潮
州總兵劉進忠叛應三桂可喜遣次子都統之孝帥師討之疏言諸子中惟之
孝端慎寬厚可繼臣職上即命之孝襲王爵之孝辭可喜復疏言三桂遣兵二
萬人屯黃沙河若與延齡兵合勢益猖獗請遣將合軍進討上授副都統根特
平寇將軍自江西帥師赴廣東與可喜合軍進討並命兵部以各道進兵狀移

告可喜五月上敕獎可喜忠貞並諭與光祖等策討延齡十月可喜討平廣州土寇李三官七上命廣東督撫提鎮俱聽可喜節制遴補將吏調遣兵馬均得便宜從事根特自長沙下廣西卒於軍上復授安親王岳樂爲定遠平寇大將軍率禁旅赴廣東三桂精忠方連兵寇江西安親王師至轉戰不能遽達十二月復命鎮南將復尼雅翰率所部協守廣東十四年正月進封可喜平南親王以之孝襲爵並授平南大將軍廣東當寇衝盜賊並起博羅河源長寧增城從化諸縣先後告警可喜輒分兵剿定總兵張星耀等戰樂昌俘斬千餘副將李印香等戰碣石白沙湖諸處燬敵舟百餘皆下部叙功鄭錦自臺灣以兵攻海澄進圍漳州可喜疏聞復請發重兵策應尼雅翰亦言可喜年衰臣才短設有警慮不支上命前鋒統領覺羅舒恕自江西帥師援廣東旋代尼雅翰爲鎮南將軍先是之孝討進忠復程鄉大埔諸縣遂克潮州鄭錦遣其將劉國軒以萬人赴之勢復張之孝退保惠州叛將祖澤清引延齡將馬雄三桂將王宏勳等入高州並陷雷廉二郡可喜疏言廣東十郡已失其四將軍舒恕總督金光祖

退保肇慶事勢危急請敕安親王赴廣東辦賊上方責安親王定江西卽下長沙取三桂揚威大將軍簡親王喇布自江寧移師屯南昌遂命簡親王發兵應可喜師未至十五年正月錦攻陷漳州三桂兵逼肇慶可喜初請以長子之信襲爵繼惡之信酗酒嗜殺請更授次子之孝之信陰通三桂三桂兵日迫之孝與進忠相持上敕還廣州不時至二月之信發兵圍可喜第叛可喜臥疾不能制憤甚自經左右救之甦疾益甚十月卒可喜疾亟猶服太宗所賜朝衣遺令葬海城十六年之信降上敕部卹可喜諡曰敬及之信既誅二十年五月之孝乞迎可喜喪歸葬九月喪至遣大臣覺羅塔達學士庫勒納侍衛敦柱至丁字沽親奠諭曰王素矢忠貞若人人盡能如王天下安得有事每念王懷誠事主至老彌篤朕甚悼焉可喜諸子之信自有傳之孝初授可喜藩下都統襲平南親王授平南大將軍帥師討劉進忠上敕還廣州未聞命之信叛脅之孝罷惠州軍之孝還廣州侍可喜疾及可喜卒從之信居廣州之信降遣之孝還京師上命以內大臣入直秩視一品食正一品俸之孝請自效授宣義將軍駐南昌

募兵詣簡親王軍聽調遣擊吳三桂軍吉安贛州間降其將林興隆王國贊等
進次汀州復擊破其將楊一豹江機江西定召還京師留所募兵編入綠旗營
之信誅上貸之孝母連坐以內大臣入直如故二十二年奏乞守陵議政大臣
等劾削職三十五年正月卒之隆可喜第七子官至領侍衛內大臣聖祖既誅
之信命有司還可喜海城田宅置佐領二以其一爲可喜守墓從之隆請也

沈志祥遼東人毛文龍所部有沈世奎者本市僧倚女爲文龍妾橫行島中累
遷副總兵及黃龍敗沒明以世奎代龍爲總兵官鎮東江時旅順已破尙可喜
又以廣鹿島降世奎勢孤甚後三年太宗伐朝鮮因移師克皮島世奎戰敗率
舟師走我師從之副總兵金日觀戰死登萊總兵陳洪範來援不敢進世奎亦
戰死志祥其從子也時官副將收潰兵保石城島欲得世奎敕印監軍者靳弗
予遂自稱總兵明發兵討之崇德二年九月太宗遣使齎書招志祥三年二月
志祥遣所部將吳朝佐金光裕詣盛京上疏請降時上方出獵奎屯布喇克留
守諸王與宴使貝勒杜度等轉粟迓志祥志祥自黃石島至安山城杜度等令

駐沙河堡待命從志祥降者副將九參將八游擊十八都司三十一守備三千總四十諸生二軍民二千五百有奇上獵還命學士胡球承政馬福塔等勞志祥且令於鐵嶺撫順自擇屯軍所志祥言願駐撫順畀以車騎令率所携軍民往至復爲具屋宇庀服物俾得安處七月上聞志祥所携軍民有亡去者遣學士羅碩等諭其衆曰爾曹航海來歸以朕能育爾曹也朕不能育爾曹任爾曹亡去未晚爾曹初至朕適出獵故未及加恩爾曹何去之速也朕蒙天眷朝鮮已平蒙古瓦爾喀諸部皆附惟明僅存倘天復垂佑以明畀我爾曹將安之爾曹雖逃爲諸邊邏卒所不得不免於殺戮朕心實所不忍今後毋更逃有貧不能自給者朕爲撫育之志祥入謁上上御崇政殿受朝授志祥總兵官賚蟒衣涼帽玲瓏鞵帶貂捨猓獾狐豹裘各一襲撒袋弓矢雕鞍甲冑駝馬初宴禮部再宴宮中命諸貝勒各與宴及還鎮遣官送五里外復賜宴四年正月封續順公九月授志祥兄子永忠及所部許天寵等二十八人世職六年十月命率所部助圍錦州七年師還分賜俘獲旋與孔有德等合疏請以所部屬烏眞超哈

志祥隸正白旗順治元年從入關逐李自成至慶都上至京師賜志祥等貂蟒
朝衣十月上御皇極門宴凱旋諸王大臣志祥與焉復賜鞍馬三年授孔有德
平南大將軍征湖廣志祥率所部從五年湖南定賜志祥黃金百白金二千尋
卒無子永忠其兄子也襲爵五月有德及耿仲明尙可喜復分道出師征兩廣
亦命永忠率部將總兵官許天寵郝効忠等徇湖南六年効忠遣參將馬如松
將兵禦孫可望戰於托口俘其將李應元等八年天寵及阿達哈哈番張彥宏
護軍統領宋文科等擊敗明師獲明將席世賢等一百七人降牛萬才等二百
五十六人兵一萬八千有奇可望等攻陷沅州効忠遣守備吳進功等分屯要
隘爲備復親將兵攻下黎平屯四鄉所可望調我兵寡驟以兵至効忠力戰馬
蹶被執不屈死効忠遼東人明副將屬左良玉軍良玉死從其子夢庚來降隸
漢軍正白旗授三等阿達哈哈番至是永忠以死事狀聞上命予卹永忠退保
湘潭敕令激勵將士相度險要以同心併力堅守疆土毋輕戰毋退縮旋聞桂
林陷孔有德戰死復敕令留屯寶慶與總兵柯永盛合軍固守十年二月授永

忠剿撫湖南將軍鎮湖南十一年孫可望兵入湖南沅靖武岡諸州皆陷進攻辰永永忠還軍長沙給事中魏裔介劾永忠手握重兵望風宵遁乞亟賜罷斥毋俾誤及封疆十二年議政王大臣議永忠喪師失地罪當斬來降有功免死奪爵上從其議十七年復命永忠爲挂印將軍鎮廣東康熙初命駐潮州旋卒瑞永忠子方永忠之黜也以從弟永興襲爵永興卒以瑞襲爵時瑞方八歲所部副都統鄧廣明駐潮州如故十三年潮州總兵官劉進忠叛應三桂瑞部兵與巷戰三日進忠引鄭錦兵入城執瑞廣明驅將卒家屬二千餘人徙福建置諸漳浦十六年復執瑞送臺灣康親王傑書師定福建疏言瑞所部及其孥無所統屬應令有地得以總集上命副都統張夢吉宋文科統其衆駐潮州同將軍賴塔等協守當給俸饗令督饗侍郎達都視舊例從厚夢吉等尋疏請送孥留京師傑書又請以所部分隸督撫提鎮而處其孥於山西諸省聖祖諭謂瑞及所部官兵素懷忠義特以衆寡不敵爲賊所脅令駐潮州如故錦得瑞爵以侯瑞不願附錦謀待我師至爲內應二十年十一月錦將朱友以瑞謀告錦錦

遂幽瑞瑞及妻鄭皆自殺錦盡殺其孥臺灣平聖祖聞瑞死事狀下廷臣議求其族以瑞從姪沈熊昭襲爵

祖大壽字復字遼東人仕明爲靖東營游擊經略熊廷弼奏獎忠勤諸將大壽與焉天啟初廣寧巡撫王化貞以爲中軍游擊廣寧破大壽走覺華島大學士孫承宗出督師以大壽佐參將金冠守島承宗用參政道袁崇煥議城寧遠令爲高廣大壽董其役方竟太祖師至穴地而攻大壽佐城守發巨砲傷數百人太祖攻不下偏師略覺華島斬冠殪士卒萬餘太宗即位伐明略寧遠崇煥令大壽將精兵四千人繞出我師後總兵滿桂尤世威等以兵來赴戰寧遠城下會溽暑我師移攻錦州不克遂引還明人謂之寧錦大捷明莊烈帝立用崇煥督師擢大壽前鋒總兵掛征遼前鋒將軍印駐錦州太宗嘗與大壽書議遣使弔明熹宗之喪且賀新君大壽答書拒之越二年太宗伐明薄明都崇煥率大壽入衛莊烈帝召見平臺慰勞令列營城東南拒戰崇煥中太宗間朝臣復論其引敵脇和莊烈帝意移復召入詰責縛下獄大壽在側股慄懼併誅出又聞

滿桂爲武經略統寧遠將卒不肯受節制遂帥所部東走毀山海關出遠近大震莊烈帝取崇煥獄中書招之孫承宗亦使撫慰密令上章自列請立功贖崇煥罪大壽如其言莊烈帝優旨答之明年春我師克永平等四城太宗聞大壽族人居永平三十里村命往收之得大壽兄子一子二及其戚屬授宅居之以兵監焉師出塞貝勒阿敏等護諸將戍四城承宗令大壽與山西總兵馬世龍山東總兵楊肇基會師率副將祖大樂祖可法張弘謨劉天祿曹慕誠孟斌等攻灤州灤州下遂逼永平阿敏等棄四城引兵還大壽復駐錦州又明年七月大壽督兵城大凌河太宗策及其工未竟攻之自將渡遼河出廣寧大道貝勒德格類等率偏師出義州八月師至城下上曰攻城慮多傷士卒不若爲長圍困之城兵出我則與戰援師至我則迎擊乃分命諸貝勒諸將環城而軍冷格里當城北迤西達爾漢當城北迤東阿巴泰在其後覺羅塞勒當城正南莽古爾泰德格類在其後篇古當城南迤西濟爾哈朗在其後武納格當城南迤東喀克篤禮當城東迤北多鐸在其後伊爾登當城東迤南多爾袞在其後和碩

圖當城西迤北代善在其後鄂本兌當城正西葉臣當城西迤南岳託在其後諸蒙古貝勒各率所部彌其隙佟養性率烏真超哈載砲跨錦州大道而營諸將各就分地周城爲濠深廣各丈許濠外爲牆高丈許施睥睨距牆內五丈又爲濠廣五尺深七尺五寸營外又各爲濠深廣皆五尺上陟城南岡顧謂降將麻登雲黑雲龍曰明善射精兵盡在此城關內兵強弱朕所素悉登雲對曰此城之兵猶槍之有鋒鋒挫柄存亦復何濟上命射書城中招蒙古兵出降諸將攻撫城外諸臺堡以次悉下城兵出樵採輒爲我軍擒馘圍合十餘日上以書諭大壽言願與明媾和大壽置不報明援師自松山至阿山勞薩圖魯什擊敗之自錦州至貝勒阿濟格等擊敗之九月遼東巡撫邱禾嘉總兵官吳襄宋偉合軍七千人赴援上親率貝勒多鐸及圖魯什等以巴牙喇兵二百渡小凌河乘銳擊破之圍合已月餘上度大壽必期援師至出城兵夾攻乃令斲卒去城十里所發砲樹幟驟馬揚塵若爲援兵自錦州至者而親率巴牙喇兵入山爲伏大壽果以城兵出攻城西南隅臺篇古葉臣及蒙古諸貝勒督所部禦戰上

親率巴牙喇兵自山上騰躍下大壽知墜計急收兵入城死傷百餘人自是閉城不復出越數日明監軍道張春及襄偉等合馬步兵四萬來援渡小凌河爲嚴陳徐進上與貝勒代善等以二萬人禦之上率兩翼騎兵直入敵營發矢射明軍明軍發槍砲上督騎兵縱橫馳突矢雨集明軍遂敗襄先奔佟養性屯敵營東發砲黑雲起天際風從西來明軍縱火勢甚熾將逼我陳忽驟雨反風向明軍明軍益亂右翼兵入春營逐北三十餘里獲春及副將張弘謨楊華微薛大湖參將姜新等三十三人斬副將張吉甫滿庫王之敬襄等皆遁走十月上復使招大壽並命弘謨等各以己意爲書勸降大壽率將吏見使者城外曰我寧死於此不能降也上復與大壽書諭降許以不殺旋有王世龍者越城出降言城中糧竭商賈諸雜役多死存者人相食馬斃殆盡參將王景又以于子章臺降我師克傍城諸堡收糗糧葺壕壘大壽欲突圍不得出上復遣姜新招大壽大壽見新於城外遣游擊韓棟與新偕還棟怵我師嚴整歸以白大壽大壽始決降遂令其子可法出質要石廷柱往議上遣庫爾纏龍什寧完我與廷柱

偕廷柱度壕見大壽大壽曰人安得不死今不能忠於國亦欲全身保妻子耳我妻子在錦州上將以何策俾我得與妻子相見耶上復令廷柱與達海往諭卽令大壽爲計大壽遣其中軍副將施大勇來言降後欲率從者詐逃入錦州伺隙以城獻是時大凌河諸將皆願降獨副將何可綱不從大壽乃令掖以出城殺之大壽使以誓書至上率諸貝勒誓曰明朝總兵官祖大壽副將劉天祿張存仁祖澤洪祖澤潤祖可法曹恭誠韓大勳孫定遼裴國珍陳邦選李雲鄧長春劉毓英竇承武參將游擊吳良弼高光輝劉士英盛忠祖澤遠胡宏先祖克勇祖邦武施大勇夏得勝李一忠劉良臣張可範蕭永祚韓棟段學孔張廉吳奉成方一元塗應乾陳變武方獻可劉武元楊名世等今以大凌河城降凡此將吏兵民罔或誅夷將吏兵民亦罔或許虞有違此盟天必譴之誓畢上使龍什告大壽大壽卽日出謁上與語良久定取錦州策以御服黑狐帽貂裘金玲瓏鞵帶緞鞞雕鞍白馬賜之次日命貝勒阿巴泰等將四千人爲漢裝從大壽取錦州會大霧不果行又次日爲十一月朔大壽以從子澤遠及從者二十

六人入錦州石廷柱庫爾纏送之夜渡小凌河徒步去上令大凌河將吏兵民薙髮斂軍中餘粟分賚之方大凌河築城時軍土工役商賈都三萬餘人至是僅存萬一千六百八十二人馬三十有二後數日大壽自錦州傳語諸裨將前日行倉猝從者少撫按防禦嚴客軍衆未得即舉事又遣使以告上上報以書誠毋忘前約命墮大凌河城引師還至瀋陽命達海傳諭慰諸降將大壽諸子孫賜宅以居厚撫之用貝勒岳託議將以雪遼東永平多殺謗也大壽初入錦州詭言突圍出遼東巡撫邱禾嘉知其納款狀密聞於朝莊烈帝欲羈縻之因爲用置勿問惟以蒙古將桑噶爾塞等赴援戰不力敗又先奔令大壽誅之桑噶爾塞等將執大壽來降大壽與之盟乃定莊烈帝召大壽入朝使三至辭不往上自大凌河師還略宣府克旅順居二年遣阿山譚泰圖爾格先後徇錦州又明年上使貝勒多鐸帥師攻錦州多鐸令阿山石廷柱圖賴吳拜郎球察哈喇等以四百人前驅大壽令副將劉應選穆祿吳三桂參將桑噶爾塞張國忠王命世支明顯將二千七百人出禦松山城守副將劉成功趙國志率八百人

來會阿山等與遇大凌河西多鐸引後軍自山下塵起蔽天應選等軍潰殲五百人獲游擊曹得功等得馬二百餘甲胄無算多鐸旋引軍還又明年改元崇德行封賞授澤潤三等昂邦章京澤洪可法一等梅勒章京于世襲敕書設都察院六部滿漢蒙古各置承政漢承政皆授諸降將可法張存仁都察院澤洪吏部韓大勳戶部姜新禮部澤潤兵部李雲刑部裴國珍工部三年更定部院官制但置滿承政諸降將改授左右參政並以鄧長春代大勳陳邦選代新是時上北撫喀爾喀南定朝鮮敕大壽使密陳進兵策大壽不報三年十月上自將伐明率鄭親王濟爾哈朗豫親王多鐸出寧遠錦州大道睿親王多爾袞爲左翼自青山關入貝勒岳託爲右翼自牆子嶺入大壽方屯中後所以兵襲多鐸土默特之衆先奔多鐸師敗績次日與濟爾哈朗合兵出大壽斂兵不復戰上親率師至中後所使諭大壽曰自大凌河別後今已數載朕不憚辛苦而來冀與將軍相見至於去留終不相強曩則釋之今乃誘而留之何以取信於天下乎將軍雖屢與我兵相角爲將固應爾朕絕不以此介意將軍勿自疑次日

又縱俘齎敕往曰曩大凌河釋汝朕之諸臣每謂朕昧於知人今將軍宜出城相見若懷疑懼朕與將軍可各將親信一二人於中途面語朕欲相見者蓋爲朕解嘲亦使將軍子姪及大凌河諸將吏謂將軍能踐言也大壽終不敢出石廷柱馬光遠孔有德等攻克旁近諸臺堡上乃命還師左右翼深入師大捷四年二月上復自將伐明以武英郡王阿濟格爲前鋒親督軍圍松山分兵攻連山塔山杏山明莊烈帝方召大壽入援大壽甫行我師至乃還守寧遠時澤遠守杏山大壽遣部將三兵九百自水道赴援半入城我噶什布賢兵躡其後縱擊得舟一殺五十人上遣使至錦州諭大壽妻令以利害導大壽來降大壽選蒙漢兵各三百授祖克勇及副將楊震徐昌永等取道邊外趨錦州至烏欣河口阿爾薩蘭以滿蒙兵一百六十戍焉與戰獲震斬級八十四得馬百五十克勇等依山爲寨上親督巴牙喇兵破其寨斬昌永獲克勇斬級三百十一得馬四百十一我兵攻松山不克會左右翼師還上命罷攻還盛京大壽復入錦州是歲屢出師略錦州寧遠松山杏山皆未竟攻得俘獲即引退五年三月命鄭

親王濟爾哈朗貝勒多鐸率師屯田義州五月上幸義州視師蒙古蘇班代等牧杏山城西使請降上命濟爾哈朗等率巴牙喇兵千五百人往迓大壽偵我師寡令游擊戴明與松山總兵吳三桂杏山總兵劉周智合兵七千人邀擊濟爾哈朗引退以致敵還擊大敗之上親閱錦州城攻城東五里臺城北晒馬臺皆下刈其禾而還上命多爾袞濟爾哈朗等將兵更番攻錦州六年三月濟爾哈朗令諸軍環城而營大壽令蒙古守陴邏卒至城下蒙古兵自城上呼與語曰我城中積粟可支二三年爾曹爲長圍豈遂足困我乎邏卒曰我師圍不解自二三年至四五年爾曹復何取食蒙古兵聞之皆懼貝勒諾木齊等遂遣使約降啟郭東門納我師及期大壽聞變以兵出子城蒙古兵與戰我師逼城外蒙古兵垂繩援以登吹角夾攻大壽退保子城我師入其郭得裨將十餘及蒙古漢民男婦五千三百六十七人明援兵自杏山至濟爾哈朗爲二覆敗明兵斬級一百七十俘四千三百七十四人得馬百十六甲七十六五月洪承疇督軍來援六月多爾袞番代上遣學士羅碩以澤潤等書招大壽七月上自將破明

師降承疇語見承疇傳大壽弟總兵大樂游擊大名大成從承疇軍被獲上命釋大成縱之入錦州大壽使詣軍言得見大樂當降既令相見大壽再使請盟濟爾哈朗怒曰城旦夕可下安用盟爲趣攻之大壽乃遣澤遠及其中軍葛勳詣我師引罪翌日大壽率將吏出降卽日諸固山額眞率兵入城實崇德七年三月初八日也上聞捷使濟爾哈朗多爾袞慰諭大壽並令招杏山塔山二城降濟爾哈朗多爾袞帥師駐焉阿濟格阿達禮等以大壽等還上御崇政殿召見大壽謝死罪上曰爾背我爲爾主爲爾妻子宗族耳朕嘗語內院諸臣謂祖大壽必不能死後且復降然朕決不加誅往事已畢自後能竭力事朕則善矣又諭澤遠曰爾不復來歸視大壽耳曩朕莅視杏山爾明知爲朕而特舉礮豈非背恩爾舉礮能傷幾人耶朕見人過卽爲明言不復省念大壽且無責爾復何誅爾年方少壯努力戰陳可已澤遠感激泣下六月烏眞超哈分設八旗以澤潤爲正黃旗固山額眞可法澤洪國珍澤遠爲正黃正紅鑲藍鑲白諸旗梅勒額眞大凌河諸降將初但領部院至是始以典軍大壽隸正黃旗命仍爲總

兵上遇之厚賜賚優渥存仁上言大壽悔盟負約勢窮來歸卽欲生之待以不殺足矣勿宜復任使降將顧用極且謂其反覆慮蹈大凌河故轍上方欲寵大壽風明諸邊將使大壽書招明寧遠總兵吳三桂三桂大壽甥也答書不從大壽因疏請發兵取中後所收三桂家族八年十月濟爾哈朗帥師伐明克中後所并取前屯衛中前所明年世祖定鼎京師大壽從入關子澤溥在明官左都督至是亦降十三年大壽卒大壽初未有子撫從子澤潤爲後其後舉三子澤溥澤洪澤清澤清叛應吳三桂語見三桂傳澤潤初授三等昂邦章京順治中以從征叛將姜瓖並遇恩詔進一等精奇尼哈番又一拖沙喇哈番從阿爾津帥師鎮湖南卒於軍乾隆初定封二等子兼一雲騎尉澤溥初降授一等待衛累遷福建總督乞休卒澤洪分隸鑲黃旗順治元年改參政爲侍郎澤洪仍任吏部入關追擊李白成斬其將陳永福克太原復擊敗叛將賀珍姜瓖叙功並遇恩詔累進一等精奇尼哈番兼授內弘文院學士以疾解任卒子良璧襲爵授參領兼佐領從裕親王福全征噶爾丹擢西安副都統復從撫遠大將軍費

揚古出西路討噶爾丹駐翁吉督饗噶爾丹從子丹濟拉襲翁吉良璧擊之敗走遷福州將軍署福州總督卒乾隆初定封一等男兼一雲騎尉可法大壽養子初質於我師及降授副將隸正黃旗順治初從入關擊走李自成命以右都督充河南衛輝總兵自成兵掠濟源懷慶總兵金玉和戰死可法赴援力戰自成兵乃引去進都督充鎮守湖廣總兵駐武昌以疾解任卒諡順僖澤遠順治間積功並遇恩詔授世職一等阿達哈哈番累遷湖廣總督加太子太保京察左遷尋卒

論曰有德仲明毛文龍部曲可喜東江偏將志祥又文龍部曲之餘也文龍不死諸人者非明邊將之良歟大壽大凌河既敗錦州復守相持至十年明兵能力援殘疆可盡守也太宗撫有德等恩紀周至終收績效其於大壽不惟不加罪並謂其能久守者讀書明理之效推誠以得人節善以勵衆其諸爲興王之度也歟

清史稿

列傳二十二

圖賴

準塔

伊爾德

努山

阿濟格尼堪

佟圖賴

圖賴費英東第七子也初隸廂黃旗後與兄納蓋弟蘇完顏改屬正黃旗天聰元年太宗伐明略寧遠二年伐察哈爾圖賴皆從三年復伐明薄明都明大同總兵滿桂入援屯德勝門圖賴與戰所殺傷甚衆師還授世職備禦四年從貝勒阿敏守永平明兵救灤州阿敏遣巴都禮赴援圖賴及梅勒額眞阿山皆在行及阿敏棄永平出邊明將率步卒百人追擊圖賴以十六人殿還戰盡殲之進世職游擊五年上伐明圍大凌河城命巴牙喇蠡章京揚善鞏阿岱等駐軍壕外待敵度壕即與戰而令圖賴與南褚哈克薩哈當兩旗間衛樵採城兵出挑戰圖賴銳入陳達爾漢以所部繼貝勒多爾袞亦督兵進我師薄壕舍騎步戰敵阻壕與城上兵爭發礮矢師退副將穆克譚屯布祿備禦多貝戈里等皆

戰死圖賴亦被創上怒曰圖賴輕進諸軍從之入朕弟亦衝鋒而進有不測將
磔爾等食之敵如狐處穴更將焉往朕兵天所授皇考所遺欲善用之勿使勞
苦穆克譚我舊臣死非其地豈不可惜因誡諸臣毋視圖賴創揚古利鞏阿岱
偕往存問上復切責之明監軍道張春等以四萬人來援次長山上率諸貝勒
禦之圖賴當右翼躍馬突陳敵潰走遂覆其師七年從攻旅順口八年從伐明
徇大同攻朔州拔靈邱進世職二等旋追論攻朔州時越界出略又不赴期會
地奪俘獲入官九年授巴牙喇纛章京從貝勒多鐸等伐明多鐸既入廣寧令
圖賴與固山額眞阿山等以四百人爲前鋒向錦州擊殺明將劉應選破其軍
師還以功得優賚崇德二年授議政大臣三年上命睿親王多爾袞貝勒岳託
率師分道伐明圖賴從岳託爲前驅踰牆子嶺入邊克十一臺遂南略山東明
將以八千人拒戰蒙古阿藍泰旁卻圖賴方督所部馳擊敵百騎突至圖賴搏
戰陷堅敵敗去明大學士劉宇亮綴我師而北至通州圖賴與固山額眞譚泰
擊破之拔四城進三等梅勒章京六年從鄭親王濟爾哈朗等伐明圍錦州明

總兵祖大壽爲明守蒙古吳巴什諾木齊等謀內應事洩大壽以兵攻吳巴什等圖賴入其郭力戰援諾木齊出先後破杏山松山援兵遂督烏眞超哈拔塔山杏山二城進一等梅勒章京師還追論攻錦州時巴牙喇兵有怯退者圖賴當罰鍰上命寬之八年從伐明拔中後所前屯衛進三等昂邦章京順治元年從睿親王多爾袞帥師伐明明將吳三桂迎師四月戊寅師距山海關十里李自成遣其將唐通率數百騎出關是夕遇於一片石圖賴督巴牙喇兵與戰通敗走己卯入關從大軍擊破自成自成還京師西遁圖賴復從諸軍追擊敗之於慶都二年叙功超授三等公時圖賴方從定國大將軍豫親王多鐸西討自成豫親王師自懷慶而南圖賴至孟津率精兵渡河明守將黃士欣等皆走降瀕河寨堡十五明總兵許定國等以所部來附進薄潼關自成將劉宗閔據山爲陳拒我師噶布什賢章京努山鄂碩等率兵向敵敵迎戰圖賴率百四十騎直前掩殺一以當百俘馘過半是歲正月自成將劉芳亮以千餘人出關覘我師圖賴與阿濟格尼堪等令正黃正紅廂白廂紅廂藍等五旗各牛录出巴牙

喇兵率以擊敵大敗之自成聞敗親率馬步兵拒戰又徵廂黃正藍正白三旗兵相助賊連夕攻我壘皆敗走遂破潼關陝西既定豫親王移師下江南四月至揚州令圖賴與拜音圖阿山等攻之克其城執明大學士史可法殺之進攻明南京復令圖賴與拜音圖阿山率舟師列江西岸助攻南京既下從貝勒尼堪等逐明福王至蕪湖福王登舟將渡江圖賴扼江斷渡明將田雄馬得功以福王降師還圖賴上書攝政睿親王略言圖賴昔年事太宗王之所知也今圖賴事上亦猶昔事太宗時不避諸王貝勒嫌怨見有異心不爲容默大臣以下牛彖章京以上亦不爲隱惡圖賴誓於天必盡忠事上圖賴有過失王若不言恐不免於罪戾王幸毋姑息不我教誡也初圖賴在軍固山額眞譚泰方從英親王阿濟格西征遣使告圖賴曰我軍道迂險故後至請留南京畀我軍取之圖賴以其語告豫親王別作書遣塞爾特報索尼將使索尼啓攝政王塞爾特以書示牛彖希思翰希思翰慮書達譚泰且得罪令沉諸河圖賴至京師繫塞爾特索前書塞爾特詭言已達索尼事聞於攝政王三年正月下諸大臣審勘

將罪索尼攝政王親鞫塞爾特始自承沉書狀攝政王坐午門議譚泰罪三日猶未決圖賴詰王語甚厲攝政王怒曰爾亦過妄矣曩逐流賊至慶都議分道進兵因諸將爭先爾誚讓肅豫英諸親王不顧而唾今又以語凌我似此怒色疾聲將逞威於誰乎予與諸王非先帝子弟乎語畢遂還邸諸王因執圖賴將罪之王復返曰圖賴雖聲色過厲然非退有後言者且爲我矢勤効忠無他咎也命解其縛獄既定侍衛阿里馬私誚圖賴庇索尼圖賴以告攝政王王令捕阿里馬及其二弟索泥岱鎖寧阿里馬故驍勇與索泥岱拔刀力拒皆殺之而釋鎖寧阿尋授本旗固山額眞二月以貝勒博洛爲征南大將軍圖賴副之帥師徇浙江福建五月論破流賊及定河南江南功進圖賴一等公是月師至杭州明魯王駐紹興其將方國安等屯錢塘江東岸綿亘二百里艤舟拒我軍我軍舟未具會潮落沙漲圖賴率諸將士策馬自上流逕渡江廣十餘里人馬無溺者國安望見驚棄戰艦走還紹興將劫魯王以降魯王走台州圖賴師從之獲其將武景科等進克金華殺明督師大學士朱大典七月復進克衢州殺明

蜀王盛濃及明將吳凱項鳴斯等浙江平八月博洛令諸軍分道入福建圖賴
自衢州出仙霞關擊破明大學士黃鳴駿等師度嶺克浦城分遣署巴牙喇纛
章京杜爾德噶布什賢章京拜尹岱等攻克建寧延平諸府明唐王自延平走
汀州復遣巴牙喇纛章京阿濟格尼堪杜爾德等帥師追擊克其城執唐王及
其宗室諸王送福州明將姜正希以二萬人夜襲汀州已登陴我軍出禦擊殺
過半別軍自廣信出分水關克崇安共撫定興化漳州泉州諸府福建平師還
至金華圖賴卒於軍子輝塞襲爵貝子屯齊等訐鄭親王濟爾哈朗因及圖賴
嘗謀立肅親王豪格及上卽位復附和鄭親王輝塞坐奪爵八年上親政念圖
賴舊功命配享太廟諡昭勳立碑紀績輝塞復襲爵雍正九年三月定封一等
雄勇公

準塔滿洲正白旗人扈爾漢第四子也天聰間授世職牛叅章京官甲喇額眞
嘗與鰲拜共率師略明錦州復與勞薩共率師迎護察哈爾來降諸宰桑崇德
二年四月從武英郡王阿濟格攻明皮島敵守堅阿濟格集諸將問策準塔與

鰲拜對曰我二人誓必克之不克不復見王遂先衆連舟渡海舉火招諸軍敵倚堡爲陳以拒與鰲拜犯矢石力戰卒取其島論功進世職三等梅勒章京襲十二次賜號巴圖魯敕增紀其績三年八月授蒙古固山額眞九月從揚武大將軍貝勒岳託等伐明攻密雲牆子嶺準塔先據嶺導諸軍毀邊牆以入擊敗明太監馮永盛總兵侯世祿等又與武賴敗三屯營援兵復進戰於董家口破敵行略地克城二師還進世職二等梅勒章京六年二月從睿親王多爾袞攻錦州以阿王指遣士卒歸又離城遠駐議罪當奪官籍沒上命罰鍰以贖八月上自將攻錦州九月還盛京命準塔從貝勒杜度等爲長圍困之七年三月錦州旣下上命貝勒阿巴泰率師留戍旋令準塔與固山額眞葉臣等番代先是圍錦州時城兵出犯廂黃旗汛地巴牙喇兵退入壕內王貝勒等袒不舉準塔坐阿附議罪當罰鍰上命貸之十月從阿巴泰圖爾格帥師伐明略山東與葉克書等分兵攻孟家臺不克士卒有死者準塔又妄稱嘗陷陳師還議罪奪巴圖魯號降世職一等甲喇章京仍罰鍰十二月復命鎮錦州順治元年從睿親

王多爾袞入關擊李自成遂至慶都大破之又與譚泰等率噶布什賢兵逐至眞定又破之自成焚輜重倉皇西走於是京師以北居庸關內外諸城堡及畿南諸州縣悉定論功復二等梅勒章京二年正月以饒餘郡王阿巴泰爲帥準塔將左翼譚布將右翼帥師徇山東二月聞明福王遣兵渡河阿巴泰令準塔等迎戰明兵方攻沛縣李家樓馬步二十餘屯徐州距城十五里準塔師破其壘斬其將六明兵赴河死者無算遂克徐州五月復自徐州南下明總兵劉澤清遣其將高佑以舟師攻宿遷擊破之進次清河縣黃河自西來至縣境淮水及清河皆入焉澤清遣其將馬化豹張忠義等將兵四萬舟千餘據三水交匯處連營十里準塔遣梅勒章京康喀賴游擊范炳吉天相等率兵渡清河結營相拒發礮擊敵舟復遣都司楚進功將步兵六百人屯黃河北岸鳴礮相應又分其兵爲二一出清紅上游一隔水擊破明馬步軍兵復合逐入淮安界斬其將三師次清江浦澤清引去明將吏柏永馥范鳴珂出降遂克淮安明新昌王入海據雲臺山糾衆陷興化準塔遣將擊斬之通州如皋泰興諸城皆下鳳陽

廬州亦降凡降明將吏二百十三得舟五百餘馬九百餘橐駝二十五礮一百二十捷聞進準塔三等昂邦章京復巴圖魯號命以固山額眞鎮守廬鳳淮陽諸處準塔帥師巡行諸州縣安撫居民設置官吏江淮間悉定澤清尋亦以所部降三年正月從肅親王豪格帥師徇陝西時叛將賀珍據漢中武大定石國璽等分屯徽階諸州遙與相應豪格帥自西安向漢中珍走西鄉七月令準塔與貝子滿達海等攻大定國璽等大定國璽等以其衆七百人降十一月豪格擊張獻忠於西充準塔指揮諸軍合戰俘馘甚衆四年八月復與貝勒尼堪貝子滿達海等分兵下遵義夔州茂州榮昌富順內江資陽諸郡縣四川平師還尋卒論功進世職一等精奇尼哈番十二年追諡襄毅立碑紀績準塔無子弟阿拉密襲遇恩詔進三等伯康熙中準塔兄子舒書降襲一等精奇尼哈番乾隆初定封一等子

伊爾德滿洲正黃旗人揚古利族姪也天聰三年從揚古利率師入明邊略錦州甯遠旣復從攻北京師還敗山海關援兵於灤州出塞爲前驅斬明兵守隘

者五年從上圍大凌河城城兵突出伊爾德衝鋒殺敵逐敵迫壕乃引還敵騎挾弓矢將犯御營伊爾德馳斬之秋復略前屯衛將十五人捕敵軍邏卒值別將噶思哈爲敵困奮擊援之出積功授世職備禦尋擢巴牙喇纛章京崇德二年從貝勒阿巴泰築都爾弼城將巴牙喇兵四百人護工役五年從圍錦州敵出戰伊爾德領纛追擊敗之督屯田錦州松山間明人縱牧於野伊爾德設伏烏欣河驅其牲畜以歸敵襲我軍後伊爾德還擊斬獲無算超進世職三等梅勒章京屢坐事當削世職命罰鍰以贖七年復從圍錦州明兵來奪礮擊敗之進一等順治元年命駐防錦州二年加半箇前程世祖召伊爾德命從豫親王多鐸南征與尙書宗室謹岱等將蒙古兵自南陽下歸德招撫甚衆至揚州獲戰艦百餘渡江先驅破南京明福王由崧走蕪湖與固山額眞阿哈尼堪等追擊敗明將黃得功三年進世職一等昂邦章京六年偕大將軍譚泰討叛將金聲桓下南昌誅聲桓師進叛將李成棟陷信豐攻克之成棟夜遁馬蹶溺水死分兵定撫州建昌破其將楊奇盛江西悉平師還復移勦保定土寇論功進世

職一等精奇尼哈番八年巴牙喇蠡章京鼇拜訐伊爾德值上幸內苑擅令門直員役更番私減守門護軍額數又嫉忌鰲拜等鞫實論死上貸之命降世職一級罰鍰以贖尋授本旗固山額眞九年三遇恩詔累進一等伯兼拖沙喇哈番從敬謹親王尼堪征湖南師敗績王沒於陳十一年師還論罪奪職籍沒初明魯王以海與其將阮進等據舟山以海走入海至是其將陳六御阮思等復據舟山爲寇十二年上授伊爾德甯海大將軍率師討之六御等遣所置總兵王長樹毛光祚沈爾序等登陸掠大嵐山伊爾德遣巴牙喇蠡額眞車爾布梅勒額眞碩祿古總兵張承恩引兵趨夏關抵斗門連擊敗之斬長樹等而自率師攻甯波乘舟趨定海分三道並進六御等列舟望江口山下以待伊爾德揮衆進擊敗之追至衡水洋斬六御等遂取舟山十四年師還上命貝勒杜蘭等郊勞復世職論功進一等伯十五年從信郡王多尼南征自貴陽至盤江擊斬明將進克雲南十八年卒於軍諡襄敏孫巴琿岱襲自散秩大臣遷正黃旗滿洲都統夏逢龍之亂出爲荊州將軍聖祖征噶爾丹參贊大將軍馬斯喀軍務

卒諡恪恭子馬哈達降二等伯世襲乾隆中加封號宣義

努山扎庫塔氏世居鄂里父塔克都歸太祖太祖命籍其衆爲牛彖以其長子瑚什屯爲牛彖額眞旗制定隸滿洲正黃旗積功授世職游擊卒無子以努山子渾岱爲後襲職而努山代爲牛彖額眞從征伐輒先驅覘敵有功授噶布什賢章京太宗嘉其能以瑚什屯世職改命努山諡曰弟之子不若弟親也時爲天聰八年五月尋從伐明攻大同努山與甲喇額眞席特庫納海執邏卒以獻崇德元年率甲士行邊至冷口遇明邏卒十四斬三人俘一人獲馬十餘三年從貝勒岳託伐明將入邊遇明兵斬四十人俘三人發明兵所置火藥度牆子嶺明總兵吳阿衡將六千人迎戰擊之敗與噶布什賢噶喇依昂邦勞薩逐明兵獲馬數十及攻具薄明都破明兵爲伏者而自設伏道側挑明太監高起潛戰伏起夾擊多所俘馘即夕起潛襲噶布什賢兵努山與席特庫及甲喇額眞鄂克合兵戰起潛兵敗走逐北迫會通河明兵多入水死遂次涿州分道從睿親王多爾袞徇山東克濟南師還出塞復與勞薩共敗明兵六年七月與侍衛

穆章等誦敵董家口喜峯口遇明兵斬百餘人俘四人從圍錦州是時上自將駐軍松山杏山道中明兵擊噶布什賢兵努山力戰斬五十二人獲馬三十明總督洪承疇出戰努山與勞薩等陳而前戰良久王貝勒等各以所部合戰大破明兵十月擢噶布什賢噶喇依昂邦是時武英郡王阿濟格駐軍杏山河岸上命努山濟師敵騎千自寧遠至猝與努山值驚潰努山逐之至連山斬二十人獲馬三十有二七年三月與噶布什賢噶喇依昂邦吳拜共略寧遠敵騎五十自中後所至率噶布什賢兵縱擊明兵四百人來援并擊敗之薄寧遠守者背城陣努山等與戰俘二十三人進世職二等甲喇章京八年上以貝勒阿巴泰等略山東未還命努山率甲喇額眞四侍衛四兵九十至界口嶺誦師行距邊遠近遇明兵斬守備一兵三百餘俘數十人獲馬贏二百餘八月與巴牙喇纛章京阿濟格尼堪帥師戍錦州順治元年世祖既定鼎命努山將左翼噶布什賢兵從豫親王多鐸西討李自成自成兵出潼關拒戰努山自間道襲其壘斬殺過半自成兵潰走二年移師定河南下揚州克明南京明福王由松走蕪

湖努山與諸將以師從之得福王以歸三年從貝勒博洛徇浙江明總兵方國安屯錢塘江東岸以舟師出戰努山從固山額真圖賴自上游渡擊國安敗之盡得其舟進略福建擊斬明巡撫楊廷清李暄芳時巴牙喇燾章京都爾德等攻下建寧延平諸府明唐王聿鍵走汀州努山馳七晝夜追及之唐王入城守令銳卒以巨木撞其門後軍繼至遂克之五年從鄭親王濟爾哈朗定湖廣明桂王由榔據廣西其總督何騰蛟總兵王進才馬進忠袁宗第等分屯湖南諸郡邑六年正月努山至長沙時席特庫亦遷噶布什賢噶喇依昂邦將右翼噶布什賢兵共簡精銳攻湘潭與固山額真阿濟格尼堪等破北門入騰蛟死之四月兵部尙書阿哈尼堪等徇寶慶未至七十里進才進忠合軍出禦努山令所部舍騎步戰明兵敗薄城東門進才等棄城走逐之至武岡殲進忠所將步兵三千破進才及宗第等寨十餘分克沅州靖州再進克全州斬明閣部楊鰲及副將以下四十餘累進二等阿思哈尼哈番十三年擢內大臣十五年卒阿濟格尼堪滿洲正白旗人達音布子達音布戰死長子阿哈尼堪襲二等甲

喇章京旋卒阿濟格尼堪繼襲授甲喇額眞從太宗伐察哈爾自大同入明境與雅賴共擊敗明兵於崞縣崇德元年從太宗伐朝鮮擊敗明甯遠守邊兵三年從貝勒岳託伐明擊破總兵侯世祿得其印及騎四年擢巴牙喇纛章京從肅親王豪格攻錦州設伏於連山俘五人獲馬七六年從鄭親王濟爾哈朗攻錦州以七十人爲伏敗敵進攻杏山領纛直入敵壘敵大潰時錦州有蒙古諾木齊等願降明總兵祖大壽發其謀以兵圍之不得出阿濟格尼堪詗知之乘夜薄城力戰先登入其郭援諾木齊等皆出進攻松山戰屢捷上以阿濟格尼堪少年能殺敵進一等參將賚白金四百是年八月明總督洪承疇集諸鎮兵救錦州上自將屯松山杏山道中絕饗道明總兵吳三桂唐通等皆潛引去上召阿濟格尼堪親授策與鰲拜等追擊大敗之八年八月命戍錦州九月鄭親王取中後所前屯衛阿濟格尼堪率所部及蒙古兵攻中前所拔其城俘明潰兵無得脫者加半個前程順治元年四月從睿親王多爾袞入關破李自成追至慶都進一等梅勒章京十月從豫親王多鐸帥師西討自成渡孟津薄潼關

賊鑿重壕爲固自成將劉方亮率千餘人出拒阿濟格尼堪與圖賴阿爾津等奮戰方亮敗退至夜復來犯阿濟格尼堪力戰卻之連破賊二壘遂麾兵踰濠冒矢石先登賊驚潰降竄師入關二年正月克西安自成自商州入湖廣豫親王移師下江南四月至淮安遣阿濟格尼堪率所部趨揚州屯城北與親軍合攻城遂下獲戰艦二百餘渡江克明南都追擊明福王由崧於蕪湖敗其舟師進三等昂邦章京三年從端重親王博洛定浙江徇金華衢州破仙霞關略建寧延平明唐王聿鍵走汀州阿濟格尼堪與都爾德進擊至城下率精銳先登遂克汀州其總兵姜正希以二萬人赴援阿濟格尼堪出禦所殺傷過半進一等精奇尼哈番賜勅世襲五年授正白旗滿洲都統六年鄭親王濟爾哈朗征湖廣以阿濟格尼堪參贊軍事是時明總督何騰蛟總兵王進才馬進忠等守湖南騰蛟軍湘潭進才進忠軍寶慶阿濟格尼堪至長沙與兵部尙書阿哈尼堪爲前鋒攻湘潭破北門入執騰蛟逐明潰兵至湘鄉盡殲之遂趨寶慶未至七十里進才進忠合軍拒戰阿濟格尼堪令步騎番進薄寶慶東郭進才等敗

遁遂下沉靖進克全州七年正月師還進二等伯賚白金五百授議政大臣四月卒諡勇敏乾隆間加封號襄寧子宜理布自有傳

佟圖賴漢軍鑲黃旗人父養眞太祖克撫順養眞以從弟養性已降挈其族來歸從攻遼陽以功授世職游擊命駐鎮江守將陳良策以城叛養眞及長子豐年皆死佟圖賴初名盛年其次子也襲世職事太宗天聰五年從攻大凌河破明監軍道張春兵進世職二等參將崇德三年授兵部右參政五年從攻錦州取白官兒屯台六年復從攻錦州取金塔口三台七年從攻松山明師以騎兵突陳將奪我師礮佟圖賴擊卻之又敗其步兵取塔山杏山諸台遂克其城二以功進世職一等是歲始分漢軍爲八旗授正藍旗固山額眞師出略明邊佟圖賴與固山額眞李國翰等奏請直取燕京上以未取關外四城何能卽克山海優旨開諭之八年從鄭親王濟爾哈朗收前屯衛中後所二城加半箇前程順治元年從入關調鑲白旗與固山額眞巴哈納石廷柱等招降山東府四州七縣三十二復移師下太原招降山西府九州二十七縣一百四十一師還賜

白金四百尋從豫親王多鐸西討李自成定河南二年移師徇江南先後克揚州嘉興皆在行進世職二等梅勒章京賜蟒服黃金三十白金千五百五年授定南將軍與固山額真劉之源率左翼漢軍駐寶慶時馬進忠等寇衡湘辰永間陷寶慶佟圖賴師至克之六年鄭親王濟爾哈朗徇湖廣佟圖賴與固山額真碩詹等分兵趨衡州陳斬明將陶養用拔其城時明將胡一清猶屯城南爲七營乘勝疾擊破之逐一清戰於望公嶺山峪口又破之一清走入廣西境距全州三十里立六營自保與努山阿濟格尼堪合軍奮擊破之遂下全州師還駐衡州明兵犯常甯遣牛彖額真陳天謨等馳援破明兵石鼓洞斬其渠八年師還宴勞授禮部侍郎復調正藍旗固山額真世職累進至三等精奇尼哈番十三年以疾乞休世祖命加太子太保致仕十五年卒賜祭葬贈少保仍兼太子太保諡勤襄康熙間以孝康章皇后推恩所生贈一等公並命改隸滿洲世宗卽位追封佟養正一等公諡忠烈與佟圖賴並加太師養真改曰養正避世宗嫌名也

論曰圖賴忠鯁類父督師南征破福唐二王三江閩浙以次底定仍世侑饗允
哉準塔綏徠畿輔戡定江淮伊爾德橫海殺敵破魯王餘衆功與相並努山阿
濟格尼堪佟圖賴佐定江表又合軍徇湘南戮力佐創業績亦偉矣